

Aposol Vahe'mo'kizmi Erizamofa Naneke

Jisasi monafinka mreri'nea naneke

1 ¹Nagra Luku'na, ese avontafe'ma kre'nofina, Tiofolisiga ko kasmi'noe, Jisasi'ma agafa huno hakarezama nehuno rempima hunezamigeno, ²avreno monafinka vu'nea knare ehanati'ne. Hianagi vunaku nehuno Agrama zamavare'nea aposol nagara ruotge Avamu'mo aza higeno, eri'zama erisaza'zanku zamasm'i'ne. ³Ana amage nentea aposol nagateke, atama erino fri'nefinti otino, Nagra mani'noe huno 40ti'a zage'gnafina zamavure vano nehuno, anahu kna huno Agra rama'a kampinti, ruzahu ruzahu ke nehuno, mika'zama Anumzamofa kumapima me'nea avu'ava zanku kea nehige'za nege'za antahi'naze. ⁴Ko'ma zamagrane mani'nenoa, anage huno huzmante'ne, Jerusale kumara otretfa hiho, hianagi Nenfama huvempa huno huhampri nante'nea zanku'ma tmasmi'noana avega antetma maniho. ⁵Na'ankure Joni'a tintfanu mono tina frezmante'ne, hianagi ama knaretira upa knafi, tamagra ruotge Avamuteti tina fregahaze.

⁶Aposol nagamo'za eritru hu'za magopi manite'za, agafa hu'za Jisasina antahige'naze. Ramoka amagna, Israeli vahe'mokizmi nomani'za zamazeri fatgo nehu'na, kva krizmantegahue hu'nana knafi? ⁷Agra anage huno zamasm'i'ne, tamagri'zana omane'neakita tamasmisugeta ontahigahaze, nanknarero, nanknafino Nenfama agra hanave'afi, anankna huhamprinte'ne. ⁸Hu'neanagi ruotge Avamumo tamagrite esigetma, tusi'a hanave eritetma, Nagri nagenkea Jerusale kumate huama nehutma, Judiane Sameriane huama nehutma, afete mopa omeatre eme atre arega ome huama hugahaze. ⁹Ana naneke zamasmitemo, negageno hampompi ufreg'e'za onke'naze. ¹⁰Monafi kete'za mani'nageno, ame' huno efeke kukena hu'na'a ne'tremoke anante oti'ne'ne, ¹¹anage hu'na'e, Galili vahe'mote na'a higetma amarera oti'netma monafinka negaze? Ama ana Jisasi tmatreno monafi negageno mreri'neaza huno, ete anahu kna huno egahie, huke zamasm'ina'e.

Judasi nona'a mago'mofo huhamprinte'naza naneke

¹²Anante mago agona Olivie nehaza agona atre'za Jerusale e'naze, e'i ana agona Jerusale tva'onte me'ne, kama vu'amo'a, mani fruhu kna zupa vute'za neaza avamente me'nea agone. (1 kilomita avamenteku hu'ne.)

¹³Zamagrama Jerusale ufrete'za, nemaniza nOMPI anagame umreri'za hunaragintepinka mani'naze. Pita ene Joniki, Jemisi ene Endruki, Filipi'ene Tomasiki, Bataromio ene Matiuki, Jemisi Alfiasi nemofo ene Saimon Zelaiotiki, Judasi nemofo Jemisiki hu'za anampi umani'naze. ¹⁴Maka ana naga'mo'za magoke antahintahifi maka'zupa nunamu nehu'za mago'a a'nene, Meri Jisasi nerera'zane, Jisasi nefu'za mani'naze.

¹⁵Ana knafina zamentinti nehaza nagapinti Pita'a 120ti'a naza naga amu'no zamifi otino anage hu'ne. ¹⁶Nafuhete, Ruotge Avamumo ko Deviti asmigeno avontafe krente'neana, Judasi zamareno vige'za ha' vahe'mo'za azeri'naze kemo'a avufa'a forehie. ¹⁷Tagrane mani'neni, agra ama mono eri'zana eri'ne. ¹⁸(Menina Judasi havi avu'ava'mo ana mopa miza se'ne, ana mopafi kanahegeno rimpamo tagatiramine. ¹⁹E'ina huno frige'za Jerusale kumate vahe'mo'za ana naneke nentahi'za ana mopagu Aramu kefi Hakaltemie hu'naze, zamagra kefina Korantmi'nea mope hu'naze.) ²⁰Anazanku Zgame avontafipina anage huno kre'ne, ***Atregeno mago'zana noma'afina omaneno, Anampina atregeno mago vahere huno omanino,*** (Sam-Zga 69:25), ***Atregeno mago vahe'mo agri nona erino, eri'zana erino huno avona krente'ne.*** (Sam-Zga 109:8) ²¹Ana hu'negu tagra mago ne azeri otisunkeno, Judasi nona erisie. Ana ne'mo'a tagrane maka knama, Ramo Jisasi'ma mani'nereti vuno, ²²Joni'ma mono tima fre ante'nea knareti eno, tagripinti avareno monafi vu'neaza ke'nenimo, fri'nefinti oti'neazana huama huno tagranena vano hugahie. ²³Ana hute'za tare ne'tre znazeri oti'naze, Josefenu Banabasi'e (nehaza ne'kino mago' agi'a Jastusi'e) magora Matiasi'e. ²⁴Ana hute'za nunamu hu'za, Ramoka kagra hakare vahe'mofo zamarimpa ke'nane. Hanki ama tare ne' trenpintira, inamofu huhampri antenampi taveriho. ²⁵Ama ana eri'za erinogura, kamagama'ante'nea aposol ne' Judasi eri'zana atreno kuma'arega vu'ne. ²⁶Anante mago'zokago (lots) Tais zokago reza kazageno, Matiasi huhampri'naza su'amo eama hige'za, Matiasi azeri otizageno, 1lni'a aposol nagapi ufre'ne.

Kasefa hoza vasage knare (Pentikos) Avamumo erami'nea naneke

2 ¹Kasefa hoza vasage kna Pentikos ege'za, aposol nagamoza mago nOMPI atru hu'naze. ²Ana hu'za mani'nageno amehuno zaho'mofo agasasamo hiaza huno, tusi'a agasasa runo monafinti eramino mani'naza nOMPI avite'ne. ³Tevemofu agefu'nagana huno, tagareno vuno eno huno, magoke magoke'mofonte emani'ne. ⁴Maka'mofona Ruotge Avamu'mo

zamagu'afi viteno, zamazeri otige'za, Avamu'mo zamasamia kante ante'za, agafa hu'za aru agerupinti kea hu'naze.

⁵Ana knafina knare hu'za amage ante'naza Juda vahe'mo'za, mopane mopane kotegati e'za Jerusale kumate emani'naze. ⁶Ana agasasa fore nehige'za, miko vahe'mo'za atru hu'za na'a fore nehie hu'naze. Na'ankure mago mago'mo'a agra'a agerupi antahitere hu'ne. ⁷Zamagra antri nehu'za anage hu'naze, ana maka Galili vahe'mo'za kea nehazanki na'a fore nehie? ⁸Na'a higeta tagra mago mago'mota tagra mofavremota nehuna tagerupina nentahune? ⁹Tagra rukotegati rukotegati (Amama mani'nona vahera) Patia mopareti'ene, Medes mopareti'ene Elami mopareti'ene, Mesopotemia mopareti'ene, Judia mopareti'ene, Kapatosia mopareti'ene, Pontasi mopareti'ene, Esia mopareti'ene, ¹⁰Frigia mopareti'ene, Pamfilia mopareti'ene, Isipi mopareti'ene, Livia kazigati'ene, Sairini mopareti'ene, Romuti nantu vahe'ene, Hibru vahe'ene, megi'a vahe'mo'za zamagu'a rukrahe hu'naza vahe'ene. ¹¹Kriti mopareti'ene Arab mopareti'ene vahe'mota tagra hanavenentake avu'ava'zama Anumzamo'ma hia zana tagerupi nentahune! ¹²Maka'mo'za mago'ene na'a fore nehie nehu'za, tusi'za hu'za antahintahi hakare hu'naze. Zamagra'a ohumi ahumi nehu'za anage hu'naze, Na'a amazana fore nehie? ¹³Hianagi mago'amo'za anama haza zankura anage hu'za zamagi'za nereza, zamagra kahefa waini ti ne'za negi nenegahaze! Hu'za hu'naze.

Pita mono ke huama hu'nea naneke

¹⁴Hianagi Pita otino 11ni'a amage' nentaza naga'ane mani'nenno, ranke huno zamasmino, tamagra Judia vahe'ene, miko Jerusale mani'namota ama huankea tamagesa anteta antahi ankereho. ¹⁵Amama kema nehaza zanku'ma tamagesa hakare nehazana, menina nantera 9 kiloki hu'neanki'za, zamagra negi tina one'naze. ¹⁶Hu'neanagi ama'i korapa kasnampa ne'mo, Joeli hu'nea nanekemofa avufa'a meni negaze. ¹⁷Hagi vagare knafina, Anumzamo'a anage hu'ne, ***Nagra Avamuni'a vahepi eri herafi atresugeno, tamagri ne'mofa tamimo, kasnampa kea huama nehina, kasefa vahe'mo'za ava'na keaza nehanageno, ranafa tamimo'za ava'na kegahaze.*** ¹⁸***Nagri eri'za^a vahete'ene, vene'nere ene, a'nerera Nagra Avamu'ni'a ana knafina eri herafi atresugeno zamagra kasnampa kea hugahaze.*** ¹⁹***Nagra monafina ruzahu'za eri fore nehu'na, kaguva avame'za ama mopafina erifore nehu'na, korane, tevene, hampone tokira hugahie.*** ²⁰***Zgemo'a rukrahe huno hani hanigeno, ikamo'a kora hanigeno, henka tusi'a hanave'nentake Ramofo kna egahie.*** ²¹***Ana nehanigeno miko vahe'mo'za, Ramofo agi hanta nevazisamo'za zamu'vazinke'za knare kuma erigahaze.*** (Jol 2:28-32)

^a bondslave, hu'nea kemofa agafa'amo'a, magomo, mago'a kafufi rumofonte eri'za eri nentesigeno, henka zgoa amigahie hu'ne hagerafina'e.

²²Israeli vahe'motma ama kea antahiho, Nazareti ne' Jisasina, Anumzamo azeri oti'nea ne'mo, kaguva zane ruzahu'zane, avame'zana Anumzamo'a, Agripi runtanino amuno tamifina eri'zana erigeta, keta antahita hu'naze. ²³Ama ana nera, Anumzamo antahino ahegahaze huno korapa retro hu'nea kante antetma, tamagra avaretma megia' vahe zamazampi antage'za, keka zafare hanto ahegeno fri'ne. ²⁴Hianagi Anumzamo'a fri'nefinti azeri otino, fri'zamofa atazampinti azeri so'e hu'ne. Na'ankure frizamofa hanave'amo'a azerintega osu'ne. ²⁵Deviti'a amanahu ke agriku hu'ne, ***Nagra maka zupa negogeno, Ramo'a navuga nemanie, na'ankure Agra nza tmaga'a mani'neankino, nazeri kazara osugahie.*** ²⁶***E'ina hu'negu nagu'amo'a so'e nehanigeno, nagipintira tusi'a musenkemo atiramigahie. Navufamo'enena anazanke huno fore'ma haniazanku avega anteno manigahie.*** ²⁷***Na'ankure kagra nagu'namena fri vahe kumapina (Heidis), otregahane, huge atresankeno Ruotge hu'nemo'a kerifina okasrigahie.*** ²⁸***Kagra mani'zanimofa kana ko eri'ama hunami vare'nane. Kagrama navate'ma nemaninkeno'a, musezamo avinete,*** huno Deviti'a hu'ne. (Sam-Zga 16:8-11)

²⁹Nafuhete, nagra fatgo hu'na neramasmu'e, mago tahiti'a Deviti'a frige'za asentageno, kerimo'a menina tagrane me'ne. ³⁰Na'ankure agra kasnampa nekino antahine, Anumzamo'a mago negeho avareno tra'are (kini trate) antesigeno mani'nigu averino huvempa hu'ne. ³¹Deviti'a kegamuteno, Kraisi friteno otisniazana ke'ne, fri vahe kumapina (Heidis) avufamo'a atresigeno zaza kna omaneno, onkasrisia zanku hu'ne. (Sam-Zga 16:10)

³²E'i ana Jisasina, Anumzamo'a fri'nefinti azeri otigeta, tagra maka'mota tavufinti ke'nona zanku nehune. ³³Ana higeno Anumzamo' rahi nemino, azantamaga kaziga'a avarentegen, huvempama hu'nea Ruotge Avamura Nefampinti erino, eritagitregeta menina negeta nentahita nehaze. ³⁴Na'ankure Deviti'a monafinka mareori'neanagi, Deviti agra'a huno, ***Ramo'a, nagri Ramofonku huno, Naza tamaga kaziga mani'nege'na,*** ³⁵***Nagra ha' vaheka'a zamazerina kagia tra antesugenka, kagiareti arentako hugahane*** huno hu'ne. (Sam-Zga 110:1)

³⁶E'ina hu'negu, maka Israeli vahe'motma tamage hutma antahi ankereho, tamagrama aheta hanti'naza nera, Anumzamo azeri otigeno, Ra vahe tro huno Kraisi mani'ne.

Pita ke antahi'naza naneke

³⁷Ana kema zamagrama nentahizageno, kemo'a zamarimpafi agonaza zamareaza hige'za, Pitanku ene ruga'a aposol nagaku anage hu'naze, tafuhete tagra na'a hugahune? ³⁸Hazageno, Pita'a zamagrikura anage

hu'ne, tamagu'a rukrahe nehutma, Jisas Kraisi agifi mono tina frenkeno, kumi'timia apaseramante'na, ruotge Avamu'mofo museza tamagra erigahaze. ³⁹Na'ankure huvempama hu'neana tamagri'ene, mofavre tamimofonku'ene, afete mani'namokizmigu'ene, ruga'a vahera tagri Ra Anumzamo zamagi hanige'za, Agrite egahaze. ⁴⁰Rama'a ruga'a ke Pita'a huama nehuno, zamazahuke zamasami'ne. Kefo zampima mani'naza vahe'pintira, manigneta manisaza zamo tamagu'vazina, knare huta manigahaze. ⁴¹Agri kere zamentintima haza nagapintira, monoti fre'naze, anazupage tima fre'nazana, 3tauseni'a nazamo'za fre'naze.

Ese zamentinti vahe'mo'za mono hu'naza naneke

⁴²Ana vahe'mo'za aposol nagamokizmi naneke antahiza atru hu'za monora rempi hu'za nentahiza, magopi breti kori'za nene'za (Lords sapa) nunamuna hu'naze. ⁴³Aposol nagamo'za hakare ruzahu'zane, kuguva'zana erifore nehazageno, maka'a vahe'mo'za nege'za zamanogu nehu'za amazana na'za fore'nehie hu'naze. ⁴⁴Hanki Jisasinku zamentinti hu'naza vahe'mo'za tragote'za nemani'za, maka'za zamia omi'ami nehu'za, ⁴⁵mago'a zazamine, mopa zaminena agafa hu'za zagore atrage'za, miza'sage'za zago eri'za upama hu'naza vahe refako hu'za zami'naze. ⁴⁶Maka kna ra mono (tempol) kumapi atru hu'za mono kea nehu'za, zamagu'a anterami'za, zamarimpa fruregati nonte nonte bretia koriza nene'za kave'zamia fako hutere hu'naze. ⁴⁷Anumzamofa agi hentesga nehazageno, mago'a vahe'mo'za ana vahe'mokizmi muse huzmante'naze. Ana nehazageno Anumzamo zamagu'ma vazi'nea vahe'mo'za mago mago kna rama'a efare'naze.

Aga sati'nea ne' eriso'e hunte'nea naneke

3 ¹Mago zupa, Pita'ene Jonikea, ra mono nontega nunamuhu knare, mago kiniga 3 kiloki higeke marerike nevakeno, ²mago nera, nerera agu'afinti agia frinea ksente'nea nera zafa hu'za vazaza'mo'za ra mono nomofo kasana, knare so'e kasane hu'za agia nehare ome ante'naze. Mika zupa anante ome ante'nageno mani'neno, mono nompima umreriza vahekura, azama hanagu meme nehiane. ³Ana nemo'a znagege'ne Pita'ene Jonikea ra mono nompumi umreri'snuanki nehakeno, ana ne'mo'a zgogu znantahige'ne. ⁴Hianagi Pitake Jonikea avufi kefatago huke negeke, kma tagrira tago! Huno Pita'a hu'ne. ⁵Higeno, ana ne'mo mago'a zana zanagritegati erigahue huno agu'agesa antahi'ne. ⁶Hianagi Pita'a anage hu'ne, silvane, kolinena e'ori'noanki, nagrama eri'nozana kamigahue. Jisas Kraisi Nazareti ne'mofo agifi, otinka vuo! ⁷Nehuno Pita'a azantmaga'a ana nera azerino azerioti'ne. Anama nehigeno'a ame' huno agia avozamo'ene, agia avu'a zaferinamo'a hanaveti'ne. ⁸Higeno agra haru huno marerino tamino nehuno, agia reno vu'ne. Pita'ene

Joni'ene magoka ra mono'nompi nevuno, haru huno marerino tamino huno nevuno, musenkase huno Anumzamofu agi erisaga hu'ne. ⁹Ana hige'za miko vahe'mo'za negageno nevuno, Anumzamofu agia hesga hu'ne, ¹⁰hige'za mika vahe'mo'za nege'za, ra mono (tempol) nomofu knare so'e kasante mani'neni zagogu meme nehia ne'mo amanahura nehianagi, nankna hu'neha hu'za tusi'a antri nehu'za zamagogogu hu'naze.

Pita'a ra mono nompi mono ke hu'nea naneke

¹¹Pitane Joni kizni ana ne'mo zanazeri'negeke, mika vahe krefamo'za magoka zamagare'za zamagritega Solomonine hu'za humegi atre'naza nompi, vano nehaza kante tusi zamagogogu nehu'za e'naze. ¹²Hianagi anama hazaza Pita'a negeno, anage huno ana vahe'zga zamasmine, Israeli vahe'motma nahigeta amanahu zankura antri nehutma, tamagogogura nehuta, tagrira uruhara neragaze? Tagritia hanaveretiro, Anumzamofu avu'ava hu'azamo azeri otigeno kana vifi? I'o, ¹³Abrahamune, Aisakine, Jekopu Anumzana tafahe'i Anumzamo kesga nehia eri'za Ne'a Jisasina, Paeroti atrenigeno vunaku nehigeta, tamagra ma azeritma ha' vahe azampi ahenogu nenteta, Paeroti ne'mofu avufi tamefi humi'naze.

¹⁴Hianagi tamagra fatgo huno ruotge hu'nea Nera, tamefi humitma vahe'ma ahenefria neku avare atreho, hazage'za avare'za tamami'naze.

¹⁵Hagi tamagra Asimu'mofu agafa ahe fri'nazanagi, Anumzamo azeriotti nemofu, tagra tamage huta tavufinti ke'no'a zanku nehu'e. ¹⁶Hagi Jisasi, Agri agire tamentinti hu'azamo, e'i ama ana agimo amama negaza nera azeri knare hu'ne. Hagi Jisasinte amentinti hu'nea zamo, mika vahe'moka kavufina agrira azeri so'e hu'ne.

¹⁷Menina nafuhete, nagra tamantahi'noe, ontahinetma Jisasima tamavutamavama hunte'nazana, kva tamimo'za nehazankna hutma ontahinetma hu'naze. ¹⁸Hagi korapa Anumzamo'a, Kasnampa vahepima runtandinoma, Kraisia ata hoza erigahie hu'noma hunte'neazamo, ana kante efore hu'ne. ¹⁹E'i zanku, kasunku hunka kagu'a rukarehe hunka, Anumzamofu egeno, kumika'a eri atregantegahie. ²⁰Ana knafi Rantimofu avateti kahefa hanave ne'e sigeno, hagi ko'ma Agra'ma hramante'nea nera Kraisia huntisigeno egahie. E'i Jisasi'e. ²¹Ama ana Nera monamo avare'anagamu tenesigeno umani'nenigeno, Anumzamo'a mika zana azeri kasefa hugahie, Anumzamo ko' huama hu'ne, korapa knafima ruotge kasnampa vahe'mofu zamagipi huvempa hu'naze.

²²Mosese'a huno, ***Ra Anumzamo'a kasnampa nera nagrikna huno tamagri nagapinti azeri otigahie. Agrama na'ane kema haniana, ke'a erizafa hunka amage anto.*** ²³***Mika vahe'mo'za ana kasnampa ne'mofu kema ontahisnamo'kizmia, zamahe nefrino, vahe'afintira zamahenati tregahie.*** ²⁴Anahu kante maka Samuelinteti'ma eno erami'naza kasnampa vahe'moza, ke nehu'za huama hu'nazana, ama knagu hu'naze.

(Diu-Kas 18:15-19) ²⁵Tamagra kasnampa vahe'mokizmi mofavre, Anumzamo'ma tmafah'e'zanema huvempa huno huhagerafinea kemofa mofavre mani'naze, Abrahamunku'ma huno, **Kagri ka'a mofavrefinti, hakare kogna, famomo'a ama mopafina asomura erigahaze** hu'ne. (Jen-Agf 22:18) ²⁶Na'ankure Anumzamo'a pusante eri'za Ne'a azeri otigeno tagrite e'ne, havi zampintira magoke magoke'mota, tazeri rukarahe huno asomu hurante'ne.

Pitane Jonigizni znazeri'naza naneke

4 ¹Pita'ene Jonikema ana vahe zganema keaga nehake'za, prisi vahe'ene ra mono nonte kva nehaza kva vahe'mokizmi kva'neki, Sadusi vaheki hu'za znagrite e'naze. ²Na'ankure keagama hapina, vahe'ma frisutma, Jisasi hanavefi etetma otigahaze huno zamasmia kegu zamarimpagna hu'naze. ³Ana higeno znazerino kina nOMPI ome znantege'ne mase'na'e. Na'ankure hago kinaga se'negenoe. ⁴Hianagi mika kema antahi'naza vahe krerafamo'za zamentinti hu'nazana, venene'agema hamprinazana ⁵tauseni'a nazampi mareri'ne.

⁵Msakeno ko atigeno, kasegere ugagota hunaza vahe'ene mono nonte kva vahe'ene Jerusalemi etru hu'naze. ⁶Ugagota hu'nea prisi ne' Ananaisi'a anampina mani'ne. Hagi Kaiafasi'ma Joni'ma Aleksendaki, ugagota hu'nea prisi ne'mofa nagapinti ruga'a mani'naze. ⁷Amu'no zamifima Pitane Joni kizni zanzeri otite'za, agafa hu'za znantahige'naze, Inankna hankavereti ene iza agifi amanahu'zana hu'na'e? ⁸Pitana Ruotge Avamu'mo avite'nea ne'mo, zamagri kenona anage hu'ne, tra kere ugagota hu'naza vahe'ene ranra kva vahere, ⁹menima knare tavutva'ma kri ne'ma hunte'no'a zantema, tagri'ma refko hutma tagesnazana, na'amo higeno ama nera kri'amo'a atrente'ne nehazana, ¹⁰tamagra ne Israeli vahe'enena antahi ankereho. E'i Nazareti Jisas Kraisima tamagra ma aheta hantizageno, Anumzamo'ma azeri otineama, e'ina ne'mofa agire, amama tamugama otine'nea nera kri'amo'a knare hunteteno otine. ¹¹Ama ana Jisasina, **Tamagra nogi vahe'motma tamavesra hutma retufe atre'naza haveagi, e'i ana havemo'a no renagentete azeri hanaveti have fore hu'ne.** (Sam-Zga 118:22) ¹²Mago vahe'mo'e huno tza huga osu'ne, na'ankure ama mopafi vahe'motafina, tahokehehesia agi'a ontami'neanki, magoke ne' Jisas Kraisi agifi, Anumzamo'a tahokehegahie. ¹³Anante'ma ana vahe'mo'za znagazana, Pitake Jonikea, kema ha'ana korera osake'za, zanagrira antahi ama hu'za, avonona osuke, nontega ne'tremoke Jisasi'enena mani'na'e hu'za antahi ama nehu'za tusi antri nehu'za, nankna'za fore nehie hu'naze. ¹⁴Ana higeno azeri so'e hunte'nea ne', znaganema otine'ge'za nege'za, anazanku kema huznantekea omane'ne. ¹⁵Hianagi kva vahe'mo'za huznantegeke ana atru zamifintima atirami'ne fegia vake'ne, zamagrazmi ke hugantugma hu'za, ¹⁶anage

hu'naze, ama netrena na'a huznantegahune? Na'ankure ama kri ne' azeri so'e'ma hu'nea kaguvazamo'a, mika Jerusale mani'naza vahe'pina amate hige'za hago ke'nazankita tagra onke'none huta hufra okigahune. ¹⁷Hianagi ama kemo'ma mago'ane vahepima vuno'eno osanigura, kore ke znasamisunke'ne, mago'ane ama ana agirera mago'a vahera ozanasmisaze huta zanasamisune. ¹⁸Pitane, Joninena ke hzageke efrake'za zanasmi'za, mago ene Jisasi agirera vahera zamasmige, rempi huzamige osutfu hi'o, hu'naze. ¹⁹Hianagi Pitake Jonikea, anage huke ke nona zamire hu'na'e, Anumzamofu avurera knare, tmagri ke antahisupi, Anumzamofu ke antahigahu'e, tamagra tmi fako huta antahiho. ²⁰Na'ankure tagra keta antahita huno'a zante keaga nehuankita, tagra'ma kema tagane'zamo'a amuhu hurantegahie. ²¹Anama hu'za mago'ane korekema huznantete'za, kina huzanante kankmuna hake'za eri fore osu'za hu'zanantage'ne vu'na'e. Na'ankure ana mika vahe'mo'za e'inahu zama fore hiazankura Anumzamofu ra agi amizage'za nege'za, vaheku koro hu'naze. ²²Na'ankure ana nera 40ti'a zgekfu agatere'nea nete ana avame'zana fore huno azeri so'e hu'ne.

Jisasima amage'nentaza vahe'mo'za hanave erinaku nunamu hu'naze

²³Huma znantegekea, va'azamo'ke, prisi vahe'mo'zane, ranra vahe'mozama makazama humaznante'naza kea magoka zamentinti nehaza naga ome zamasmina'e. ²⁴Ana kema nentahi'za, mago zamagu zamagesare zamagerura erintesga huza Anumzantega anage huza hu'naze. Maka'zamofu Ramoke, Kagra monane, mopane, hagerine, hagi mika zama anampinkama me'nea zantmina trohu'nane, ²⁵Kagra ka'a Avamukafi hankeno Deviti nerafa eri'za ne'kamofu agipi huvazinkeno anage hu'ne, ***Na'a hige'za kokankoka vahe'mo'za zamasigura nehu'za, osuga'zana huku retro nehaze?*** ²⁶***Ama mopafi kini vahe'mo'za magote etru hazage'za, trakere ugagota vahe'tmimo'za zogitru hu'za Ramokane, Kraisinena ha' reneznantaze.*** (Sam-Zga 2:1-2) ²⁷Na'ankure tamagerafa huno Herotiki, Pointus Pailatiki, megia vahe'ene, Israeli vahe ene, ama rankumapina zogitru hute'za, Ruotge eri'za Ne'ka'a huhamprinte'nana Jisasina ha' rentaze.

Tamage e'i ana avamente Heroti'ene Paeroti'ene ru vahe'ene Israel vahe'mo'zane ama kumate eri atru hu'za manine'za kagri mofavre kagrama hampri'nana nera Jisasina ahenaku hu'naze. ²⁸Himamu hanaveka'afima ko antahinka egahie hunka retro hunte'nanazamo efore nehie. ²⁹Hagi menina Ramoka, amama tazeri kore'ma hunerantaza'zana ko, tagra kagri eri'za vaheki, tazeri hanavetigeta oti hampona huneta Kagri nanekea huama hugahune. ³⁰Kagra kri vahe'ma krizmima zamazeri amane huzantema, tazama nentesunkeka avame zane, kaguva zanena, Kagri ka'a ruotge eri'za ne' Jisasi agire eri fore huo. ³¹Nunamu

hutageno, anama zogitru hu'za mani'naza nomo'a kazakaza higeno, ruotge Avamumo'a zamagu'afi avitege'za, Anumzamofu nanekea reku osu'za agafa hu'za hu'naze.

Fenoza fako huza omi ami hu'naza naneke

³²Jisasinte zamentinti nehaza vahe'mo'za raru hu'za mago zamarimpare ene antahintahire nemni'za, tagri' zane hu'za osu'za havia mika'zana omiami nehu'za mani'naze. ³³Tusi'a hanavereti aposol nagamo'za, Ramo'ma Jisasi'ma fripinti oti'nea nanekea huama nehazageno, zamentintima haza nagara tusi'a asunku huzmante'ne. ³⁴Anampima mani'naza kevufintira mago'zankura mago'mo'a upara osu'ne, na'ankure inamofoma mopa'a me'neo, noma'a me'nemo'a zagore atreno ana zago erino, ³⁵aposol naga eme zamizage'za, fako hu'za zagogu'ma upa'ma hu'naza vahe zami'naze. ³⁶Hagi mago Livae nera, Saiprus hageri amuragozafi ksente'nea nera Josefe'e, mago agi'a aposol nagamo'za antemi'nazana Banabasi'e. (Ana agimofu agafa'a, zamazeri hankaveti ke zamasmu mofavre.) ³⁷Hanki agripina mopa'a menegeni ana mopa zagore atreno, ana zagoa erino viazamo aposol nagamofu ome zami'ne.

Ananiasu ene Safairake knaza eri'na'a naneke

5 ¹Ana hutegeni Ananiasu ene nenaru Safaira enena anahuke, mopa zania zagore atreteke, ²nenaru'a mago rimpa huno antahi'negeni, mago'a zagoa refako huno agra suna nentenu, mago'a zagoa erino aposol naga ome zami'ne. ³Hu'neanagi Pita'a anage hu'ne, nahigeni Ananiasiga Sata'a kaguafina efregenka ruotge Avamura revataga hunka mago'a zgoa mopama atrantetira refko hunte'nane? ⁴Zagore'ma otre'nantera, kagri mopa megeni, zagore'ma atrantera, kagri kavesite me'neane. Na'a higenka amanahu antahintahia kagu'afina antahi'nane? Kagra vahe rezmataga osananki, Anumzamofu revtaga hane. ⁵Hagi anankema nentahino'a, Ananiasu'a traka huno frige'za, anankema antahiza nagatera tusi'a kore'zamo zamagrite e'ne. ⁶Anante nehazave nagamo'za azeri antenu vazite'za, eri'za ome asente'naze.

⁷Tri'a aua evigeni nenaru'a anazama fore hu'neana ontahineno anante e'ne. ⁸Pita'a, anage huno Safairana antahige'ne, zgorema mopama atra'ana, mizana asma'areke atrenampi? nasamio higeni agra anage hu'ne, Izo atreno'a mizana asi'ne higeni, ⁹Pita'a amanage huno Safairana asamine, Nahigetna kagrane negave'enena mago tanarimpa huta Ramofu Avamura rehetu nega'e? Negavema ome asentete'za aza vahera, kasante oti'nazanki ko, kagrira anazanke hu'za eri'za vugahaze. ¹⁰Anage nehigeni agafi hantaka'a traka huno frige'za, nehazave zgamo'za emegazana hagu fri'nege'za, erizafa hu'za vazazamo'za, nevema asente'naza asopare ome

asente'naze. ¹¹Higeno tusi'a kore zamo ana mika mono vahete'ene, ana zama hia kema antahi'naza vahete enena e'ne.

Aposol nagamoza hakare vahe zamazeri so'e hu'naze

¹²Aposol nagamofo zamazantera, rama'a avame'zane, kuguva zamo mika vahetera fore hige'za, ra mono nOMPI, Solomonie' hu'za hunaraginte'pinka ana mika vahe'tamimo'za mago zamarimpa huza magopi atru hu'naze. ¹³Magore hu'za anampintira zamagripina hageorafinazanagi, mika vahe'moza kentahiza, agazone hunezmante'za husga huzmante'naze. ¹⁴Hanki hakare vahe krerfamo'za a'nea, venena hu'za Ramofonte zamentintia hu'za, rama'a vahekrerfa efre'naze. ¹⁵Ana higeno mika vahe'mo'za Pita'ma ene vanigeno, amemo'a hagutesie huza kri vahera sesenku huza zafa hu'za kampi, nosiva masi'ne'za zmantage'za mase'naze. ¹⁶Anazanke huno ranra kuma'ma Jerusalemi me'nefintira, kari'erinea vahepi, havi avamu'mo agu'afi fre'nea vahe tmina zamare'za ageno, maka vahera zamazeri so'e hu'ne.

Aposol naga kina huzmante'naza naneke

¹⁷Hianagi ugagota prisi kva ne'mofo, agri kvafima erizama e'neri'za nagamo'za, (sadusi nagare) aposol nagara kanive rezmante'naze. ¹⁸Zamagra e'za aposol naga eme zamazeri'za mika vahe'mokizmi kina nOMPI omezmante'naze. ¹⁹Hu'neanagi ana kenegera Ramofo ankeromo'a eno kina vahe kafantmina eme anagino, zamareno atineramino, anage huno zamasmine, ²⁰Ra mono nOMPI vutma vahepi omo otitma kahefa mani'za eri'zamofa keaga mika zamasmihio. ²¹Anankema nentahiza, zahufa ko'ma atiamafifi, ra mono nOMPI umareri'za agafa hu'za rempi huzami'naze.

Anante mono nonte ugota kva ne'ene (hae pris), agranema nemni'za naga'ane e'za, kanisol (Senhidren) vahe ke hige'za atru nehazageno, ana maka Isareli kva vahetminena ke hutru hute'za, kina nonte kva vahetega ke atre'za, kinama hu'naza aposol vahera zamaretma eho hu'naze. ²²Hu'neanagi kina nonte eri'za vahe'mo'za kina nOMPI eme kazana onke'za, ete'za naneke eri'za vazazamo'za ome zamasmiz'za, ²³anage hu'naze, Ome konana kina nona nofinu hentrako hunte'za, kerage kva vahe'ene ana nonte kegva hu'naza vahe'mo'za kafante otiza mani'naze. Hu'neanagi tagrama anagitama ufronana, agu'afina mago vahere huta onke'none. ²⁴Ra mono'nontema kegva nehaza (tempol kat) vahe'mofonte ugagota hu'nea kva ne'ene, mono nonte ugota kva (hae prisi) vahe'mo'za anankema nentahi'za, tusi'za hu'za hava nehu'za antahintahi hu'naze. Amanahu'zamo'a nankna hugahie hu'naze. ²⁵Hu'neanagi mago vahe'mo eno, kinama ome huzmante'naza vahe'mo'za, mono nOMPI otine'za, vahe'zgarmi mono naneke rempi hu'nezmize huno zamasmine. ²⁶Mono

nonte kva nehia ne'mo'a, magoka sondia vahe'ene vazazamo'za, ana aposol nagara ome zamavare'za e'nazanagi, sondia vahe'mo'za akohe'za agazone hu'za zamavare'za e'naze. (Na'ankure vahe'mo'za have knonu zamahe frizanku kore hu'za razana osu zamare'za e'naze.)

²⁷Ome zamare'za ana aposol nagara ete'za kanisol (Senhidren) vahe zamure eme zamazeri oti'naze. Mono nontema ugote'nea nemo'a (hae prisi) zamantahigeno anage hu'ne, ²⁸tagra menina hanave kea huta, mago'anena ama ana agifina vahera rempi huozmitfa hiho huramantone. Keho amama rempima huzamiza zamo'a Jerusale kumapina antahi vgaraze, hankino Jisasima ahe'nazana tagriku ahe'naze hutma huneranta'ze. ²⁹Hu'neanagi Pita'ene ruga'a aposol nagamo'za kenona zamire anage hu'naze, Anumzamofu ke'age nentahita ama mopafi vahe'mofonkea ontahigahune. ³⁰Tagri tafaha'e'i Anumzamo, keka zafarema ahetma hantinaza nera Jisasina azeri otine. ³¹Anumzamo'a azeri otino aza tmaga kaziga'a anteno, ugagota kva ne' taguvazi nere hu'ne. Agrite Israeli vahe'mo'za zamagu'a rukrahe hanageno, kumizmia eri atrezmantegahie. ³²Higeta tagra e'i ana zama fore'ma hu'neana keteta, ama ananke hu'ama nehune. Ana higeno tagrama ke'nonazana ruotge Avamumo'a keteno huama hu'ne, kema antahiza avariri'za vahera Anumzamo'a zami'ne.

³³Kva vahe'mo'za anankema nentahi'zageno'a, tusi zamarimpa hege'za zamahe frinaku hu'naze. ³⁴Hianagi Farisi nera Gamalieli'e nehaza ne'mo tra kemofu (lo) kagota huno rempi hunezmige'za, rama'a vahe'mo'za antahinemiza ne'kino otino, osia kna ama vene'ne zga zamare megia zamante'ho huno huzmante'ne. ³⁵Anante amanage huno kansol vahera zamasmine, Israeli vahe'mote, Inazama huzmante'gahune hutma kema retroma hana'zana, antahi so'e hunetma anazana huzmante'ho. ³⁶Mago'a kna koma evunefina, Tiutasi'a otino, Nagra ra vahe mani'noe hige'za, vahera 400ti'a naza vene'nemo'za, agranena eme hagerafi'naze. Hianagi agrira ahefri'zage'za, amage'ma nentaza naga'moza atre'za panini hazageno mago'zana osu'ne. ³⁷Anama hutegenoa ana mefiga, mago Galiliti nera, Judasi'e nehaza ne'mo, zamagi kre'za erifatago haza knare otino, mago'a vahera zamare agrarega atre'nea nera anazanke huno fri'geza amage'ma antenaza naga'mo'za panini hu'naze. ³⁸E'inahu'za fore hu'negu, tamagrira ama nanekea neramasmue, ama nagara mago kea huozmanteta zamatre'ho. Na'ankure, mopafi vahe'mo'ma amanahu'zama hanigeno'a, amne'zankna hugahie. ³⁹Hianagi Anumzantegati'ma ne'esigetma keaga huozmantegahaze. Anama hanutma aru Anumzamofu ha'rentezanku nehue, hige'za nentahi'za zamatre'naze.

⁴⁰Kanisol vahe'mo'za ana zamumro kema nentahi'za, ana aposol nagara kehu'agu'a zamante'za zamazeri'za tusi sefu zamite'za, mago'anena Jisasi agifina nanekea osutfu hiho nehu'za, zmatrage'za vu'naze. ⁴¹Hige'za

aposal nagamo'za ana kanisol naga zamureti'ma zamatre'za nevu'za, Anumzamofa avure mani'neta Jisasi agire'ma eriga knaza erune, nehu'za muse hume vu'naze. ⁴²Hanki hakare knafina, ra mono nomp'i'ne, nonte nontera nevu'za Jisasi'a, tazahu ne' Kraisi'e hu'za knare muse kea rempi hunezmi'za huama hu'naze.

Ese 7ni'a mono kva vahe huhampri zamante'naza naneke

6 ¹Anama haza knafina, amage nentaza disaipol nagamo'za ra hu'za ame'nanempi mareri'zageno, Griki kema nehaza Jiu vahe'mo'za, Hibru kema nehaza Jiu kuma agafa vahetmina kanive rezamante'za, mika zupa kave'ma fakoma hazana kento a'ne nagara antahi nozamize hu'za hu'naze. ²Hage'za 12fu'a aposol nagamo'za ana mika amage'ma nentaza disaipol kevu zamasmizage'za emeritru hazage'za anage hu'naze. Ne'zama fakohu avu'avazamo'a, Anumzamofa nanekema hu'zampina tazeorigahie. ³E'ina hu'negu tafuhete, tamagra amu'no tamifinti keso'e hutma 7ni'a vahema zamu'zmamo knare'ma hu'nesnia vahe'ma, Avamu'ene knare antahi'zamo'ma avitenesia vahe zamazeri otinke'za, esageta tagra ama erizana refako huta zamazampi antesune. ⁴Hu'neanagi tagratia nunamu hu'zante'ene, Anumzamofa naneke'a huama huta veamofona zamasmita maka knafina vugahune. ⁵Ana mika vahe kevumokizmia zamesige'za, ana hugahune nehu'za, ana 70ti'a vahe hampri'naze, mago ne'ma hampona amentintine ne' Ruotge Avamu'mo agu'afima avite'nea nera Stiveni huhampri'za Filipinki Prokulusinki Nikenanki Taimoninki Pamenasima, mago Antioku ne' Nikolasi'a megia nagapinti ne'mo agu'a akrehe huno Jiu monopi amentinti nehia ne' huhampri'za zamaretru hu'naze. ⁶Ana hute'za ana vene'ne zga zamare'za aposol nagate vazage'za zamaza ante'za, nunamu huzmante'naze.

⁷Anumzamofa kemo'a mago'ane ra huno nevigeno, amagemata nentaza disaipol nagamo'za Jerusalemi kumapina rama'a efore nehageno, ra'ma'a Jiu prisi vahe'mo'za zamentinti hu'za ke amage'anteme vu'naze.

Stiveni azeri'naza naneke

⁸Ana higeno, Stivenina Anumzamofa asunkuzamo'ene hihamumo avite'negeno, tusi'a kaguva zane, avame'zanena vahe'mokizmi amunompi erifore hu'ne. ⁹Hianagi mago'a vene'nezga, Hibru osi mono nona (Sinagog) vahe zamazeri atre monore nehazafinti Sairini kumate'ene Aleksandria kumate'ene, mago'a Silisiane, Esia rankuma'mo kegva hu'nefinti (provins) vahe'mo'za oti'za Stiveni keha rente'naze. ¹⁰Hianagi Stiveni'ma knare Avamupine, knare antahizampine kema hiazamofona, zamagra magore hu'za kea osu'naze. ¹¹Anante zamagra oku'a mago'a vahera anage hiho hu'za zamasm'i'naze; Tagra nentahunkeno Mosesene, Anumzanena zanazeri havizahu kea hu'ne hutma hiho hu'naze. ¹²Ana

kema hazazamo vahera zamarimpa zamazeri otigeza, ranra vahe'mo'zane kasere ugagota hunaza vahe'mo'zanena oti'za Stivenina eme avazu hu'za kanisol (Senhitren) vahe zamure vu'naze. ¹³Zamagra pusante havigema hunte vahe zamaretageno, ana vahe'mo'za hu'za ama ne'mo'a, ontagneno Mosesese kasegegu'ene, ra mono nonku enena huhaviza hunte'ne hu'za hu'naze. ¹⁴Na'ankure tagra nentahunkeno ama nemo'a amanage huno hu'ne, Nazareti Jisasi'a eri haviza ruotge mono nona nehuno, Mosesi'ma tami'nea avu'ava'zana, eriatreno kahefa avu'ava eri fore hunaku nehie. ¹⁵Anankema huntaza fakohu'za kenaku nehu'za ana mika kva vahe'mo'za avugosafima kazana, avugosamo'a ankeri vahe'mofo avugosamo msa hiaza hige'za ke'naze.

Stiveni hu'nea naneke

7 ¹Ugagota prisi ne'mo'a Stiveniga, amama hunegantaza kemo'a tamagefi? ²Higeno Stiveni'a huno, nafuhetane nafaheta mika'motma nagri kea antahiho, nerageho Abrahamu'a, Mesapotamia mani'negeni, Msanentake Anumzamo'a avure ehanati'tegeni henka'a atreno Harania umani'negeni, ³Anumzamo'a amanage huno asami'ne, **Vaheka'ane mopaka'anena atrenka, kaveri hanua mopare vuo.** (Jen-Agf 12:1)

⁴Anante Kaldia mopa atreno, Harani kumate umani'ne. Anante Abrahamu nefa frigeno, Anumzamo'a huntegeni amama menima mani'nana mopare e'ne.

⁵Anumzamo'a mago mopa manisana zane huno Abrahamuna omi'ne, mago osi atupa'e huno refako huomi'ne. Mofavrea onte'tfa hunananagi Anumzamo'a huvempa hu'ne, ana hu'neanagi Nagra kagri'ene mofavre zgaka'a henka zamigahue huno hu'ne. ⁶Hianagi Anumzamo'a amanahu ke huno Abrahamuna asami'ne, **Kagehe'za ru vahe mopafi, mopazmi omne vahe umanigahaze. 400 ti'a zgegfu'mofo agu'afina, mopa agafa vahe'mo'za kazokzo eri'za vahe zamavrente'za, kva huso'e huozmantegahaze.** ⁷Hianagi Nagrani'a kazokzo eri'za zamisaza mopare vahera, nona'a zamazeri haviza huzmantegahue, huno Anumzamo'a hu'ne. **Anama hute'za henka zamagra atre'za e'za ama mopare Nagrira eme nagi hanta vazigahaze.** (Jen-Agf 15:13-14)

⁸Anumzamo'a Abrahamu'ene huvempa hagerafikea huno oku avufama tagahu naneke hutegeni, Abrahamu'a, Aisakina nefaza higeno 8'a zgegnama nemaniana, oku avufa taga hu'naze. Aisaki'a Jekopu nefaza higeno, Jekopua 12fu'a tagehemofona nezmafa mani'ne. (Jen-Agf 17:10-14)

⁹Ana tagehe'mo'za Josefena kanive rente'za mizante atrage'za ru vahe'mo'za avare'za Isipi vu'naze. Ana hu'nazanagi Anumzamo'a agrane mani'neni, ¹⁰knama nemizageno'a aza nehuno, knare avu'vazane, antahizana Josefena amigeno, Isipi kini ne'mofo Fero avurera knare

higeno, Fero'a huntengeno ugagota kva Isipia hu'nenno, noma'afima me'neazane nemanian vahetera anazanke huno kegva hu'ne. ¹¹ Anante Isipi mopare'ene Kenani moparera ne'zana fanane higeno, vahe'mo'za tusi'a zamagate'zampi mani'zage'za, tagehe'za mago kavera hakare'za eri fore osu'naze. ¹² Hianagi ne'zana Isipi me'ne kema Jekopu'a nentahino'a, tagehemofona esete ne'za omerihogu huzmantege'za vu'naze. ¹³ Anante'ma mago'ane (second time) vazageno'a, Josefe'ne huno agra'agu huama higeno, Fero'a, Josefe afuhe'za e'naza kea antahi'ne. ¹⁴ Anantera Josefe'a ke naneke atrenteno nefa Jekopunku ene ana miko tuzgarazga'agura nagritega eho huno hu'ne, ana mika'a 75fu'e. ¹⁵ Hanki Jekopu'a Isipi umani'nenno, anantega agrane tagehezanena fri'naze. ¹⁶ Anantegatira zaferina'a eri'za Sekemu vazazamo'za, Abrahamuma zagoma atreno Hamori mofavre nagapinti'ma mago'a zagoreti'ma mizama asente'nea kerigampi Sekamu ome asente'naze. (Jen-Agf 50:13)

¹⁷ Hu'neanagi, Anumzamo'ma, Abrahamuma huvempama hunte'nea knamo'a kofta huno eku nehigeno, Isipima tagri vahe'ma mani'naza vahe'mo'za tusi vahe krerfa fore hu'naze. ¹⁸ Henka Josefema antahino keno osu'nea kini ne' Isipi fore huno kegva hu'ne. ¹⁹ Ana kinimo'a vahetia rezmatga nehuno, tagehe'ina havi avu'ava hunezmanteno kasefa mofavrema ksentenazana megia zamatrenke'za friho huno huhanavetine. (Ekso-Uti 1:8–2:15) ²⁰ Anama hianknafi Mosesena ksentengeno Anumzamofu avurera hentofa mofavre fore huteno, 3'a ikamofu agu'afina nefa nompia manitegeno, ²¹ henka avare'za megia ometrageno, Fero mofamo'a avareno agri'a mofavregna huno kegva hu'ne. ²² Mosesa Isipi vahe'mofu antahi'zana rempi huno maka eriteno, kema hu'zampine, avu'ava'zama'afina hankave nentake ne' fore huno mani'ne.

²³ Hu'neanagi 40ti'a zagegafu huku'ma nehuno'a nafuhe, Israeli vahera nantu antezmante nagesahie huno antahi'ne. ²⁴ Mosesa nevuno keana Isipi ne'mo, Israeli kazokzo eri'za nera nehegeno negeno, Israeli ne'mofu ahoke heno Isipi nera ahe fri'ne. ²⁵ Mosesa antahiana agri vahe'mo'za antahi ama hu'za, nagripi huvazino Anumzamo'a huntengeno tagrira tahokeheno tavarenaku e'ne hu'za hugahaze huno antahine, hianagi zamagra Mosesena antahi omi'naze. ²⁶ Umaseno nanterana Mosesa nevuno keana, tare Israeli ne'tremoke ha' nehakeno, zanarimpa zanazeri fru hunaku, agra amu'nozni'ni vuno znazeri atrenaku nehuno anage hu'ne, Ama ve rarena, tanagra kogna mani'na'e. Nahigeta hara neha'e? ²⁷ Magomo'ma haviza huno ahe frinaku nehimo'a, Mosesena retufe kanti netreno anage hu'ne, ***aza kva mani'nenka tagrira refako hurantegahane?*** ²⁸ ***Kagra okima Isipi ne'ma hae fri'nananankna hunka nagrira nahe frinaku nehampi?*** (Ekso-Uti 2:14) ²⁹ Ana kema hia Mosesa nentahino, Isipia atreno viazamo, Midieni mopare anantega rurega vahe umani'ne. Mosesa ma Midienima umani'nenno'a, tare ne'mofavre kseznante'ne.

³⁰Foti'a zgegfuma agateregeno mago ankeromo hagage kokampi Sainai agonamoyo agiafi osi zafafi teve srasra huno nerefi fore humi'ne. ³¹Mosesema anazama negeno'a, naza fore nehieha nehuno kenakuma etvaoma higeno'a, Ra Anumzamo keza tino, ³²***Nagra kagri kagehei Anumzane, Abrahamuma Aisakima Jekopu Anumzane,*** huno higeno, Mosesena, tusi ahirahitegeno avuge'zankura tusi agogogu nehuno uravao osu'ne. ³³Higeno Anumzamo'a Mosesena anage huno asami'ne, ***Kagia nona, kagaretira zafitro, na'ankure e'ima otinana mopa, Ruotge hu'nea mopare oti'nane.*** ³⁴***Vahe'nima Isipima manine'za knama e'neriza zana tamage hu'na Nagra ke'noe, zamata hozama zamizage'za krafa kema nehazana Nagra nentahina zamaza hunaku menina erami'noe. Menina kagra eno, hugantesugenka, etenka Isipi vugahane.***

³⁵E'ima ana Mosesima zamesra hunente'za, anagema hu'za, ***Iza kagrira kva mani'nenka vahera refko huo*** huno huntene mofo, e'i ana nera Anumzamo'a hunteno, kva ne' mani'nenka, zamazahu ne' manio huno Anumzamoyo ankeromoyo azampi osi zafafinti efore huno hunte'ne, ³⁶Ana ne'mo zamavreno nevuno Isipi mopare ene koranke hagerinte'ene ka'ma hagege mopafina kaguvazane avame'zana 40ti'a zgegfufina huzmeri hu'ne. ³⁷Ama ana Mosesi, Israeli vahe'z gagura huno, Anumzamo'a kasnampa vahe'tmia tmagri'pintira nagrima hiaza huno azeri otigahie. ³⁸E'i ana ne'mo, vahe kevumokizmi amu'nompima ka'ma mopafi mani'negeno ankeromo Sinae agonafima tagri tagehemokizmi, Anumzamo kea huntene go asimu erino mani naneke erino'ma eme tmi'nea nere. ³⁹Tagri tagehe'za ke'a antahizanku zamefi hunemi'za, retufeganti netre'za, zamagu'afina Isipigura tusi zamagesa antahi'naze. ⁴⁰Eronina amanage hu'za asmi'naze, ***Kagotama hurantesia anumza'tmina tro huranto, na'ankure ama ana Mosesema Isipi mopareti tvarenoma e'nea nera na'a fore humi'nefi tagra antahita keta osu'none hu'naze.*** ⁴¹Hige'za ana knafina kolire havi anumzana bulimaka anenta kna huza tro hu'za, kre sramna avuga vunente'za anama zamazanuma troma hazazankura muse hunte'naze. (Ekso-Uti 32:1-10) ⁴²Hu'neanagi Anumzamo'a amagena huzmantege'za, zamagra havi anumzantema zagerema, ofunte'ma ikante monora hunte'naze, ko'ma kasnampa vahe'moma krente'neana ***tamagra Israeli vahe'mota ka'ma kokampima kre sramna vu'nazana foti'a zage kafufima Israeli vahemota Nagrite kre sramna vu'nafi? A'o. Nagrite kre sramna ovu'naze.*** ⁴³***Tamagra Moleki havi seli mono no erita magoka ne-eta, Rafani havi anumzamoyo ofu eritma ne-etma, havi anumzamoyo amema'a mono huntenuku tro hu'naze. Ana hu'negu ama mopafintira tamazeri atranenketma Babilon umanigahaze.*** (Emo 5:25-27)

⁴⁴***Tagri neragehoza seli mono no zamia eri'za magoka ka'ma kopi vu'naze. Anumzamo'ma Mosesi asamino e'inahu hunka tro huo huno***

hunte'nea kante ante'za, anahu kna hu'za trohu fatgo hu'naze. (Ekso-Uti 25:9) ⁴⁵Henka tagehe'za ana seli mono nona e'neriza, zamagra ana mopafi Josua'ene naga'amo'zanena megia' vahe'mofo mopafi ha'hu'za eri'za mani'neza, seli mono nona kiza mani'nageno henka Deviti kna e'ne. ⁴⁶Anumzamofa avesi zamo'a Devitinte megeno, Anumzamoka natregena ra mono nonka'a kineno huno antahige'ne, Jekopu Anumzamoma manisia no kinaku hu'ne. ⁴⁷Hu'neanagi Solomoni'a Agri ra mono nona kinte'ne. (1 Kin 6:1) ⁴⁸Hu'neanagi, Mareri Agatere'nea Anumzamoma vahe'mo azanteti kinte nompina omanigahie huno, Kasnampa ne'mo hunte'ne, ⁴⁹***Mona kumara trani'e, Mopa nagiamofa trare, inankna no Nagrira kinantegahaze? huno Ramo'a hu'ne.*** ⁵⁰***Mika'zana monafine mopafinena Nagrake tro hu'noe.*** (Aisa 66:1-2)

⁵¹Tamagra ke ontahi vahe mani'nageno tamaguamo ene tamagesamo'a tamage kemofona ifo nehie! Tamagra Ruotge Avamumofona tamagehemoma hu'nea kna hutma maka kna tmefi hunemize!
⁵²Kasnampa vahepintira ina'na vahe tamagehe'za zamahe ofri'naze? Fatgoma Hu'nemo'ma esia zamofoma ko'ma huama'ma hu'naza vahera, zamagra zamahe fri'nazanki, tamagratmi menina komoru huta zamahe fri vahe fore nehaze. ⁵³Korapara Anumzamoma kasege'a ankeromokizmi zamazampi antege'za, eri'za eme tamasmigetma antahi'nazana, ana naneke tamagra amagera ontetma kea rutagare'naze.

Have knonu Stiveni ahe'naza naneke

⁵⁴Ana kema Jiu kva vahe'mo'za nentahi'za, tusi zamasi vazige'za zame'anikreki hu'naze. ⁵⁵Hianagi Stivenina Ruotge Avamumo agu'afi efregeno, kefatgo hunagamuteno monafinka Anumzamofa msa'zana negeno, Jisasi'a Anumzamofa azantamaga kaziga'a oti'negeno ke'ne. ⁵⁶Nehuno agra anage hu'ne, Keho Monamo'a anagige'na negogeno, Vahe'mofo mofavremo'a Anumzamofa azantmaga'a oti'negena negoe. ⁵⁷Hianagi, zamagra tusi'za hu'za rankege nehu'za, zamagesa rekani nere'za, magoka zamagare'za Stivenina ome azeri'naze. ⁵⁸Rankumapinti retufe'za megiamo ete'za, agafa hu'za have knonu ahe'naze. Ana nehazage'za, havige hunteza huama hanigeta antahi sune hu'naza vahe'mo'za amega nakreku'zamia hate'za mago nehazavea, Soli'e nehaza ne'mofo agafi eme ante'naze, (Apo 6:13) ⁵⁹Stivenima have knonu nehageno'a, Ramofa agi aheno amanage hu'ne, Ramoka Jisasige, avamuni'a erio! ⁶⁰Anage huteno rena reno ranke huno amanage hu'ne, Ramoka kumi'zami'a aze'orinka atrezmanto, huno nehuno fri'ne.

Soli'a mono vahe zamazeri haviza hu'nea naneke

8 ¹Stiveni'ma ahe friza zankura Solina rimpamo'a so'e hu'ne.
 Jerusale kumapina mono vahe'ma zamahe'zamo'a tusiza huno ana

knarera avitege'za, maka vahe zgamo'za panini hu'za fre'za Judia kaziga nevezage'za, Samaria kaziga nevezage'za aposol vahe'age mani'naze. ²Knare hu'za fatgoma hu'naza vahe'amo'za Stiveni asenente'za, tusi zamasunku hu'za zavike agriku hu'naze. ³Hianagi Soli'a, mono vahe zamazeri haviza nehuno, mago'mago nompina vuno eno huno vene'nene, a'nene zamazuhu zmavazu hu meg'i nezmatreno zamavreno kina ome huzmante'ne.

Filipi'a Sameria kaziga Jisasi agenke ome huama hu'nea naneke

⁴Anante e'ima zamahe pananima hige'za fre'naza vahe'mo'za, maka kumate kumate vutere hu'za mono kea hu'naze. ⁵Filipi'a, Sameria rankumate viazamo, Kraisinku zamagrite huama ome hu'ne. ⁶Filipi'ma hia nanekema tusi'a vahe'mo'za nentahiza, avame'zama hiazante'ma nege'za nentahiza, magoke antahintahire mika vahe krerafamo'za zamagesa ante'za antahi'naze. ⁷Na'ankure havi avamu'tamima zamagu'afima mani'naza vahe'pintira, havi avamutmimo'a tusi'a kezati'za krafa nehu'za atirami'naze. Hagi mika zamufa fri'nea vahe'ene, kama vano nosaza vahera kri zamimo'a knare huzmante'ne. ⁸Higeno ana rankumapina tusi'a museza fore hu'ne.

⁹Ana rankumatera, Saimoni'e nehaza ne'mo, afa' vahe'mofo avu'ava'za eri fore huvava nehia nera mani'neakino, Sameria vahera huzamerige'za tusi'a zamagogogu nehu'za antri nehageno, agra ra ne' mani'noe huno hu'ne. ¹⁰Ositetima vuno rante'ma vu'nea vahe'mo'za, ke'ankere'za nege'za ana mika vahe'mo'za agri ke nentahi'za anage hu'naze, Ama nera, Ra Anumzamomo hanavegino, tusi'a hanave hu'za hu'naze. ¹¹Hige'za agri ke'are antahi'za amage hu'naze. Na'ankure agrama zaza knafi havige nehuno, zagoreno eri fore hu'neazanku ana hu'naze. ¹²Ana hu'nazanagi Anumzamomo kumamomo avu'avaku'ene, Jisas Kraisi agire knare musenkema Filipi huama nehige'za zamentintima nehu'za, vene'nene, a'nemo'zanena erigafa hu'za monoti fre'naze. ¹³Saimoni'enena amentinti nehuno henka mono tina nefreno eteno ovu'are Filipi'ene mani'ne. Hagi mika ruzahu zane ra avame'zama hiaza fore higeno negeno tusi agogogu nehuno antri hu'ne.

¹⁴Jerusale mani'naza aposol vahe'mo'za antahizama Samaria vahe'mo'za Anumzamomo naneke erize kema nentahi'za, Pitane Joni kizni huznante'naze. ¹⁵Zanagrama uramina'ana nunamu huzmante'sake'za Ruotge Avamu'ma erisnagu urami'na'e. ¹⁶Na'ankure mago mago'mofontera Ruotge Avamumo ome'nege'za, ko Ramofo Jisasi agire mono tinke fre'naze. ¹⁷Anante Pita'ene Jonikea agafa huke zanzama ana Sameria vahe'mokizmi zamufare antake'za Ruotge Avamura eri'naze. ¹⁸Hianagi Saimoni'ma kegeno Aposol vahe tfamo'zama zamazatfama antaza zante'ma Ruotge Avamu'ma zamigeno'a, agra zagoma zanamikema

nehuno'a, ¹⁹anage hu'ne, amana hanave'a nagri'enena nami'nenkena ina vahe'tema nazama antesugeza anahu'za Ruotge Avamura eriho. ²⁰Hianagi Pita'a, agrikura anage hu'ne, zago ka'ane kagranena haviza hugahie. Na'ankure kagrama kagesama antahinana zagoreti Anumzamofu muse'zana miza hugahue hunka nehane. ²¹Kagrira ama erizampina mago erizanka'a omanetfa hu'ne. Na'ankure Anumzamofu avurera, tumoka'amo'a knarera osu'tfa hu'ne. ²²E'i zanku kefo kavukva zanka'a neterenka, kagu'a rukarehe hunka havizama nehana zana atrenka, Ramofonte nunamu nehugeno, kagu'amo'a knarema hanigeno'a kumi ka'a atregantegahie. ²³Na'ankure nagrama navuma kagoana, kagra kanive nerenka, kumi'mo kagina hugantengenka mani'nane, huno Pita'a higeno, ²⁴Saimoni'a ke nona anage hu'ne, nagrikura, tanagra Ramofontega nunamuna hikeno, kema hu'na'a zamo'a nagriteru ometfa hino hu'ne. ²⁵Anante'ma Pita'ene Jonikema hamponatine, Ramofu nanekema huama'ma hutekea, ete Jerusale vunaku nevuke, Sameria vahe'mokizmi nonkumapi mono naneke hume vuna'e.

Filipi'a Itiopia rankva ne'mofu Jisasi nanekea asami'nea naneke

²⁶Anante mago Ramofu ankeromu Filipina asamino, Sameriatira otinka Jerusale kaziga Gaza urami'nea kantega kavugosa huntenska vuo. E'i, hagage ka'ma kopi vuo huno asamigeno, ²⁷nevigeno magora agonkna'za hari'nea Itiopia nera, kantesi'e nehaza Itiopia kuini a'mofu zagore kegavama hu'nea ne'mo, Jerusale mono eme huteno eteno kuma'arega nevigeno, ²⁸hosimo renteno avazu huno vano nehia karisifi manino nevuno, kasnampa ne' Aisaia krente'nea avontafera hamprime nevigeno, ²⁹Avamumo'a Filipina asami'no, vunka antuma hosimo renteno avazuma hu'nea karisire urava'o huo higeno, ³⁰Filipi'a agiarenu agrite viazamo ome antahiana, Aisaia kasnampa ne'mofu naneke nehamprigeno nentahino, amama nehamprina nanekea, kagra antahiana nehano? Huno antahige'geno, ³¹Agra huno mago'mo'ma huonasamisigena, inankna hu'na antahi amara hugahue? Nehuno Filipina ke higeno umarerino agrane umani'ne. ³²Ana ne'mo'ma hampri'nea avontafemo'a, amanahu ke hu'ne, *Sipisipi afu'ma ananke taga hunaku avare'za nevazankna hu'za nevu'za, sipisipi afu anenta azoka taga hunaku nehazageno, agira aka huno krafa osu'nea kna huno, Agra agira aka osu'ne.* ³³*Agri azeri agaze hu'za knare fatgo zamuzmara huonte'naze. Na'ankure ko'ma Agri asimura ama mopafintira eri'nazana, nankna huno Agra mofavre antegahie?* (Aisa 53:7-8) ³⁴Anante ke'nonama hifina, agonkna'zama hari'nea ne'mo'a anage huno, Filipinkura hu'ne, muse hugantoanki (plis) azanku kasnampa ne'mo'a ama kea hu'ne, agri'agu hu'nefi, hipi ruga'a vaheku hu'ne? ³⁵Filipi'a anama hampri'nea avontafepinti nanekea agafa huno, Jisasi knare musenka ana nera asmi'ne. ³⁶Anama hu'za

karankama nevu'za mago'a ti me'nere ageno, agonkna'zama hari'nea ne'mo'a, Keho! Ti me'neaki! Na'amo mono tima frezanifina nazerigahie? huno nehigeno, ³⁷[Filipi amanage huno hu'ne, tamage hunka maka kagu'areti Jisasinku kmentinti hanunka tina fregahane nehigeno ozo hu'ne. Anumzamofono nemofo Jisasi Kraisi'a mani'ne, hu'na nentahue, huno hu'ne,]^b ³⁸ana hosimo renteno avazu nehia karisia ana ne'mo kehigeno azerigeno, anantarega'moke uramike tinte vuke, Filipi'a agonkna'za hari'nea nera mono tina tigua repanogino frente'ne. ³⁹Anama huteke timpinti'ma megi'a akeno'a, Ramofo Avamumo Filipina avaresga huno vigeno, agonkna'zama hari'nea ne'mo'a mago'ane nonkeno, tusi muse hume karanka vu'ne. ⁴⁰Hianagi Filipi'a Azotasi kumate mani'nenonankna hu'na e'noeha huno agra'a keno erifore hu'ne. Ana kazigama nevuno'a mika ranra kumatera mono kea hutere hume nevuno Sisaria kumate uhanati'ne.

Soli agu'a rukarehe hu'nea naneke

9 ¹Ana knafinke Soli'a ana zanke huno Ramofo amage' nentaza disaipol nagara zamahe frinaku tusi asi nevazigeno, rimpa henezmanteno, ugota prisi nete vuno, ²ome antahigegenomago'a avona kremigeno erino Damaskasi vuno atruma nehu'za mono nehazanontamimpi (sinagogs) marerino huama huno, agrama veo, aro Kraisti amage' nentaza vahe'ma zamagesuno'a, kina rezmanteno etenozamareno Jerusale vugahie huno kre'ne. ³Agrama vuno Damaskasi urava'o nehigeno'a, ame huno monafinkati hanavenentake tavi'mo agrite remsa huntogeno, ⁴traka huno mopafima nemseno'a, agrama mago kezankema antahi'nea kemo'a anage hu'ne, Sol! Sol! Na'a higenka Nagrira kna nenamine? ⁵Higeno kenona'a, Ramoka, Kagra izage? huno higeno, Agra huno, Nagra Jisasine, kagrama knama nenamina Nere. ⁶Hu'neanagi otinka ana kumapi ufrenka vuge'za, kagrama nankna'zama hanana zamofono kea kasmigahaze. ⁷Soli enema nevaza vene'nemo'za kea osu'za oti'za mani'ne'za, kema hia agerura antahi'nazanagi, mago vahera onke'naze. ⁸Soli'a mopafinti otigeno, avumo'a hari hu'neanagi, mago'zana onke'ne. Magoka vu'naza vahe'mo'za azante avazu hu'za Damaskasia avare'za ufare'naze. ⁹Taregi magoki zagene haninena, avua onkenone'zane, ti'nena oneno amane mani'ne.

¹⁰Magora Jisasi amage' nentea nera, Ananaiasi'e nehaza ne'mo Damaskasi kumatera mani'nenono, avana keankna huno negegeno, Ramo'a anage huno asami'ne, Ananaisi'o! Higeno ke nona hunteno, ama mani'noe Ramoka. ¹¹Anante Ramo'a asamino, otinka fatgoe nehaza

^b ³⁷ Mago'a antahintahi krerfane vahemo'za zamagesama antahi'zana, ese avontafepina teti sevenifima me'nea kea omnene hu'za onkre'naze.

kuma kampi vunka, Judasi nonte vunka, Terasiti nera, Soli'e nehaza neku ome zamantahigo, na'ankure menina manino nunamu huvava nehie. ¹²Ana nehigeno Soli'ma ava'nagna'zama kefina, Ananaisi'ema nehaza ne'mo efrea zamo avuma kesigura azanteno nunamu hunentegeno, ana avanagnazampina ke'ne. ¹³Hianagi Ananaisi'a ke'nona'a huno, Ra Anumzamoka nagra rama'a vahepinti, nama'a vahe krerafama Kagrite'ma zamentintima nehaza vahe'ma Jerusale kumapima mani'naza zamahe'neana ana ne'mofo agenkea nagra antahi'noe. ¹⁴Nehuno ama kumapi eno, ugagota kva (hai pris) vahe'mo'za hugnare huntageno, iza'o Kagri kagima ahesaza vahera zamareno kina huzamante kva agi eri'ne. ¹⁵Hianagi Ramo'a anage huno agrira asami'ne, Vuo, na'ankure agrira ko huhampri ante'noakino, Nagri eri'za ne' manigahie. Hagi Nagri nagi nagenkea erino megia' vahete'ene, kini vahete'ene, Israeli vahetera vugahie. ¹⁶Na'ankure nama'a kna'zama Nagri nagire'ma eri'sia zana, Nagra averi hugahue. ¹⁷Huno higeno, Ananaisi otino mani'nea nonte vuno, azama omenteno nunamuma hunteteno anage huno asami'ne, nenafu Soliga, kantegama neankenno, Ra Jisasi'ma kagrite efore'ma hu'nemo, kagrama etenka kavu negenka, Ruotge Avamura eri avitesane huno hunantege'na nagra e'noe. ¹⁸Anagemo nehigeno'a, ame huno avuragafinti irikna'zamo knope ramigeno, avua eteno negeno otino mono ti fre'ne. ¹⁹Hagi anante ne'za neno hanavema e'nerino'a, Jisasi'ma amage' nentaza disaipol naga'ene Damaskas mago'a kna mani'ne. ²⁰Ame huno, ana zupage Jisasi agigenkea osi mono nomp marerino, ama Nera Anumzamomo Mofavre huno huama huno zamasm'i'ne. ²¹Hige'za maka antahiza vahe'mo'za tusiza hu'za antri nehu'za, anage hu'naze, Ama'na nera Jerusalema mani'nenno, Jisasi agire'ma zamazeri havizama nehia nero? Menina eno Jisasi agima huama nehaza vahera kina huzamanteno zamareno ugotra ra mono (hetprisi) kva vahete vunaku ne-eo? Hu'naze. ²²Hianagi Soli'a, antahintahi'afina hageno nevuno Jisasi'ema nehaza nera tazahu ne' Kraisi'e huno eri ama huno tusiza huno hanavetino nehigeno, ana kema Damaskasima mani'naza Jiu vahe'mo'za, nentahiza inankna huta nanekea huntetene ha hu'za kea osu'naze. ²³Mago'a knama evutege'za, Jiu vahe'mo'za komoru hu'za Solina ahenaku hu'naze. ²⁴Hu'nazanagi ana komoru hu'naza kemo'a Soli agesafi efre'ne. Zgene haninena ahe fri'snagu zamurga ra vihu kafante ke ankerete'za mani'naze. ²⁵Hu'nazanagi, Polima amage'nentaza disaipol nagamo'za kerage'afi avare'za eka eka kupi antete'za, kumamomo vihu keginamomo megia' kankamumpi nofi rentete'za mago kaziga avazu nehu'za atrageno urami'ne.

Soli'a Jerusale kumate ete vu'nea naneke

²⁶Jerusale ema nehanatino'a, Jisasi amage nentaza disaipol nagapi hagerafigahue huno hianagi, agrikura tusi kore nehu'za agra Jisasi

amage' nentea nere hu'za maka'mo'za antahi'za zamifina ontahi'naze. ²⁷Hianagi Banabasi'a, Solina avareno aposol nagate viazamo, Jisasima kampi kegeno keaga humi'neazane, Damaskas mani'nenno hanavetino'ma Jisasi agifima keaga hu'neazanku ene, agigenke'a hu'ama huno aposol vahera zamasmine. ²⁸Ana huteno Soli'a zamagrane mani'nenno, Jerusalemia fru huno vuno eno huno, Jisasi agigura korera osuno hanavetino keaga huama hu'ne. ²⁹Agra keaga nehuno, Griki kema nehaza Jiu vahe'enen, keha hu'nazanagi, zamagra ahe frisnaza kanku hakare'naze. ³⁰Hige'za mono afuhe'za anankema nentahi'za, avare'za Sisaria urami'za ometrageno Tasisi vu'ne.

³¹Anante Judia kazigane Galili kazigane Sameriana nemaniza mono vahe'mo'za, hagera hu'za nevu'za zamarimpa fru hu'za nemani'za, Anumzamofonku kore hunentageno, Ruotge Avamu'mo zamazeri hanavenetige'za, rama'a mono vahe fore hu'naze.

Pita'a Ainiasi azeri oti'nea naneke

³²Pita'a mago'a kumate kagino vano vano huteno, agra Lida kumate mani'naza (saints) mono nagatega erami'ne. ³³Anampina mago nera Ainiasi'e nehaza ne' 8ti'a zgefufumofu agu'afi avufa fri kri erino sipa'a atreno novia ne' keno erifore huteno, ³⁴Pita'a anage huno asami'ne, Ainiasiga, Jisas Kraisi'a krika'a kazeri so'e huganteanki, otinka tafeka'a atrenka vuo, higeno anante ame huno oti'ne. ³⁵Ana hige'za ana mika Lidane, Saroni kumate ene mani'namo'za agri nege'za, Ra Anumzamofonte zamagu'a rukarehe hu'naze.

³⁶Jopa kumatera Jisasi amage nentea a'mofu agi'a Tavita'e. Ana a'mofu agima (Griki kefi eri rukarehe'ma hazana Dokasi'e hu'naze. Ama ana agimofu agafa'a, dia afure hu'ne) agripina knare eri'zamo avite'negeno upa'ma nehu'za zamasunku zampima nemaniza naga miko zupa zamaza hu'ne. ³⁷Anankafina kri erino fri'geno, avufama tinu sesema huntete'za eri'za vazazamo'za, anaga nomofu hunaragintepinka ome ante'naze.

³⁸Jopa kumamo'a Lida kuma tva'onte me'ne, Pita'a anantega Lida kumate mani'ne hianke nentahiza, Jisasi amage nentaza disaipol nagamo'za tare ne'tre huznantageke, vuke hamp'o'nage huke, Tagriku tavega ontenka muse hugantonaki (plis) ko eno huke ome asami'na'e. ³⁹Anankema asamikeno nentahino'a, Pita'a otino zanagrane vu'ne. Uma hanatige'za, avare'za anaga agofetu nomofu hunaragintepinka vu'naze. Miko kento a'nemo'za agrane oti'ne'za, zavira nete'za Dokasi'ma zamagranema ofri mani'nenno tro hu'nea zanra kukenarami'ne, ruga'a kukenane averi'naze. ⁴⁰Hianagi Pita'a ana mika vahera megia hunezmanteno, rena reno nunamu hu'ne. Huteno fri vahe kerafarega rukarehe huno, Tabitaga otio! Higeno avua hari huno, Pitana negeno oti'ne. ⁴¹Nehuno Pita'a aza antegantuteno azeri oti'ne. Anama nehuno

zamentintima nehaza naga'ene, kento a'ne nagara kehuno asimu erie huno avazu huno eme zami'ne. ⁴²Anama hia nanekemo'a Jopa kokampina zamukino vuno eno higeno, rama'a vahe krerfamo'za Ra Anumzamofonte zamentinti hu'naze. ⁴³Pita'a mago'a zaza kna, afu akuruteti hanave'zantami tro nehia ne' Saimoni'ene Jopa mani'ne.

Pita'a, Koniliasi ome kenaku vu'nea naneke

10 ¹Sisaria kumatera mago nera Koniliasi'e nehaza ne'mo, Italie hu'za nehaza 100ti'a Roma Sondia vahete ugagota kva nera, ²megi'a nagapinti monoku aghesa nentahino, noma'afi nemaniza naga'ane, Anumzamofu kore hunenteno, zamunte omane vahera ne'zane, kukena muse huno nezamino, Anumzantega nunamuna huvava nehia nere. ³Mago kinaga ferura 3 kilokinaza higeno, agra kefatgo huno ava'nagna'za kegeno, Anumzamofu ankeromo efreno anage hu'ne, Koniliasio! higeno, ⁴tusi kore huno uruha negeno anage hu'ne, Ramoka, na'ahie. Higeno agra anage huno asami'ne, nunamu ka'ane, zamunte omane vahe'ma zamaza nehana kavukvara Anumzamo'a ko antahino keno hu'ne. ⁵Menina mago'a vahera huzamantega'za Saimoni'e nehu'za, mago agi'a Pita'e hu'za nehaza netega Jopa vu'za ome kehinkeno eno. ⁶Mago nera Saimoni'e hu'za nehaza nera, afu akuruteti hanave'za tro nehia ne'mo, hageri ankenare noma'a me'nefi anampi Pita'a mani'ne. ⁷Kema humia ankeroma atreno vigeno, agrite eri'za erinenta'a netre'ne, mago sondia ne'mo monoku aghesa antahintahi nehuno agri tvaonte nemni'a ne' ene kehige'za e'naze. ⁸Mika kema zamasmitemo huzmantega'za, Jopa vu'naze.

⁹Anante kna zupa kantega vu'za ranku'ma tvaonte'ma vzageno'a zgemo'ma feru asegeno, Pita'a no agofetu nunamu hunaku mareri'ne. ¹⁰Huteno aga'zamo higeno ne'za nenaku nehige'za ne'zama retroma nehazageno'a, avu evuevu higeno nemaseno ava'na keankna huno, ¹¹kegeno monamo'a hagaru higeno, mago'zana, tusi'a tavarave'gnaza 4'a atupare atupare azerino mopafi atrageno erami'ne. ¹²Anampina ruzahu ruzahu 4'a agazane zgarmi'ne, ama mopafi zge havu nehia zgane, zahopi hareno vono nehia nama zgagi hu'za mani'naze. ¹³Anama higeno'a mago ageru'mo agrite eno Pitaga, otinka ahenka no! ¹⁴Anage hianagi Pita'a huno i'o Ramoka, na'ankure nagra magore hu'na onetfa hu'noe. Vahe'mo'zama nonaza kfane, avusese osuno ruotage osu'nea zgagfa onegahue. ¹⁵Higeno mago'ene eteno ana ageru'mo agrite eno, ina kna'zama Anumzamo'ma azeri avusese hu'nesia zankura, avusese osu'ne hunka osuo. ¹⁶Anahu'zana 3'a zupa fore hutegeno, anazana ame huno erino monafinka mreri'ne.

¹⁷Pita'a agu'afi nentahino, nazafore hige'na koeha huno aghesa omeantahi emeantahi nehigeno, Koniliasi'ma huzmantega'za aza nagamo'za Saimoni nonku zamantahigeke hu'za, kagina kafante eme oti'ne'za, ¹⁸kezati'za

Saimoniku mago'agi'a Pita'ema hu'za nehaza agine nera amifina mani'neo hu'za zamantahige'naze. ¹⁹Ava'na kna'zama ke'nea zanku Pita'a a gesa nentahigeno, Avamu'mo asami'no, Ko, 3'a nagamo'za kagriku nehakaze. ²⁰Hianagi kagesa ontahinka otinka uraminka zamagrane vuo, na'ankure Nagra hu'z mantoge'za e'naze. ²¹Pita'a ana nagate uramino anage huno zamasmine, antahiho, ama nagritfanku nehakraze, nagafare tamagra e'naze? ²²Hige'za zamagra anage hu'naze, mago sondia vahe kva nera, Koniliasi'e megia' ne'mo fatgo huno Anumzamofonku kore nehia nekino, mika Jiu vahe krerafamo knare nere hu'za nehaza ne'mofo Ruotge hu'nea ankeromo asamigeno, kagriku noniarega eno keaga eme nasminkena antahineno huno hurantegeta e'none. ²³Higeno Pita'a zamarenompi zamantege'za masete'za, ko ati'geno otino zamagrane nevig'e'za Jopatira ruga'a zamentinti nehaza afuhe'za agrane vu'naze. ²⁴Hute'za anante knazupa, Sisaria uhanati'naze. Koniliasi'a egahaze nehuno, naga'ane tragoteno nemaniam knampa'aramina kehutru hu'ne. ²⁵Pita'a noma'afi e'fregeno'a, Koniliasi'a negeno, agafi rena omereno mono hunte'ne. ²⁶Pita'a avazuhu o'netino anage hu'ne, Otio! Nagra amama hanaza hu'na vahetfa mni'noe. ²⁷Nehuno agranema keaga hume nevu'ne, nompima ufreno omegena rama'a vahe krerafa atru hu'za mani'naze. ²⁸Pita'a omenezmageno amanage huno zamasmine, Tamagratmi ko kasegea antahitma ketma hu'naze, megia' vahepinti mago'mo'a Jiu vahe'ene tragotezano, nantuma antente zakuma i'o hu'za hampo'na kasegema ante'nazana antahi'nazanagi, Anumzamo'a naverino, mago'mofonkura haviza hu'ne huge, avusese osu'ne hu'na osugahue. ²⁹E'ina hu'negu nagriku'ma kema hu'nana ke antahina e'noana, ke huhaviza hurmantezani'a omane'ne, higena nagra kantahinegoe, na'amofa agafare nagrikura huzmantanke'za vu'naze? Huno antahigegen, ³⁰Koneliasi'a kenona'a anage hu'ne, 4'a knama evia knafina noni'afi mani'nena, amanahu knare tri kilokia nunamu nehu'na, koana ame huno mago nera msa'nentake kukena hu'nea ne'mo navuga eme o'netino, ³¹anage hu'ne, Koniliasiga nunamu nehunka, zamunte omane vahe'ma zamaza nehana kavukvara Anumzamo'a ko antahino keno hu'ne. ³²E'izanku vahera huzmantege'za Jopa vu'za Saimoninku, mago'agi'a Pita'e hu'za nehaza nera ke humisageno eno. Zgagfa akuruteti hampo'naza tro nehia nera, Saimoni'e nehia ne'mofo nomp hageri ankenare mani'ne. ³³Hige'na avega otena ko huzmantoge'za kagritega vazagenka knare'za hunka e'nane. E'inahu'ma hu'negu menina, mika'mota Anumzamofa avurera emeritru hu'none. Ramo'ma tagriku'ma ome zamasmio huno hugantegenka e'nana nanekea tasmio.

Pita' zamasmine naneke

³⁴Higeno Pita'a amanage hu'ne, tamagerafa hu'na menina antahue, Anumzamo'a rukna rukna huno vahera zamesi nozmanteanki, magoke

avamente avesinezmante. ³⁵Hianagi mika kotegati vahe'mo'za (nation) Agri'ma koro hunte'za, fatgoma hu'neazama nehaza vahera, Agra avesi nezmanteno, Agrarega zamarenente. ³⁶Nagra antah'inoe, tamagra ko knare musenkema Israeli vahe'ma zamasmineana antahi'naze. Anumzamofu rimpa fruzana Jisasi Kraisi efore hu'ne, Agra mika zamofu Rane. ³⁷Tamagratmi ko antahita ketma hu'naze, Judia kokampi Galiliti erigafa hu'ne, henka Joni'a mono tima frenezmente kea huama hu'ne. ³⁸Tamagra ko antahi'naze Nazareti Jisasi inankna huno Anumzamo'a Ruotge Avamuteti'ene hanave areti'ene huhamprinte'ne. Ana higeno Jisasi'a vano huno knare hunezmanteno, Sata'ma knama nezmia vahera zamazeri so'e huzmante'ne, na'ankure Anumzamo'a Agrane mani'negeno ana hu'ne. ³⁹Tagra mika'zama Judia mopafine Jerusalema hiazama tvuma keta antahita hu'nona vahere. Zamagra anazanke hu'za avare'za keka zafare hantite'za ahe fri'naze. ⁴⁰Hu'neanagi ama ana Nera, Anumzamo'a taregi magoki knazupa azeri otino, azeri anteama hu'ne. ⁴¹Mika vahe'mo'za onke'nazanagi, tagra ke'none, Anumzamo ko'ma huhampri tante'nea vahe'mota ke'none, Agrama fripinti'ma otigeta, ne'zane tinema ne'nona vahere. ⁴²Mono kea vahera ome zamasmihuno huhanavetino huranteno, kore ke huzmanteta, Anumzamo azeri antesga huno fri vahete'ene mani vahetera keaga Jisasi'ke refko huzmantegahie. ⁴³Agrikura korapa mika kasnampa (profeti) vahe'mo'za kea hunte'za, miko'mo'ma Agri agire'ma amentinti hanimofona, kumi'a atrengahie hu'naze.

Megi'a vahe'mo'za Ruotge Avamu eri'naza naneke

⁴⁴Pita'ma ana naneke nehigeno'a, Ruotge Avamu'mo ana mika nanekema nentahiza vahete e'ramine. ⁴⁵Hige'za zamufama tagahu'nea vahe'pinti zamentintima nehaza vahe'ma Pita'enema e'naza vahe'mo'za, megia vahete'enena Ruotge Avamu'mo muse zamo'a herafiramie hu'za tusi antari nehu'za rama'a antahintahi hu'naze. ⁴⁶Na'ankure zamagra nentahize'za, ruzahu ruzahu zamagerupinti Anumzamofu muse hunte'za Agi'a hesga hu'naze. Anante Pita'a huama huno, ⁴⁷tamagerafa huno, magomo'a timpima vahe'mo'ma mono tima fre'zankura i'o osugahie. Menima Ruotge Avamu'ma tagra erunakna hu'za eri'nazankita, mono tima frezamante zampina iza i'o hurantegahie? ⁴⁸Anante Jisas Kraisi agire mono ti freho huno hampo'nantake ke zamasmine. Mago'agna tagrane manitenka, vugahane hu'za agrira antahige'naze.

Pita'a eri'zama eri'nea kea, Jerusale eri amahu'nea naneke

11 ¹Menina Anumzamofu aposol naga ene mago'a Judia nemni'za mono naga'mo'za, megia vahe'mo'za (Gentiles) Anumzamofu naneke eri'naze naneke antahi'naze. ²Ana huteno Pita'a Jerusale kumate

mrrerino vige'za, zamufama tghahu (circumcised) zamentinti vahe'mo'za agriku ke hakare hunente'za, ³kagra zamufa tga osu vahe nOMPI vunka ne'zana zamagrane omene'nane. ⁴Hu'neanagi Pita'a ke aseni'are erinte erinte huno huama hu'ne, ⁵Nagra Jopa ran (city) kumapi manine'na nunamu hute'na mase'ne'na ava'nagna'za kogeno, mago tavrave'gna zamo erami'ne, atupare atupare azeri'nenno atregeno monafinti eramino nagrite e'ne. ⁶Keankere'na ana tavravefi koana, 4'a agiaza hunte'nea z gagfa ama mopafi mani'neane, trampi zgane asagugati vano nehia zgane afi' namaramine ke'noe. ⁷Nagra nentahugeno mago agerumo'a anage nagrikura hu'ne, Pitaga otinka, ahenka no hu'ne! ⁸Hu'neanagi nagra anage hu'noe, Ra'moka nagru hu'nanke'na nonoa z gagfagina onegahue hu'na hu'noe! ⁹Hianagi ana agerumo' mo mago'ene anage monafinti hu'ne, Anumzamo'ma azeri agruma hu'neniazana, haviza huno agaru osu'ne hunka osuo! ¹⁰Anazana tagufa (tri) zupa fore huteno, ete ana mika'zana avazu higeno monafi mareri'ne. ¹¹Anama nehigeno, Sisaria kumateti huzmantege'za tagufa vahe'mo'za, nemanua nonte ehnati'naze. ¹²Avamumo nasamino i'o osunka ana vahe'ene amane vuo hige'na, 6si'a nenafu'za nagrane azageta Konilias nontega vu'none. ¹³Koniliasi kegeno ankeromo noma'afi oti'nenno asami'nea kea, anage huno tasami'ne, huzamantege'za Jopa vu'za Saimoni'e nehaza ne', mago agi'a Pitana avare'za esageno, ¹⁴agra mono naneke neramasaminkeno, kagri'ene mika nagaka'anena, kefo zantmifinti tamahoke ahegahie. ¹⁵Anante naneke erigafa hu'na nehugeno, Ruotge Avamu'mo zamagrite erami'ne, ese'ma tagrite e'neaza huno emani'ne. ¹⁶Ana hige'na Ramo'ma huno, Joni'a tinu mono tina fre ramante'neankina, Avamunu tina frermantegahue hu'nea kegu nagesa antahi'noe. ¹⁷Ana hu'negu Anumzamo'ma magozahu muse'zama (gift) zamagri'ma zami'neana, anahu kna huno Agra Ramofo Jisasi Kraisinte tamentinti nehunkeno tami'neaza hu'negu, iza'na nagra Anumzamomo eri'zankura i'o huzamantegahue? ¹⁸Ana kema zamagrama antahite'za, kema huzmanteku'ma hazana netre'za, Anumzamomo ra agi ami'za anage hu'naze, Anumzamo'a megia vahera zamarege'za zamagu'a rukarehe hu'za zamasimu e'nerize hu'naze.

Antioku nemaniza vahe'mo'za mono eri'za eri'naza naneke

¹⁹Ananknafi Stivenina ahe nefri'za mago'a nagara zamahe fragu vazige'za, atre'za Fonesiane, Saiprasine, Antiokune, nevu'za ru vahete mono osu, Jiu vaheteke mono kea ome zamasm'i'naze. ²⁰Hu'neanagi Saipras vahe'ene Sairini vahe'mo'za zamagripinti mago'a Antioku e'za, agafa hu'za Ramofo Jisasi knare musenkea huama hu'za Griki vahe zamasm'i'naze. ²¹Ramofo hihamumo zamagripi me'negu, tusi'a vahe'mo'za zamagu'a rukarehe hu'za Ramofonte zamentinti hu'naze. ²²Anama zamagrama hazankemo'a, Jerusale mono vahete ege'za

nentahi'za, zamagra Banabasi huntageno Antioku vu'ne. ²³Agrama eno Anumzamo'ma asunku'ma humazmanteaza negeno, muse nehuno zamazeri hanaveti ke zamasmimo, tamage huta tmaguareti Ramofonte maniho hu'ne. ²⁴Banabasi'a knare ne' mani'nenono, Avamupi avitenono amentinti hu'negeno, maka vahe'mo'za Ramofonte e'naze.

²⁵Ana huteno Banabasi'a Tasisi kuma atreno Soli omegenaku vuno, ²⁶ome ke fore huteno avareno Antioku kumate uhanati'na'e. Ana kafufina Banabasi'ene Solikea mono vahe'zga mono kea hunezamikeno tusi'a vahe fore hu'ne. Anante amage'ma nentea disaipol naga'mo'za pusa (kristen) mono vahere huno zamagi'a eri'naze.

²⁷Ana knafina mago'a kasnampa vahe'mo'za Jerusaleti erami'za, Antioku kumate ehanati'naze. ²⁸Mago'zmia Agabasi'e hu'za nehaza ne'mo, otino Avamumofono hanavefi maka mopafina agate'za fore hugahie huno hu'ne. Romu kamanimo kva kri'nea mopa ramimpi, ana kemofono avufga'a (Klaodias Sisama ran kva emania knafi fore hu'ne). ²⁹Jisasi amage'ma nentamo'za, mago mago'mo'za zagoma eri'naza avamente eritru huta Judia mani'naza tafuheintega (mono nagate) zamaga'zanku hugahazanki atre'zmantesune nehu'za, ³⁰anante eri tru hute'za, mono vahe'mo'za, Banabasine Soli kizani znamige'ne, Jerusale mono kva vahetega eri'ne vu'na'e.

Jemisi ahene frino, Pitana kina hunte'nea naneke

12 ¹Ana knafina Kini Heroti'a mago'a mono vahe zamahe, frinaku zamazeri'ne. ²Joni nefu Jemisi azeri'za zanra kazinu ahe fri'naze. ³Anama hiazama Agrama kegenono Juda vahe'mo'za musema hazageno'a, Pitana azerino kina huntaku hu'ne. (Zo'ore breti muse hu'za nenaza knare, anara hu'ne.) ⁴Heroti'a, Pitama azeriteno avareno 4'a sondia vahe kevumofono (16) zamazampi ome antege'za, oza aza hu'za kava kri'naze. Heroti'a Pasova ne'za netesageno, amefi'a maka vahe zamufi Pitana azeri ama hunaku antahi'ne. ⁵Ana higeno Pita'a kina nompino mani'nege'za, mono vahe'zgamo'za Anumzamofontega hampo'nati'za nunamu hunte'naze.

⁶Ana kenegera masenkeno okina Heroti'a avareno keaga huntegahianki nehigeno, Pita'a tare sondia netremokizni amunompino masenegeno, tarega azantera seni nofiteti kina rentenageno, kva vahe'mo'za kina vahete kava kri'za kafante mani'naze. ⁷Ana nehigeno ame huno, Ramofono ankeromono efore higeno, masamo kina vahe nona remsa hu'ne. Ankeromono Pitana asoparega aheno ame hunka otio! Higeno seni nofimo'a Pita azantetira evurami'ne. ⁸Ankeromono'a amanage huno Pitana asami'ne, Kamunofirano nehunka kaga nona vazio, higeno Pita'a agano antanine. Anante ankeromono anage huno asami'ne, anakre kuka'a nentaninka namage' eno hu'ne. ⁹Pita'a amage' avaririno nevuno, ankeromono'ma azama hiazana

agra antahino keno osu'neanagi, agra avana keaza hu'ne. ¹⁰Ese kafante kava hu'naza sondia vahe'ene, anante kafante kava hu'naza sondia vahe zamagterete'ne, ran kumapi vu kafana aenireti hagente'nea ran kafante akeno agra'a kafamo'a anagige'ne atirami'ne osi kampi nevakeno, ankeromo'a ame huno atreno vu'ne, ¹¹Pita'a agrake nevuno amanage hu'ne, menina nagra antahi'noe, Ra Anumzamo'a ankeroma'a huntogeno, Heroti'ene Jiu vahe'mo'za maka'zama hunantenaku hazafintira naza huno katufe natre'ne.

¹²Anante Pitama anama hiaza antahino keno nehuno, Jonina mago agi'a Maki'e nehaza ne'mofo nerera Meri nontega, maka vahe'mo'za mani'neza nunamu nehazarega vu'ne ¹³Anante Pita eno megia kafante eme vagare vagare higeno'a, Roda'e nehaza eri'za mofa'mo eno eme antahi'ne ¹⁴Pita ageruma nentahino'a, ana kafana onagi atreno tusi muse nehuno, agareno vuno Pita'a kafante oti'ne huno ana vahe zga ome zamasm'i'ne. ¹⁵Hu'neanagi zamagra anage ana mofakura hu'naze, Kagra negi nenegahane! Ana mofamo hanavetino tamage Pita'e nehige'za, kagra ankeroma'a ke'negahane hu'za mago'ane hu'naze. ¹⁶Pita vagare vagare nehigeno zamagrama kafa anagi'za nege'za, nankna huno e'neha hu'za tusi'a antri hu'naze. ¹⁷Agra azanu avame hige'za akohe'za mani'zageno Ramo'ma kina nompinti azama huno avare atre'nea kea zamasm'i'ne. Ana huteno anage hu'ne, Jemisine mono nafuheina ama ana nanekea zamasmih'o huteno atreno ru kumatega vu'ne.

¹⁸Ko'ma atige'za, kina nonte'ma kva hu'naza sondia vahe'mo'za tusiza hu'za Pita'a na'a hu'neha hu'za rama'a antahintahi hu'naze. ¹⁹Anante Heroti'ma hakareno keama, keno erifore nosuno'a kavama hu'naza vahera kegaga huzmanteno tamagra frigahaze hige'za, zamahe friku zamare'za vazageno, henka Judiatira atreno uramino Sisaria umani'ne.

Heroti fri'nea naneke

²⁰Anante Heroti'a Taia kumate vahe'ene, Saito kumate vahe'mokizmigura arimpa ahezamantege'za, zamagra mago zamarimpa hu'za agrite emeri atru hu'za, Kini ne'mofo tva'onte eri'za ne' Blastusi, zamaza hinogu rimpa azeri fru hute'za, knare nomanizama kini ne'mo'ma zamisigu antahige'naze. Na'ankure zamagrama kave'ma e'nerizana kini Heroti'ma kava kri'nea mopafinti e'neri'ze. ²¹Mago kna erintaza knazupa, Kini Heroti'a kini vahe kukena huteno, keaga refakohu trate mani'nenno zamagrira rama'a keaga zamasm'i'ne. ²²Hu'neanagi tusi'a vahe'mo'za agafa hu'za rankehu'za mago anumzamof'o agerure, hanki vahe'mofo agerura omane'ne! hu'naze. ²³Ana kema nehazama'a, mago Ramofo ankeromo Herotina ahe tre'ne, na'ankure Anumzamof'o ra agi omigeno agrira knimo amprigeno fri'ne.

²⁴Hu'neanagi Anumzamof'o kemo'a hageno rura huno vuno eno hu'ne.

²⁵Banabasi'ene Solikea Jerusale mono eri'zama eri vgareteke, Jon Makina nevareke ete Antioku kumate vu'na'e.

Banabasine Solikizni mono erizante huznante'naza naneke

13 ¹Antiokua mono nontema menima mani'naza kasnampa vahe'ene, rempi huzmi vahera ama'a mani'naze, Banabasiki, Simioni (aganumpa nere hu'za nehaze ne'ki), Lusiusi'a Sairini ne'ki, kumate ugagota kva (Gavana) ne' Heroti knampa, magoka ositeti rasena'a ne' Maeniaki, Soliki hu'za mani'naze.

²Anamo'za Ramofonte mono hunente'za, ne'za a'o hu'za nunamu nehzageno, Ruotge Avamu'mo'a anage hu'ne, Banabasine Soli kizni huhampri znante'keno, eri'za eriogu hua eri'zana eri'o hu'ne. ³Ana hute'za ne'zama a'o hu'za mani'neza henka zamazana znagofetu ante'za nunamu hute'za huzamantake'ne vu'na'e.

Poli'ene Banabasike Saiprisi kumapi mono hu'na'a naneke

⁴Banabasine Soli kiznia Ruotge Avamu'mo huznantege'ne Sulisia uramike osi voti omerike Saipras ti amunompi me'nea kumate vu'na'e. ⁵Zamagrama Saramisi kumate vute'za, agafa hu'za Anumzamofa kea Jiu vahe osi mono nomp (Sinagog) huama hu'naze. Zanaza hanigu Joninena avare'ke umani'naze. (Mago agi'a Jon Maki'e.) ⁶Zamagrama maka ti amunompi kumatami agatere'za nevu'za Pafosi uhanati'za zago nereno Jiu vahepi havige kasnampa nera, Bar Jisasi'e nehaza nera mani'negeke ke'na'e. ⁷Ana nera, Segias Paulosi knare antahizamo agatere'nea ne' Romu kamanimo huhamprintegenano ana ti amunompi kuma kava hu'nea ne' ene mani'ne, ana kamani kva (gavana) ne'mo Banabasine Soli kizni Anumzamofa ke eme asamiogu zanagi hu'ne. ⁸Hu'neanagi amene ne' Elimasi'a zago nereno ha' arezmanteno ana kamani kva ne'mo amentinti osanie hu'ne. (Elimasi'e huno Griki kefi hu'neana, avuatga huno zago nereno vahe zamahe fri nere hu'ne.) ⁹Hu'neanagi Solina, mago agi'a Poli'e, Ruotge Avamumo'a agu'afi avinetegenano avua kefatago huno negeno, ¹⁰anage hu'ne, kagripina havige avu'avamo'ene havizahu zamo'a avite'ne, Sata mofavre mani'nenka, fatgo avu'avamofona ha' arenentane, kagra fatgo osu avu'avara netrenka, Anumzamofa fatgo avu'avara osugahampi? ¹¹Menina ko, Anumzamofa azamo'a ha' reganteankino kavurgamo'a asu hanigenka, osi'a knafina kavua onkegahane! higeno ame huno avumo'a su higeno azante azerino vanohu vaheku hakre'ne. ¹²Anante kamani (Gavana) kva ne'mo anazama agrite fore hiaza negeno, amentinti hu'ne. Na'ankure agra tusi'za huno Ramofonkema rempima humia zankura antri hu'ne.

Poli'ene Banabasike Pisidia Antioku kumate mani'na'e.

¹³Anante Poli'ene agrane vu'naza vahe'mo'za Pafosi kuma atre'za hagerimpi vu'za Pega kumate Pamfalia kaziga ehnatinaze. Hianangi

Joni'a anante ome zanatreno ete Jerusale kumate vu'ne. ¹⁴Pega kumara atreke, zanagra Pisidi Antioku ehanatike, mni fruhu knazupa osi mono nOMPI (sinagog) marerike umani'na'e. ¹⁵Kasegene kasnampa vahe kema hampri vagarete'za osi mono nOMPI kva vahe'mo'za ke atrezmante'za anage hu'naze, tafuheta mago'a tazeri hanaveti ke eri'nenutma amane hugahaze. ¹⁶Hazageno Poli'a anante otino azanu avame huno anage hu'ne,

Israel vahe'motmane megia vahe'ma Anumzamofonku koroma nehaza'motma antahiho. ¹⁷Ama'i Israeli vahe'mofo Anumzamo'a, tagri tagehe'ina huhampri zamanteno, ru vahe kumapima umani'nageno zamazeri knare zantfa Isipi kumapina nehuno hihamu'areti anampintira zamare megia atre'ne. ¹⁸40ti'a naza kafufi ka'ma mopafi zamareno ome zamantege'za mani'naze. ¹⁹7ni'a ranra kumatamimpi mani'naza Kenani vahe zamahe hana huteno, Anumzamo'a ana mopafi vahe'amo'za manisagu mopa erizamige'za zamagra mopa erise'za mani'naze. ²⁰Anazama fore'ma hu'neana 450'a zgefufu nazampi fore hu'ne. Anama huteno'a henka kva vahe azeri otigeno kva krizmantege'za mani'za e'za kasnampa ne' Samueli'gnare ehnati'naze. ²¹Anante kini ne' tamisane hu'za antahigageno, Anumzamo'a Kisi nemofo Benzameni naga nofipinti ne' Soli zamigeno, 40ti'a zgefufu kini manino kva huzmante'ne. ²²Anumzamo'a kini Solina azeri netreno, Deviti azeri otigeno kini manino kva huzmante'ne. Agra anage huno Devitinkura hu'ne, ***Nagra kogeno Jesi nemofo Deviti'a, Nagri'ma nagu'afima navenesia'zana agra nevaririno, maka'zama huo hanuazana hugahie.*** (Sam-Zga 89:20, 1 Sam 13:14) ²³Ama ana ne'mofo negehompinti, Israeli vahe'mota tahoke'ma heno tazahu nera Jisasina huvempa hu'nea kante anteno tami'ne. ²⁴Jisasi'ma hakare'a Israeli vahe zamufi eama osu'negeno, Joni'a huama huno mono tina fretma tmagu'a rukrehe hiho huno maka Israeli vahe'mota tasami'ne. ²⁵Hu'neanagi Joni'ma huhamprunte'nea eri'zama'a eri vga reteno'a, mago'ene anage hu'ne, Iza'e hutma nagrikura nentahize? Nagra ana nera omni'noe. Hu'neanagi antahiho, mago'mo'a namage ne-e. Nagra knarera osu'noankina agia anontema anaki'nea nofira katu ofegahue huno hu'ne.

²⁶Nafuhetma Abrahamu agigo azankomofo nagare, amama Anumzanku koro nehu'za tamagrane mani'naza megia vahe'motma kumipinti tazahu kea tagrite atregeno e'ne. ²⁷Na'ankure Jerusale mani'naza vahe'mo'zane, kva vahe'zmimo'zanena Agra taza hu'nere hu'za ke'za antahi'za osu'naze. Kasnampa vahe'mo'za Agriku hu'za kre'naza kea maka mni fruhu (sabat) mono knare'ma hampri'za nentahi'za, antahiso'e osu'za ahenaku huhaviza hunte'naza kemo'a, avufa'a fore hu'ne. ²⁸Ahe fri agafagura ke'za erifore osu'za, zamagra Paerotinte vu'za, antahige'za ahe frio hu'za hu'naze. ²⁹Agriku'ma hu'zama avon tafepi krente'naza

maka nanekea huvgarete'za, keka zafareti erifenka atre'za eri'za vu'za kerifi ome ante'naze. ³⁰Hu'neanagi Anumzamo'a fri kragefe'nefinti azeri otigeno, ³¹Galiliti amage' ante'za Jerusalem mareri'za e'naza vahe'taminte rama'a zupa efore hu'ne. E'ima ke'naza nagamo'za vahepina huama hu'za menina zamasmigahaze. ³²Hanki neragehokizmima huvempa huzmante'nea knare musenke tagrama nerasmunana, ³³ama ana huvempa kea, Anumzamo'a tagrite eri knare huranteno Agra'a mofavre'aza huneranteno, Jisasinena azeri oti'ne, ko'ma tare zgame avon tafepi krente'nea kante, ***Kagra mofavreni'a menina mani'nanke'na, Nagra negafa'na manigahue huno huama hu'ne.*** (Sam-Zga 2:7)

³⁴Hu'neanagi e'ima hunte'nere, Anumzamo'a tamage huno Jisasina azeri oti'neakino mago'anena frino onkasritfa hu'ne, Anumzamo'a anage huno hu'ne, ***Nagra agru huno ruotge hu'nea huvempa asomu ke Devitima ami'noana, menina tamagrira tamigahue,*** (Aisa 55:3) ³⁵E'ina hu'negu mago'ene zgame avon tafepina anage huno kre'ne, ***Kagra atresankeno ruotge hu'nemo'a onkasrigahie.*** (Sam-Zga 16:10)

³⁶Deviti'a, agrama manino e'nea knafina Anumzamo'ma erigahane huno hunte'nea eri'zana eri vagareteno, frige'za negehoma asentena fi ome asentageno avufamo'a kasri'ne. ³⁷Hu'neanagi Jisasina fri'nefinti Anumzamo azeri otigeno onkasri'ne. ³⁸E'ina hu'negu nenafutma antahita keta hiho, ama ana ne'pinti kumi tamia eri atresia ke huama hu'na nerasmune. ³⁹Ama ana nete'ma zamentinti hanu'za fatgo vahe manigahaze. Mosese kasegemo'a tamazeri fatgo osugahie. ⁴⁰Ana hu'negu tamagra kava hu'nenkeno, kasnampa vahe'mo'za hu'naza nanekemo'a tmagritera fore osino. ⁴¹***Kiza zokago kema nehaza vahe'tmina, keho! Tamano nevazinketma antri hutma fritma haviza hugahaze! Nagra knare eri'za enerugetma tamentinti'a nosaze. Vahe'mo'ma tamasmigineta tamentintia osugahaze, huno kre'ne.*** (Hava 1:5)

⁴²Anage huteke Poli'ene Banabasike atineramikeno, vahe'mo'za ama ana nanekea ru mni fruhu kna (sabat) zupa knare eme tasmigaha'o, hu'za zanasmi'naze. ⁴³Mono'ma osi mono nomp (sinagog) huvgarete'za, vu'za e'za nehageno, rama'a Jiu vahe'mo'zane, Anumzanku koro nehaza megia vahe'mo'za, Poline Banabasi kizani zanavriri'za nevzage'ne, zamazeri hanaveti ke hu'ne, Anumzamofu asunkuzampina hanavetita maniho hu'ne ana vahera zamasmina'e.

⁴⁴Hanki anante Mni fruhu kna (Sabat) zupa, ran kumapi mani'naza vahe'mo'za kuma azute'za Ramofu ke antahinaku emeritru hu'naze. ⁴⁵Mika vahe eritru nehage'za Jiu mono vahe'mo'za nezmage'za kanive reznantegeni Poli hiankegura mago zamarimpa huoznante'za, ana vahe'mo'za ha' reznante'naze. ⁴⁶Poli'ene Banabasi'kea hanavetike koro osu anage hu'na'e, Esera Juda vahe'motma Anumzamofu nanekea tasmimnonanagi, tamagra tmefi ana kea hunemitma fatgoma hutma

mani'netma manivava asimu erizankura tame'nosigu, megi'a vahete tagra rukarehe nehu'e. ⁴⁷Ramo'a amanage huno hanavege hurante'ne, ***Nagra huhampri kantoankinka, kagra megi'a vahera tvi zami mani'nenka, kumipinti zamazahu kea erinka mopa atupare uhanatigahane huno tasami'ne.*** (Aisa 42:6, 49:6)

⁴⁸Megi'a vahe'mo'za ana naneke nentahiza muse nehu'za, Ramofo kegu tusi'za hu'za musenkase nehazageno, mani'vava zamasimu erigahaze huno huhampri zamante'nea vahe'mo'za zamentinti hu'naze. ⁴⁹Ana hazageno Ramofo kemo ana mopa kaziga haezganino vuno eno hu'ne. ⁵⁰Hu'neanagi Jiu vahe'mo'za, Anumzamofonku koro nehu'za zamagi me'nea a'nene, zamagi me'nea vene'nene zamarimpare ke hu'za zamazeri otige'za, Poline Banabasi kiznia, ana mopa kazigatira zamahe anati tre'naze. ⁵¹Zanahe anatzageke, zanagiareti kugusopa rupopo hutra'azamo'a, huzmerino e'izama hazazamo'a knare osiaza hazankino knazamo'a tmagripi megahie nehuke, Ikoniamu atreke vu'na'e. ⁵²Hu'neanagi Antioku kumate'ma zamentinti nehu'za Ramofo amage nentaza nagapina muse'zamo'ene Ruotge Avamu'mo'a avite'ne.

Poli'ene Banabasike Ikoniamu kumate mani'na'a naneke

14 ¹Antioku mani'nakeno fore hu'neankna kna'za fore hu'ne, Poli'ene Banabasikea Ikoniamu kumate vuke, Jiu vahe osi mono nompri (sinagog) hamp'natike hakare vahe'mo antahi ama hu'are, mono kea huama nehake'za, rama'amo'za Jiu vahe'ene Griki vahe kevumo'za zamentinti hu'naze. ²Hu'neanagi Jiu vahe'mo'za zamentinti ana kegura nosuza, megi'a vahe antahintahi eri savri hazage'za, ana netrena ha' rezanante'naze. ³Ana hazageno mago'a knafina anantega mani'neke, mono kea hanavetike Ramofonkura nehune, asunku'zamofu kea nehakeno, avame'zane kaguvazanena zanagri znazampi eri fore hu'ne. ⁴Hu'neanagi ana ran kumapi mani'naza vahe krerafamo'za amu'nompinti refako hu'za, mago'amo'za Jiu vahetega vazage'za, mago'amo'za aposol vahetega vu'za hagerafi'naze. ⁵Megi'a vahe'ene Jiu vahe'mo'zane kva vahe zamine, zamazeri haviza huta have knonu tare netrena zanahefrigahune hu'za nehazageke, ⁶Poli'ene Banabasikea ananke nentahi'ne, freke Likoniamu rankumamofu osi kumatrena Listrane Debine ana kaziga asoparega meno vu'nea mopare umani'na'e. ⁷Anantega umani'neke mago'ene Knare Muse Kea huama hu'ne zamasmu'na'e.

Poli'ene Banabasikea Listra kumate mani'na'a naneke

⁸Listra kumatera mago'agi havizahu ne' ksente'nea ne' mani'ne, ksente'neregatira kana vano nosia nere. ⁹Ana ne'mo Poli'ma huama hianka mani'nenko antahine. Poli'a ana ne'ma avufi kefatgo huno negeno'a, amentinti nehiankino knare huntegahie nehuno, ¹⁰ran ke

huno asami'ne, kagareti oti fatgo huo huno higeno, ana ne'mo, haru huno marerino tamino nehuno otino vu'ne. ¹¹ Poli'ma hiazama ana vahe tamimo'za nege'za, Lakonia kefinti ranke hu'za anumzantamimo vahe fore huno tagrite ne-e hu'za hu'naze! ¹² Zamagra Banabasinku Ziusi (havi anumzane) nehu'za, Polinku Hemesi'e (havi anumzane) hu'za kahefa zanagi ante'naze. Na'ankure Poli'a ke ne'ku hu'naze. ¹³ Ziusi havige anumzamofono mono nona, ran kumamofona megia, tva'onte me'nea nomofono kva ne'mo'a mago'a, bulimakaona nevareno mago'a avasase'zantamine erino ran kumamofono kahante vige'za, agrane ana mika vahe'mo'za kre sramna huznantenaku hu'naze. ¹⁴ Hu'neanagi aposol Poli'ene Banabasikea ananke nentahike kukena zani'a tagato tagatu nehu'ne, zanagare'ne ana vahetamimofono amunompi ufre'ne kezatike anage hu'na'e. ¹⁵ Ama vahe'motma, na'a amazana nehaze? tagra vahetafa mani'neta tamagri kna hu'no'e! Tagra knare musenke huama huta neramasmu'e, ana hanunketa tmazama osuno havi zampintira atretma, Agra monane mopane, hagerine maka'zama tro huno asimuno anteno mani'nea Anumzante monora huntegahaze. ¹⁶ Korapa knafima mani'naza vahera, Anumzamo zamatrege'za maka mopafi vahe'mo'za zamagra zamesia kante vu'za e'za hu'naze. ¹⁷ Hu'neanagi Agrama knare'zama hu'neana fraoki'neanki, monafinti kora atregeno runo ne'za raga rente'geno eri knare hunermanteno tmesia ne'zana neramino musezana tamagu'afina ante'ne. ¹⁸ Anahu kea hu'neanagi kresramna vuznantenaku hu'nazana vahe'ma i'o huzmantenaku hu'noana, tusi'a amuho hurante'ne. ¹⁹ Hu'neanagi Jiu vahe'mo'za Antioku kumateti'ene Ikonio kumateti e'za, havige nehie hu'za zamagrarega eme zamavrente'za, Polina have knonu ahe'za avazu hu'za rankumapinti ati rami'za megia frie hu'za zamagesa nentahiza ome atre'naze. ²⁰ Hu'neanagi Anumzamofono amage nentaza disaipol naga'mo'za, regorave nehazageno anampinti otino ran kumapinka eteno ufarene. Maseke nanterana Banabasi'ene atre'ne Debi vu'na'e.

Poli'ene Banabasi kea ete Antioku rukrahe hu'ne vu'na'a naneke

²¹ Ana ran kumate'ma knare muse ke (gutnius) huama hakeno rama'a vahe'mo'za, amage ante disaipol naga fore hazageno, zanagra Listra kumate'ene Ikoniane Antioku kumate vu'na'e. ²² Zanagra Jisasi amage' nentaza disaipol naga zamagu'a zamazeri hanaveti ke hunezmasmike, hanavetita tamentintifina maniho, Anumzamofono kumapima vunakuma hanuta, rama'a knazampi ufreteta henka vugahune hu'na'e. ²³ Ana nehuke, mono kva vahe (elda) mago'a mono nonte zamazeri onetike ne'zana a'o huneke nunamu nehune, zanamentintima neha'a Ramofono azampi zamante'na'e.

²⁴ Ananteti Pisidi'a distrikifi ufareke agatera'azamoke, Pamfilia provinsifi ehanati'na'e. ²⁵ Zanagra Pega kumate mono naneke ome

huteke, Ataria kumate urami'na'e. ²⁶Anantetira atre'ne ventifi marerike ete Antioku kumate vu'na'e, korapara ana kumateti Anumzamofu asunkuzampi huzamantake'ne vunate ete ehanatina'e. ²⁷Zanagrama ehanatike mono vahezga eme zamazeri atru huteke, makazama Anumzamo'ma zanagripima hu'neazana nezamasm'i'ne, megi'a vahete kama eri hagro hige'za zamentinti hu'naza ke zamasm'i'na'e. ²⁸Ana kumate Anumzamofu amage' nentaza disaipol naga'ene zazakna mani'na'e.

Jerusale kumate atru hu'naza naneke

(Gal 2:1-10)

15 ¹Mago'a vahe'mo'za Judia kazigati e'za Antioku ehanati'za amanage hu'za amage' nentaza nagara rempi huzami'naze, Mosese hu'nea kere amage' antetma tamavufa taga hiho, anama osanutma tamahoke heno tamaza osugahie. ²Poli'ene Banabasi kema ke hakare ana vahe'enema hugantigama hutageno, mono vahe zgamo'za Poline Banabasine amu'no zamifinti mago'a vahe'mo'zane kehakare hu'nazaza eri fatgo hunaku mago'a, aposol naga'ene mono kva vahe'ene (eldas) mago zamarimpa osu'naza keaga huza eri fatgo hunaku Jerusale vu'naze. ³Ana hige'za mono nagamo'za, huzamantege'za, Fonesiane Sameria ufare'za agatere'za maka megi'a vahe'tamimo'za zamagu'a rukarehe hu'naza kea mono vahe'zga zamasmige'za tusi'za hu'za muse hu'naze. ⁴Zamagrama Jerusale uhanatizage'za, mono vahe'mo'zane, mago'a aposol naga'ene mono kva vahe'mo'za (eldas) muse hu'za zamara'ge'za, maka'zama Anumzamo zamagrite'ma hu'neazana huama hu'za zamasm'i'naze. ⁵Hu'neanagi mago'a Farisi mono vahepinti, zamagua rukarehe hu'za Kraisinte zamentinti hu'namo'za, oti'za anage hu'naze, megi'a vahe'mo'za zamufama taga hute'za Mosesi kasegema amage antesazana knare hugahie.

⁶Aposol naga'ene mono kva (eldas) vahe'mo'za atru hu'za ana naneke erifatgo hu'naze. ⁷Eri atru hu'za zazate kea refako hu'za antahizageno, Pita otino ana nanekemofu nona'a amanage huno zamasm'i'ne, nenfutma, tamagra antahi'naze mago'a kna evigeno, Anumzamo'a nagri huhamprinanteno, megi'a vahepi mono kea huo huno hunantege'na, hugeno knare musen ke antahi'za zamentinti hu'naze. ⁸Higeno Anumzamo vahe'mofu agu'a keno antahino hu'nemo'a, zamagritera eriana huno Ruotge Avamura zami'ne, na'ankure tagri'ma hu'neazana huno zami'ne. ⁹Hankino tagrira Anumzamo'a ruzana huranteno, zamagrira ruzana huozmante'ne, zamentinti nehazageno zamagu'a zamazeri agru hu'ne. ¹⁰Hagi menina nahigetma Anumzamofu rimpa he'zana nehutma, bulumaka'amofu zamanankempi anaki nezmantaza kna knanentake agare namare zafa (Yoke) Jisasi amage nentaza disaipol

nagapina nentaze. Tagri nerageho'ene, tagranena eriga osu'nonankna knazana zaminaku nehazo? ¹¹Hu'neanagi tagrama tamentintima nehunana, Ramofo Jisasi asunku'zamo kefo zantifinti tahoke heno zamagri hu'nea kante anteno taza hu'ne.

¹²Atru hu'naza maka vahetamimo'za, ke osu mani'nage'za Polike Banabasikea kaguva'zane avame'zanema zanagripinti Anumzamo'ma megia' vahe'ma huzmante'nea zana zamasm'na'e. ¹³Ana nanekema huvgamaretageno, Jemisi'a anage huno kenona hu'ne, nafuhetma ke'ni'a antahiho, ¹⁴Saimoni anage huno huama hu'ne, Anumzamo'a megia' vahera zamare'na Nagra'ni'a vahere hu'na huhampri zamantegahue hu'ne. ¹⁵Kasnampa vahe'mo'za krente'naza kemo'a, ama kenena mago kna hu'ne, ¹⁶**Anama hutesu'na, ete Nagra e'na Deviti noma karite'neana etena eme kigahue. Nagra'ni'a havizama hu'nea nona eriso'e hugahue.**^c ¹⁷**Ana nehanena miko vahe'mo'za, Ra'monagu nehakesagena, zamagima hesuana, mika megia' vahera Nagri vahere hu'na zamagrikura hugahue, huno mika'zama troma hu'nea Ramo'a hu'ne,** (Emo 9:11-12) ¹⁸Korapama evu'nea knafina amazana antahino keno hu'neane.

¹⁹E'ina hu'negu, huvgare nanekea nagra (Jemisi'na) amanage nehue, tagra mago'anena knazana ozamisune, na'ankure megia' vahe'mo'za amu'no zamifinti rukarehe hu'za Anumzamofonte e'naze. ²⁰Hu'neanagi avo kreta amanage huta zamazeri haviza huzampintira manigneta maniho huta zamasm' snune. Havi anumzamofu ami'nesia zane, monko avu'avazane, anankema tga osu zgagfane, korama me'ne'nia ame'a oneho huta zamasmisune. ²¹Na'ankure tagra antahinone, ofenka'a knareti eno menima e'neana, Mosese kasege'a huama hakare kumatera nehu'za, maka mni fruhu knarera (Sabat) osi mono (sinagog) nomp' umareri'za hampri'za nezamasmize.

Megia' vahe zamentinti nehazamokizmi avo krezmi'nea naneke

²²Anante aposol naga'ene, mono kva vahe'mo'zane, maka mono kevumo'za amuno zamifinti huhampri zamanteneana, Judasinku Basabasi nehaza ne'ene Sailasi'a ana naga'amofu kva ne' zamine huhampri zananteke, Poline Banabasi kizni Antioku vihogu huzmante'ne. ²³Ama'na avon karentage'za eri'za vu'naze, aposol nagategati'ene mono kva vahe'motane, tamagri tamafuheta megia' tafuhetane nerasarogta Antiokune Siriane, Silisiamana mani'namotarega musen ke huramantone. ²⁴Kema antahunkeno'a, mago'a vahe'mo'za tagripinti vu'za, huozmantenona ke ome tmasmi'za kemo'a, kna neramino antahintahitami tmazeri savari hu'naze. ²⁵Tagra mago tarimpa huta tagri

^c **15:16** Deviti nonkuma hu'neana, e'i avame ke huno agrama kva hu'nea kumaku (kindom) hu'ne.

aroneti Banabasine Poline magoka ama vahera huhampri zamanteta huzamantesunke'za vanaze. ²⁶Zanagra zanavufa tagri Ramofo Jisasi Kraisi agi'are atre'za neha'a netre'ne. ²⁷E'ina hu'negu Judasine Sailasi kizni huzmantonankino, zanagra zani'a ama kemofona ome hamprike tamasmigahaze. ²⁸Na'ankure knare'ma hu'neana, Ruotge Avamu'ene tagranena, ruga'a knazana ontaminaku nehunanki, ama kemofa avaririgahaze.

²⁹Ana hu'neanki havi anumzamofa ami'nesia zane korama'a me'nenia ame'ane, anankema tagaosu zgagfa onetma monko'zana osugahaze. Tamagrama amazama osutma maniganeta manisazana knare hugahaze. Tamarimpa frune maniho.

³⁰Ana hute'za zamagra atre'za Antioku urami'za, maka naga ome zamazeri atru hute'za anama kre'naza avona zami'naze. ³¹Rankema hu'za ana avoma hampritageno, vahe'tamimo'za zamazeri hanaveti kema hazazankura, tusi'a musenkase hu'naze. ³²Hagi Judasike Sailasikea znagranena kasanampa netrenkike, so'e hu'za mani'saza kene zamazeri hanaveti ke nezmasmike, zamentinti nagara zaza naneke hu'ne zamasm'i'na'e. ³³⁻³⁴Mago'agna manitakeno, ana kumate zamentinti nehaza naga'mo'za, tanarimpa farune vi'o hu'za huznantageke, e'na'a vahetega eteke vu'na'e. ³⁵Hu'neanagi Poli'ene Banabasikea, rama'a rempi huzami vahe'ene Antioku kumate mani'ne'za rempi hunezami'za Ramofonkea huama hu'za zamasm'i'naze.

Polike Banabasikea mago zanarimpa osuke atane'na'a naneke

³⁶Henka'a mago'a kna evutegeni, Poli'a Banabasina amanage huno asami'ne, ete vuta maka kumapi zamentinti nagara, Anumzamofa kema zamasm'i'no'ana, nankna nehazafi ome zamagesu'e. ³⁷Banabasi'a, Joninku mago agi'a Maki'e nehaza ne' avare'neta vanu'e hu'ne, ³⁸Hianagi ko'ma avareke Pamfili'a kumate nevakeno, zanatre'no eri'za e'o'ri vu'negu Poli'a hamponatino i'o, avareta ovugahu'e hu'ne. ³⁹Hu'nege'ne anazanteku fra vaziteke, otare atre hu'na'e. Banabasi'a Makina avareno votifi marerino Saiprasi ti amunompi kumate vu'na'e. ⁴⁰Hu'neanagi Poli'a Sailasi avarena vugahue nehige'za, Anumzamofa asunku'zane knare vi'o hu'za mono afuhe'zane asarahehe'zanena musen ke huznantageke atreke vuna'e. ⁴¹Siriane Silisi'a kumapi Poli'a ufreno nevuno, mono vahera zamazeri hanavetive vu'ne.

Polike Sailasikea Timoti avare'ne vu'na'a naneke

16 ¹Poli'a Debe kumate ene Listra kumate'ene ne-eno, mago nera Timoti'e nehaza ne'kino, nerera'a Jiu a'mo amentinti nehia a'mofa mofavre. Hianagi nefa'a Griki ne' mani'ne. ²Listrane Ikoniam mani'naza zamentinti naga'mo'za knare nere hu'za nehaza nere. ³Poli'a avareno

Timoti vunaku nehuno, avufa taga huntene, na'ankure mago'a Jiu vahera ana kumatera mani'nageno ana hu'ne, makamo'za antahi'naze agri nefa'a Griki ne' mani'ne. ⁴Zamagrama kumate kumate ufare'za nevu'za, aposol naga'mozane mono (elda) kva vahe'mo'zama Jerusale kumate hu'naza kea megia' zamentinti vahe'mo'za avaririsaze hu'naza ke ome zamasm'i'naze. ⁵Anama higeno mono vahe'mo'za zamentintifina hanave e'nerizageno, mago mago knafina rama'a vahe efare efare hu'za ra hu'naze.

Poli'a Masedonia ne'mofonku ava'nagna'za ke'nea naneke

⁶Zamagra Pamfaliane, Galasia kaziga ugater'e'za nevgageno, Ruotge Avamu'mo mono ke Esia kaziga huzanku i'o huno huzamantege'za agater'e'za vu'naze. ⁷Zamagrama Misia kaziga ete'za, Bitania kaziga vunaku hu'nazanagi, Jisasi Avamu'mo zamatrege'za ovu'naze. ⁸Ana hige'za zamagra Misia agater'e'za, Troasi rankumate urami'za vu'naze. ⁹Keragera Poli'a mago ava'nagnaza efore higeno keana, Masedonia ne'mo otino mani'nenno asamino, tagritega erakahenka Masedonia eme taza huo huno nehigeno ke'ne! ¹⁰Ana ava'nagnaza Poli'a ketegeta, Anumzamo tasmino Masedonia vutma knare musenke ome zamasm'iho nehiankita, ame huta ome zamasmisune huta hu'none.

Filipai kumate ehanati'naza naneke

¹¹Troasi kumateti votia erigantu atreta hagerimpi vufatgo huta Samotresi vuta, ugatereta anante kna zupa Niapolisi kumate uhanati'none. ¹²Anantetira atreta Filipai kumate vu'none, anama mani kagi'naza kumamofo, ran kumare Masedonia, Romu kamanimo kavagri'nea kumate mago'a kna ana kumate mani'none. ¹³Mni fruhu knazupa rankumamofo kafampinti atiramita tinkenare nevuta, tagesama antahunana mago'a Jiu vahe'mo'za nunamu nehaza kumara me'negahie nehuta, a'ne naga mani'nageta anante umanita agafa huta, ana a'ne naga'enena kea hu'none. ¹⁴Mago ara agi'a Lidia'e nehaza a'mo knare konariri'ane fitu tavrave hatino zagore netrea a'mo, Taitaria rankumateti a' mani'nenno Anumzamofonte mono hunentea a'mo kema hu'na kea antahi'ne. Anumzamo'a agu'a eri rukrehe higeno Poli'ma hiankea antahi'ne. ¹⁵Ana a'ene noma'afi nemaniz'a naga'anema mono tima frete'za, anage huno Lidi'a tantahigeke hu'ne, tamagra nagriku'ma Ramofonte mani tragotenoma mani'ne hanutma noni'afi eta emaniho, huno hampo'natino tantahigeke higeta noma'afi vuta umani'none.

Kina nompi zamante'nea naneke

¹⁶Anante nunamuhu kumatega vunaku nevunkeno, kazokzo mofa'mo'a eme tage'ne. Ana mofara havi avamu'mo agu'afi mani'nenno henkama fore'ma haniaza hufore nehigeno, kva'amo'za hufore'ma nehige'za knare

zago e'nerizane. ¹⁷Hanki ana mofa'mo Poline tagri tamefi tavririno ne-eno kezatino zmasamine, ama vahera Marerisa Anumzamofa kazokzo eri'za eneri'za vahere. Ama vahe'mo'za kefozantamifinti tmahoke aheno tamavaresia naneke tamasmiku neaze. ¹⁸Hakare knafina ana mofa'mo anazanke hu'ne. Hu'neanagi Poli'ma anankege antahiazamo'a avesra higeno, rukrehe huno ana avamuku anage hu'ne, Nagra Jisas Kraisi agifi hugantoanki atiraminka evuo! Higeno ana mofara atreno atirami'ne.

¹⁹Hu'neanagi ana mofa'mofo kva vahe'mo'za zamema ante'za zgoma e'neriza zama vige'za, Poline Sailasi'kizni zamagra ome zanazerite'za, zanavazu hu'za kva vahe'zgare maketi kumapi uhanati'naze.

²⁰Zamagrama kagota hu'za ke fakohu (megistret) kva vahe zgare zanavare'za vute'za anage hu'naze. Ama netremokea tagri ran kumapi vahera zamazeri savari neha'e, na'ankure zanagra Juda netrenkike, ²¹zanagrama vahe'ma rempi hunezmike amaza hiho ha'azamo'a, Romu vahe'mota tavutava'za ha'renerante. ²²Rama'a vahe'mo'za eri atru hu'za ha' rezmantageno, ke fakohu kva ne'mo Poline Sailasi kizni kukena zani'a eri vararo hutreteno, knonteti knonkeve zanami'o huno huzmante'ne. ²³Tusiza hu'za sefu knonkeve znamite'za, kina nOMPI zanavare'za ome matevu'za nezanatre'za, kina kva ne'ku hunte'za, kegva huso'e huo hu'za asami'naze. ²⁴Ke fakohu kva vahe'mo'za, kina nOMPI kva ne'ku, kina nOMPI avarento hia ke antahiteno, agu'afinka me'nea kinanOMPI zanavarenteno, zafafi zanagia erinteno anaki znantege'ne mani'na'e.

²⁵Kenage amunOMPI Polike Sailasikea, Anumzamofontega nunamune zgame'ene nehakeno, ruga'a kina vahe'mo'za zanantahi'naze. ²⁶Ana nehakeno ame huno tusi'a imi enerigeno kina vahe nomofo agafa'amo'a tore tore hu'ne. Ame huno maka kafamo'a anagigeno, maka kina vahe zamazampi rente'naza nofimo'a evurami'ne. ²⁷Kina vahete kva ne'mo'a avu vase'nefinti otino, keana kafana anagi vgare'negeno, kazinknoma'a erino agra'a ahefrinaku hu'ne, na'ankure agesama antahiana hago kina vahe'zgamoz'a fre'naze hanuno ana hu'ne. ²⁸Hu'neanagi Poli'a amanage huno ranke hu'ne, kagra kavufarera mago'zana osuo, na'ankure tagra ama ofreta maka mani'none! ²⁹Tavi tagita eho huteno ana kina nompinka ufareno Poline Sailasi kizni zanagiafi ahirahi neregeno utraka huno umase'ne. ³⁰Anante otino zanavreno atiramino fegi nevuno, amanage huno zanantahige'ne, Ina kna hanugeno kefo zaniafinti nahoke ahegahie? ³¹Ana ke'arera anage hu'na'e, Ramofo Jisasinku kamentinti nehugeno, kefozanka'afinti kahoke neheno, nonka'afima nemani'za naga'moza'nema zamentintima hanageno'a zamahoke ahegahie. ³²Anage nehuke Ramofonke nesamike, maka noma'afima mani'naza vahera zamasami'na'e. ³³Ana kenageke kina nonte kva nemo'a zanavufafi zanahe'naza namuna sese huznantetegenog, agri'ene noma'afi mani'naza nagara mono ti ana keregeke frezmante'na'e. ³⁴Kina nonte kva ne'mo zanavreno noma'afi

ufareno ne'za ome tro huznanteteno, Anumzante amentinti hia zankura, tusiza huno ana miko noma'afima nemaniza naga'anena musena hu'naze.

³⁵Nantera ko'atigeno ke fakohu kva vahe'mo'za, ati vahe zga huzamanteno anage hu'ne, zanatrenke'za ana ne'trena vi'o hu'naze.

³⁶Kina nonte kva ne'mo Polina amanahu ke ome asami'ne. Ke fakohu kva vahe'mo'za (jas) zanazeri meg'i'a zanatre'o hunantage'na e'noe, hagi menina atiramita tanarimpa frune vi'o huno zanasmi'ne. ³⁷Hu'neanagi Poli'a ati vahe'mokizmi ke nona'a amange huno zamasm'i'ne. Zamagra rama'a vahe zamufi knare ke agafa e'orine'za havige zante takenaze, tagranena Romu mopa agafa vahe mani'nonanagi, kinafi tavare'za emerante'naze. Hagi menina oku'a hurantenaku nehazo? Tamage anara osu'tfa hugahaze! Zamagra'zmi e'za eme tavare meg'i tatregahaze.

³⁸Ana naneke ati vahe'mo'za ke fakohu kva vahe ome nezamasmige'za nentahi'za, Poli'ene Sailasike Romu vahe mani'no'e hukema ha'azanku zamagogo fege'za koro hu'naze. ³⁹Ana hute'za vu'za Polina zamasunku ke ome huznantete'za, zanavre'za atirami'za ama ran (siti) kumara atreta vi'o hu'za mago'ane huzanante'naze. ⁴⁰Anama kina nompinti atiramitekea Lidia nontega vutene, zamentinti nehaza naga ome nezamageke, zamazeri hanaveti ke hunezmanteke atreke vu'na'e.

Poli'ene Sailasikea Tesalonaika kumate manina'a naneke

17 ¹Amfipolisine Apoloniane ran kumatre ugatere'za vute'za, henka Tesalonaika rankumate Jiu vahe osi mono no (sinagog) anantega menere e'naze. ²Poli'a Jiu vahe'mo'za osi mono nozmifi mani'nageno marerino, korapa agrama nehiaza huno, tagufa mni fruhu kna (Sabat) zupa avontafepinti kea zamasm'ino, ³ana kemofo agafa'a eriamane nehuno huzamerino, Kraisina ahesnageno ata eriteno fripintira otigahie hu'ne. Ama ana Jisasinku'ma nehuana e'i Kraisi'e. ⁴Mago'a Jiu vahe'mo'zane, rama'a Anumzanku koro nehaza Griki vahe'mo'zane, zamagine a'nemo'zanena Poline Sailasi ene tragote'za hagerafi'za mani'naze. ⁵Hu'neanagi zamarimpa zamazeri otige'za Jiu vahe'mo'za antahi haviza hunezmante'za, kanivere'za kefo vahe maketi kumapi zamazeritru hu'za, ran kumapi ranke hute'za ana vahe'mo'za Jasoni nona tagana taganu vazi'za, Poline Sailasi kiznigu hake'za zanavre'za atru nehazafi vunaku hu'naze. ⁶Ana vahe'mo'za Poline Sailasi kizanima hake'za erifore nosu'za, Jasonine, mago'a zamentinti nehaza afuhe'inena zamazu hu'za rankumamofo kva (siti ofisa) vahete vu'za ranke hu'za anage huzmante'naze, ama vahe'mo'za mopane mopane hazenke eri fore nehaza vahera ama e'naze. ⁷Hagino Jesoni'a muse huno nantu vahe noma'afi osi'agna manihogu zamarente'ne! Zamagra Sisa hanave tra kea ha' renente'za anage hu'naze, mago kinima mani'neana agi'a Jisasi'e hu'za nehaze! ⁸Ana vahe'mo'za rama'a vahe'zga zamazerisavri nehazageno, rankumamofo kva vahe'mo'za ana kea antahi'naze. ⁹Anante

ran kumamofo kva vahe'mo'za Jesoni ene zamentinti naga'mo'za mizasaza zago erite'za, henka zamatrage'za vu'naze.

Beria kumate Poli'ene Sailasike mani'na'a naneke

¹⁰Zamentinti naga'mo'za ame hu'za Poline Sailasinena kenageke huznantage'ke, Beria ran kumate vu'na'e. Uhanatiteke Jiu vahe osi mono nonte vu'na'e. ¹¹Ana Jiu vahe'mo'za antahi'za zamimo'a knare huno ama hu'negu, Tesalonaikama nemaniza Jiu vahe'mo'za nehazaza osu'naze. Na'ankure mono kema ha'ana muse hu'za eneri'za, tamage amagemo'a hu'nefi hu'za maka zupa avon tafepi ke'ankere'naze. ¹²E'ina hu'negu rama'a Jiu vahe'mo'za zamentinti nehazageno, zamagima me'nea Griki a'nene vene'nemo'zanena zamentinti hu'naze. ¹³Hu'neanagi Tesalonaika mani'naza Jiu vahe'mo'za antahizama, Poli'a Anumzamofu kea Beria ome huama nehie kema nentahi'za, zamagranena anantega e'za, keomente emente hu'za, zamagu zamagesa eri savari hu'naze. ¹⁴Anante Anumzante mani'naza naga'mo'za, Polina huntageno ame huno hagerinkena vu'ne, hianagi Sailasi'ene Timotikea anante Beria kumate mani'na'e. ¹⁵Hanki Poli'ene vu'naza vahe'mo'za, avega hu'za Antens ran kumate ome netrazageno, Sailasine Timoti kiznigu nagritega ame huke e'o kema humazamantetege'za, atre'za ete Beria vu'naze.

Poli Atens ran kumate mani'nea naneke

¹⁶Poli'ma Atens kumate zanavega anteno mani'negeno, rimpamo'a kna nehigeno asunku hu'ne, na'ankure ana kumapina havige anumza tro'ma hunte'naza'zamo'a, rama'a me'negeno negeno ana hu'ne. ¹⁷Ana huteno mago'a Jiu vahe'ene, Anumzamofonku koro nehaza megia vahe'ene osi mono nomp i ome zamaretru huno nezasmimo, maketi kumapi maka kna emeri atruma haza vahera nanekea zamasmine. ¹⁸Anahu kna huno mago'a Epikurien vahe'ene, Stoik vahe'mo'zanena vahe'mofo nomani'zama rezagane'zama negaza vahe'mo'za (Filosofa) kehakare hunentageno mago'amo'za anage hu'za antahi'naze, Nankna ke ama neginagi vahe'mo'a hunaku nehie? Ruga'amo'za hu'za, Agra ru anumzanku nehia nere. Na'ankure Jisasi agi agenkene, fripintima oti'nea knare musenkegu hu'naze. ¹⁹Ana hutege'za Polina avareza (areopagus) kanisol vahe'mo'za ke erifatgo nehazare vu'za anage hu'naze, Knare ama'i kahefa kema rempima hunezamina kea hananketa antahisumpi? ²⁰Na'ankure tagra tagesa hakare huna ke kagra nehane, hagi ke agafa'amo'a na'ane hu'nefi antahinaku nehune. ²¹Maka Antens vahe'ene ru mopareti vahe'mo'za ana kumapi emani'naza vahe'mo'za knazimi'a atre'za manine'za kahefa zama fore hia zamofu naneke huge antahige hu'naze.

²²Ana higeno Poli'a kanisol vahe'mo'za ke erifatgo nehazare otino (Areopagus) anage hu'ne, Antens vahe'mota, nagrama koana hakarezante

tamagra monora hunentaze. ²³Na'ankure nagra vano nehuna urava'o hu'na rezagane'na monoma hunentaza'zama koana, mago itama (alta) husga huntenarera anage hutma krente'naze, ontahinona Anumzanetege hutma hu'naze. E'ina hu'negu ontahinetma mono'ma hunentaza zamofonku, e'i nagra huama hu'na neramasmue. ²⁴Ama mopane maka'zama me'neaza tro hu'nea Anumzamo, Agra'a monafine mopafinena Ra mani'neni, vahe'mo'za zamazanu ki'naza mono nompina nomanie. ²⁵Mago'a zankura atupara nosigeno vahe'mo'za zamazanu tro hu'za aza nosaze. Na'ankure agra'a asimu anteno mani'zana zamigeno zamasimu antageno, maka'zana hakare vahe'mofona nezamie. ²⁶Magoke vahepinti Agra maka kaziga kuma ante'za manisaza vahera tro hu'ne. Mopafi manivitesazegu nehuno, manisnaza kna'a nenteno, kumama manisaza kumara, kankamu zamino e'ire manigahaze huno huzmantetere hu'ne. ²⁷Anumzamofonku hake'za nege'za, agrikura zamazama hu'za hake'za erifore hu'nazanagi, agra tagrira magoke magokemota afetera omani'ne. ²⁸Na'ankure agripi manineta mika'zana nehuta, ama mopafina manita neone, mago'a tamagri fronka kemo'a anage hu'ne. Na'ankure tagranena agripinti fore hu'none. ²⁹Anumzampinti fore huta mani'none hanuta, kolima silvare'ma, havereti'ma vahe'mo'zama antahintahi zamiretima tro huntea zankura Anumzamo e'inahu kna hu'ne huta ontahisune. ³⁰E'inahu hu'za zamagena hu'miza e'naza kna'a, Anumzamo'a agha ontahi'ne, hagi menina agra miko kaziga vahera hankave nentake ke huno, tamagu'a rukarehe hiho huno hu'ne. ³¹Na'ankure ama mopama Agrama refako hania kna, agra'a fatgo avu'ava zampi ko huhampri tegeno me'ne. Mago ne' huhampri ante'neana miko vahera amate huzameri huno fri'nefinti azeri oti'ne.

³²Fri'nefinti azeri oti'nea naneke nehige'za nentahiza, mago'amo'za agiza re'naze. Hianagi mago'amo'za anage hu'naze, mago'ane ama naneke hananketa antahigahune hu'naze. ³³Poli'a havige mono kumara (Areopagus) atreno vu'ne. ³⁴Hu'neanagi mago'a vahe'mo'za Poli'ene hagerafi'za zamentinti hu'naze. Anampintira magora Dionisiosie nehaza nera kanisol vahe'mo'za ke erifatago nehaza kumate kanisol nere, magora Damarisie nehaza a'ene mago'amo'za zamentinti hu'naze.

Poli'a Korinti kumate mani'nea naneke

18 ¹Ana amefiga'a, Poli'a Anten kumara atreno Korinti vu'ne. ²Anantega mago Jiu ne' ome keno erifore hu'neana, Pontusi kasente'naza ne' agi'a Akuila'e, mensin'tfa nenaro Prisila ene Italiti ena'e. Na'ankure Sisa Klaodiasia'na mika Jiu vahe'ma Romu nemani'za vahera atretma viho huno huzmantegeni Poli'a zanagri ome zanage'ne. ³Na'ankure agrama mago'zahu eri'zama e'nerigu huno magopi zanagri'ene mani'neni eri'zana eri'ne, (na'ankure zamagra mago kna eri'za antahine'za nofiteti seli

no nehatiza nagare). ⁴Nehuno mika mni fruhu kna (Sabat) zupa atru nehu'za mono nehaza osi mono nOMPI, marerino mono naneke huno, Jiu vahe'ene Griki vahera masevenke huno zamarimpa eri vakaneno zamasm'ine.

⁵Masedoniati Sailasi'ene Timotike eramike akeno, Poli'a agafa huno mika Jiu vahera zamazeri atru huno mono kege'za maka kna nezamasm'ino, Jisasi'a, Agra'a tazahunu taguvazi nere huno eriyama huno zamasm'ine.

⁶Ana nehigezama ha'ma rente'za krunagemu huntaza vahera anakre ku'a (saket) zafino kugusopa rupopo nehuno anage huno zamasm'ine, tamagri kora kumimo'a tamagritami tamasenire megahie! Nagripina mago knazani'a omane'tfa hugahie. Amareti agafa huno vaniana, Jiu vahe'rompage megia' vahete vugahue. ⁷Huno nezamasm'ino Poli'a anante osi mono nontetira atreno, mago megia' nera agi'a Taitus Jastusi'e nehaza ne'mo, Anumzante mono hunentea ne'mofo nontega atru nehu'za mono nehaza nomofo asopare me'ne'geno vu'ne. ⁸Atru nehu'za mono nehaza nonte kegva nehia nera (presitent) Krispusi'e nehaza ne'ene, mika agri kvafi nemaniza vahe'mo'za Ramofonte zamentinti hu'naze. Ana nanekema nentahi'za, rama'a Korinti vahe'mo'za zamentinti hu'za mono ti fre'naze. ⁹Ramo'a kerage ava'nagna zampi anage huno Polina asami'ne, korera osuo, keaga huvava nehunka, keagama hu'zana azeoritfa huo. ¹⁰Na'ankure Nagra kagrane manigahuankino, kahe frikura mago'mo'a kagri kavufarera azana onte'tfa hugahie, na'ankure ama'na rankumapina Nagri vahera rama'a mani'naze, nehigeno ke'ne. ¹¹Higeno anampina mago kafugi sigisi'a ika mani'nenno, ana vahera Anumzamofu keaga rempi huzami'ne.

Poli'a Gavana ne' Kalio avuga oti'ne

¹²Kalio'ma, ugagota ra kvama (Gavana) Akaea kumatema mani'nege'za, Jiu vahe'mo'za oti'za mago antahintahi eri retro hu'za, avare'za ke refakohu trate (koti nonte) vu'za, ¹³anage hu'naze, ama ne'mo'a ruzahu huno tagri tra kemo'a osu'nea kante, vahekura mono antahiho huno nezmasmie nehazageno, ¹⁴Poli'ma agi'reaka hu'na ke hanuanki huno higeno, Kalio'a amanage huno Jiu vahera zamasm'ine, mago'a hazenke zankuro, tusi'a havi kefo zanku Jiu vahe'motmama hanazana, knare hanige'na, nagra tamagri kerera hagerfigahue. ¹⁵Hianagi amama hunentaza kemo'a tamagra kegu'ene tamagigu'ene, tamagratmi kasege eri hankave netizanki tamagratmi erifatgo hiho. Nagrira nave'osigu ama'na naneke'a erifatgo osugahue. ¹⁶Anante kema refakohu tratetira agra'a zamahe natitrene. ¹⁷Anante mika'mo'za mono nonte kva nehia ne' Sosteni azeri'za kema refkohu tramofu avuga agafa hu'za hae'naze. Ana hu'nazanagi Galio'a ana zankura agesa ontahi'ne.

Poli'a Antioku kumate Siria ehanati'nea naneke

¹⁸Mago'a rama'a knama Korinti kumate Poli'a maniteno'a, afuhe'mokizmia hufu huno mani'neho hunezmanteno, votifi hageri

tkaheno Siria nevicegeke Prisila'ene Akuilake agrane vu'na'e. Na'ankure Anumzamofu avure'ma huvempama hu'negu, Sensarea kumate Poli'a anuzokara vagateno erivo'vo hu'ne. ¹⁹Efesasi uhanatite'za, anante Poli'a Prisila'ne, Akuilagizni'a ome nezanetreno, agra osi mono nompni umarerino, Jiu vahe'ene naneke hugantugma hu'za antahi'naze. ²⁰Antahige'za za'zakna tagrane manisane nehazageno, knarere huno osu'ne. ²¹Hianagi hufu hunezmanteno anage hu'ne, Anumzamofu avesizama me'nenige'na, ete'na tamagritega egahue. Anage nehuno Efesasi'ti'ma votifi,

²²vuno Saeseria unehanatino, Jerusalem umarerino mono vahera musenke hunezmanteno, anantetira Antioku urami'ne. ²³Antioku'ma mago'a knama maniteno, ana kumara atreno mago'mago kumate Galasiane Fezianena vano huno Jisasi amage nentaza disaipol nagara zamazeri hampo'na hu'ne.

Apolosi mono eri'za agafa huno eri'nea naneke

²⁴Mago Jiu nera, agi'a Apolosi'e, Aleksandria kumate kasente'naza nera, knare keaga nehuno avontafera antahi ankere'nea ne'mo Efesasi e'ne. ²⁵Agri'ma Ramofu Jisasi kanku rempi humizageno, hampo'natinu huzmenerino keaga nehuno, Joni'ma tima frezmante'nea zantfa antahi'neanagi, Jisasi avu'ava'mofu nanekea fatgo huno huzamasmi'ne. ²⁶Agra korora osuno, agafa huno osi mono nompina hu'ama huno mono nompina keaga hu'neanagi, zanagrama agri kema nentahikea, Prisilake, Akuilakea avareke va'azamoke Anumzamofu avu'avara mago'ene huhagro huke fatgo kante asami'na'e. ²⁷Akaea vuku Apolosi'a nentahige'za, mono (kristen) naga'mo'za azeri hanavetike nesamiza huso'e sa'e hunente'za, Jisasi amage nentaza disaipol nagatega azeri so'e hiho hu'za avonkretrenaze. Anante'ma unehanatino'a, Anumzamofu asunku'zamo zamaza hige'za zamentinti nehaza nagara tusi'a zampi zamaza hu'ne. ²⁸Na'ankure agra hampo'natinu Jiu vahera zamazeri hagro huno, mika vahe zamufi avontafepinti eriamu huno Jisasi'a Tazahu Nere (Kraisie) hu'ne.

Joni amage' nentaza disaipol nagamo'za

Efesasi kumate mani'naza naneke

19 ¹Apolosi'ma Korintima mani'negeno, Poli'a agu'afinka kuma tamimpi ufreno vuno Efesasi kumate uhnatinu, mago'a disaipol naga anantega ome zamageno erifore nehuno, ²zamagriku anage hu'ne, tamagra ma tamentintima hu'nazana, hago Ruotge Avamura erinafi? Agriku anage hu'naze. A'o Ruotge Avamura mani'ne huta tagra ontahitfa hu'none. ³Hazageno Poli'a zamantahige'ne, Nazamofonte mono tina fre'naze? Zamagra ke'nona hu'za, Joni'ma ti fre'zama huraveri'nea zantere. ⁴Poli'a huno, Joni'ma tima frezmante'neana, zamasunku

hu'za zamagu'a rukarehe hanaza tine huno frezmantene. Vahera zamasmimo, agri amage'ma ne'emofonte Jisasimpi tamentinti hiho hu'ne. ⁵Anankema antahite'za, Jisasi Ramofo agifi mono ti fre'naze. ⁶Hagi Poli'ma zamagrite azama antegenoa, Ruotge Avamu'mo'a zamagrite ege'za, agafa hu'za ruzamageru ruzmageru neru'za, henkama esiazamofa kasnampa kea huama hu'naze. ⁷Ana mika vene'nea 12fu'a naza eritru hu'naze.

Poli'a Efesas mani'nenono erizana hagerafino mago'ene eri'ne

⁸Hagi 3'a ikamofa agu'afina, Poli'a osi mono nompri ufreno korera osuno, antahintahizamia eriana huno agrarega zamatreku Anumzamofa avu'ava zankura huankereno zamasmine. ⁹Hu'neanagi mago'amo'za antahi'za zami'mo'a hampo'na atige'za, zamentinti hu'zankura zamagena hunente'za, ana vahe'mokizmi zamufi Ramofo avariri kankura huhaviza hunentageno, zamagrira nezamatreno, Jisasi amage' nentaza disaipol naga nezamavreno, mago nera Tairanusie nehaza ne'mofo rempi huzami nonte via'zamo, mika zupa vahe'ene keaga hu'ne. ¹⁰Amanahu'zana tare kafufi fore huno vu'ne, tarega Jiu vahe'ene Griki vahe'ma Esia provinsifi nemaniza vahe'mo'za Ramofo naneke antahi'sazegu anahura hu'ne.

Skevana seveni'a mofavre naga'mokizmi naneke

¹¹Anumzamoa Poli azampi huvazino rama'a ruzahu ruzahu avame'za mago'ane erifore hu'ne. ¹²Ana hinogu asime nehamia nosivane (ankasipimo'ene), masine'za kave kre kenane (apronimo'a), Poli avufare eme avako hute'za, eri'za kri vahe zamufare ome antageno, krizmimo'a vgaregeno, havi avamumo'a zamagripintira atirami'ne. ¹³Mago kevu Jiu vahe'mo'za retro hu'za mago mago kumate vano vano nehu'za, Jisasi agifi huvame hu'za havi avamura huntenaku nehu'za, ana huvava hu'za nevu'za anage hu'naze. Poli'ma huama nehia Jisasi agifi atiramio huta tagra hunegantone. ¹⁴Mago Jiu vahe'mokizmi rankva nera Skeva'e nehaza ne'mofona, 7ni'a mofavre zga'amo'za anahu'zana hu'naze. ¹⁵Hianagi ana havi avamu'mo'a ke'nona zamire huno zamasmine, Jisasina nagra ke'na antahi'na hu'na, Polina ke'noe, hagi tamagra izagate? ¹⁶Higeno agu'afima havige avamu'ma fre'nea ne'mo'a zamagumpi takaureno, himamutino zamaheno rehapatige'za, korankno eneriza ana nompinti atiramiza zamufa zamapake fre'naze. ¹⁷Efesasi kumate nemaniza Jiu vahe'ene Griki vahe'mo'zane ana ke nentahizageno, tusiza huno zamagogo nefege'za Anumza Jisasi agi'a erisaga hu'naze. ¹⁸Rama'a zamentinti vahe'mo'za eama hu'za zamassunku hu'za, havi zamuzma'zana eriana hu'naze. ¹⁹Huama nehu'za zamene vahe'mo'zane avuatga vahe'mo'zane kre'naza avontafe tamina eri'za amate hakare vahe zamure tevefi kre hana hu'naze. Ana avontafe miza se'naza zgoa 50 tauseni'a zgo atre'naze.^d ²⁰Ramofo hanavere, e'inahu'zana fore nehigeno, Ramofo nanekemo vuno eno huno hankavetino me'ne.

^d 19:19 mago mago zgomofa kna'amo'a, 50 tauseni'a zge'gnareke eri'za eneriza miza e'neri'za zgogu hu'ne.

²¹Anazana fore hutegeno Poli'a Masedonia kaziga vute'na Griki kaziga nevu'na Jerusale kumate vute'na, henka'a Romu kuma enena ome kegahue huno agha antahine. ²²Tare azahu netrema, Timotine Erastusine huzanantegeke Masedonia kaziga vakeno, osi'agna Poli'a, agra Esia mani'ne.

²³Ana knafina, Jisasi Kamofonkura tusi'a hazenke Efesasia fore hu'ne. ²⁴Na'ankure magora silvare tuzampaza tro nehia ne'mofo agi'a Demetriasikino, silvareti mago amema'a trohu'neana, Atemasi mono hunentea kna'za tro hu'ne. Anazama tro'ma nehaza naga'mo'za, tusi'a zgokrerafa anazantetira tro'nehaze. ²⁵Demetriasi'a anahu erizama antahi'naza eri'za vahera kehutru huno anage hu'ne. Ama vahe'motagi, amanahu eri'zantetira zgokrerafa erifore nehune hu'ne. ²⁶Hanki tamagra ketma antahitma nehaze, Efesasi ana nosianki, Esia kokampina Polima vahetamima kehiazamo, vahe'mo'ma azanteti'ma trohu'nea anumzana, e'i tamage huno anumzana omanitfa hune huno tusi'a vahe krerafa zamazeri ruvahe nehie. ²⁷Hago menina hazenke fore hu'ne, tagri zgo erizankera eri havizana osugahie. Hianagi so'e a' anumza Atemisi mono nomo'a amne zankna hanigeno, Esia kokampi vahe'mo'zane, ama mopa kagi'afi vahe'mozama, mono hunentaza vahe'mo'za atre'sageno, ana a'mofo hanave'amo'a haviza hugahie.

²⁸Anankema nentahi'za, zamarimpamo'a haviza nehige'za oti'za keza ati'za Efesasia so'e rantia, Atemisi'a agrake mani'ne! ²⁹Higeno rankumapina rama'a kereso nehu'za, vahe'mo'za magoka zamagare'za krina nehazage'za mani'neza negaza kumapi (stetium) ufre'za, Mesadoniati Poli'enema e'na'a netre Gaiusine Aristakusikiznia zanavazu hu'za vu'naze. ³⁰Poli'ma ana vahe'zgamoma atru hu'nefima ufreku'ma nehige'za, Jisasi amage nentaza disaipol naga'mo'za otre'naze. ³¹Higeno mago'ene mago'a Esia kumate kva vahera, Polina knampa'agi'za anama atru hu'nafina keke huntonanki uofreno hu'za hampo'nati'za kea atrente'naze. ³²Higeno mago'amo'a magoke zanku kezati'zageno, mago'amo'a otage zanku kezati'zageno, anama atru hu'za negaza vahe'mo'za tusi savari nehazageno, rama'amo'za nahige'za atru hu'nazo ama'osu'naze. ³³Vahe'pintira Aleksandana Jiu vahe'mo'za atufe'za zamuga eme nente'za, ama ana zamofu keaga eriamu hunka zamasmio hu'za huhanavetinaze. Aleksanda'a ama ana vahe'mo'zama hazankere nona huzmanteku azana antesga hu'ne. ³⁴Hu'neanagi kazama Aleksanda'a Jiu ne'ma mani'nege'za nege'za, ana mika vahe'mo'za magoke kere zamagerura erinte'za, 2'a auamofu agu'afina kezati'za, Efesasi'ra knare huno agatererfa rantia, Atemisi agrake mani'ne! ³⁵Rankumapima avoma negrea (kuskus) ne'mo ana vahe kevua zamazeri rava huteno anage hu'ne. Efesasi vahe'motma antahiho, ina vahe'mo antahino keno osu'ne? Efesasia ranku'mamo'a Atemasi agetererfa ra anumzamofu

mono nona kegva nehie. Ana a'mofo amema'ama monafinti'ma asga hurami'ne. ³⁶Ana hu'negu ama anazankura ke hakare osugahaze, taganetma mani'netma ame'amara osutma tamage'sa antahitetma anazana hugahaze. ³⁷Na'ankure tamagra ma, ama ana vene'nema zamaretma e'nazana, ra mono nompintira kumazafa ose'na'e, tagrama anteneta mono hunentona a' anumzankura (goddess) huhavizana huonte'na'e. ³⁸E'ina'ma Demetriasi'o agrane eri'za eneriza naga'mo'zama rumokizmima huzmante'nesigetma ke refakohu nonte zamaretma vinke'za, kva vahe'mofo zamure keaga hugantu hugama hugahaze. ³⁹Hu'neanagi mago'anema keagama hunaku hanutma, vahe'ma atruhu'za keagama azerirva nehaza knazupa kanisol vahete mareritma azerirava hugahaze. ⁴⁰Na'ankure menima ke hakarema nehuna zankuma, Romu rankva vahe'mo'za tantahigesageta hazenkefi manigahune. Na'ankure eriana huta zamasmisuna knare agafa'a omane'ne. ⁴¹E'inahu kema huno nezmasmino'a, ana atrua eritrege'za vuza e'za hu'naze.

Poli'a Masedonia kzigane Gris kazigane vu'nea naneke

20 ¹Ana ke hakarema haza'zamo vgaregeno, Jisasi amage nentaza disaipol nagara Poli'a kehige'za emeritru hazageno, zamumro kea anteteno, hufu huno knareki manineho hunezmanteno, atreno Masedonia vu'ne. ²Ana mopa kazigama vano huno rama'a keretima zamentinti naga zamazeri hanavematiteno, Grisi ehanati'ne. ³Anatega 3'a ika maniteno, Siria kaziga ventefi vunaku'ma nehigeno, mago'a Jiu vahe'mo'za haenaku ke retro haza nanekema nentahino'a, eteno Masedonia mopafi kampi vunaku Poli'a agha antahi'ne. ⁴Mago'a vahe'mo'za Poli'ene vu'nazana, Beria kumateti ne' Sopati, Perusi nemofoki, Tesalonikati Aristakusi'ene Sekanduskegi, Debe kumateti Gaiusiki, Esia kumateti Timotiki, Tikikusiki, Trofimasiz'za vu'naze. ⁵Ama ana vene'nemo'za vugote'za Troasi ome tavega ante'naze. ⁶Zo'ore bretima Juda vahe'mota nenona kna'mofo amefiga'a hompama vagaregeta, Filipai kumara atreta ventefi mmerita 5fu'a zge ferupi nevuta, Troasi kumate tavega ante'nare uhnatita ana kumate mago sonta umani'none.

⁷Ana Sontamofo pusa kna're bretima kori'za (komonion) neku eritruma nehunkeno'a, Poli'a oki vugahue huno agha nentahi'no keaga nezmasmino, mono kea huvava nehigeno kerage amu'no ase'ne. ⁸Anagamu kino mareri'nea nomofo hunaraginte pinka rama'a rampe tvira manenegeta atrua hu'none. ⁹Hagi mago nehaza nera agi'a Jutikasi'e, zaho kamofu atupare (windo) marerino mani'neni, Poli'ma keagama huvava huno nevigeno'a, antahirega avukoko higeno, mase himarenefinti, tagufa nonteti anagamuti asaga huramino ahe fri'ne. ¹⁰Hianagi Poli'a uramino agri agumpi umseno azana rugagino anu'nekino tmasunkura osiho hu'ne. Tamagra antria osiho, na'ankure agra ofri'neanki amne mani'ne

huno hu'ne. ¹¹ Nehuno Poli'a eteno anagamu marerino, bretima korige'za netageno, za'za kna zamagranena keaga nehigeno ko'atigeno zamatreno vu'ne. ¹² Ana nehazavea ofrino mani'nege'za muse nehu'za avare'za nontega vu'naze.

Ventefi Mailitusi uhanati'nea naneke

¹³ Ananteti tagra ventefi umarerita Asosi vunaku nehuta, Polina avarenteta vunaku tagesa antahi'none, na'ankure ama kana agra'a azeri antefatgo huno, agra mopafi vugahue huno agesa antahi'ne. ¹⁴ Asosima rutagiha higeta, agrira ventefi avarentata, Miteleni ti amunompi me'nea ran kumate vunaku vuvava hu'none. ¹⁵ Anantetira maseta mago knarera ventefi nevunkeno ko'atigeta, Kiosi tinkenare uhanatita, mago knarera Samosi uhanatita, hagi ana kna'mofo amefiga'a Mailitusi vu'none. ¹⁶ Na'ankure Poli'a Efesasia agateregahue huno antahi'ne, na'ankure Esia za'za kna omani'na ko knare'ma hanuna Jerusale nagra mani'nesugeno hompa (pentikos) kna fore hugahie hu'ne.

¹⁷ Mailatusi uhanatite'za, Poli'a ke atrezmanteno Efesasi mono nonte kva (elda) vahe'zga eme nageho hu'ne. ¹⁸ Ke hige'za agrite ageno, amanage huno zamasmine, Pusante'ma Esia mopare nagiamo rentoa zupa, tamagripima maka zupa mani'na e'noana, tamagratmi ko ketma antahi'naze.

Esia kaziga e'na tamagrane nemanugeta nagri agafa'a nage'naze. ¹⁹ Jiu vahe'mo'za nazeri havizahu kema retro'ma haza zamo'a tusi'a knazamo nagri navufare ege'na anterami'na zavira nete'na, Ramofo erizana eri'noe. ²⁰ Tamagri'ma tamaza hania kea, korera osu'na huama hu'na tamasmugetma antahi'naze. Vahe'pina neramasmine, nonte nontera tamasmugetma ko antahi'naze. ²¹ Jiu vahe'ene Griki vahera hu'ama hu'na tamagu'a rukarehe hutma Anumzante ne-etma, Ranti Jisasinte tamentinti hiho hu'na zamasmine. ²² Hagi menina Ruotge Avamu'mofo ke amage antena, nagra Jerusalemi nevue, nagri navufarera na'a fore hugahio, ontahi'noe. ²³ Hankino Ruotge Avamu'mo nagrira nasamino, mika ranra kumapina, kina hu'zamo'ene kna'zamo'enena kavega ante'ne hu'ne. ²⁴ Hu'neanagi navufagura nagesa nontahue, tusi'a zana eri'zani'a erivaga nere'na, Ra Jisasi'ma eri'zama namino vahe'ma zamasmio hu'nea eri'za eri'na Anumzamofa asunku zankura knare nanekea vahera zamasmigahue. ²⁵ Hagi menina nagra antahi'noankitma, azago menima Anumzamofa kumakuma neramasmumota, mago'enena nagri navugosafina onke'tfa hugahaze. ²⁶ E'ina hu'negu, meni nagra huama hu'na nerasmue, miko vahe'mofo koran kumimo'a nagritera ome'tfa hugahie. ²⁷ Na'ankure Anumzamofa miko avesizama'a nagra korera osu'na hu'ama hu'na nerasmue. ²⁸ Tamagratmia kegva nehutma, lama afu kevua kegva hiho, Ruotge Avamu'mo tamazeri antegetma

kva hu'naze. Agrama magoke Mofavre ama hunteteno koranteti'ma mizama ase'nea Anumzamofono mono nagara zamazeri fatgo hutma kavagri zamantegahaze. ²⁹Nagrama tamatrena vanugeno'a amefiga, nagra antahi'noankino, mago'a afi' kra esaniazamo lama afu kevua zamazeri savri hugahie. ³⁰Kagri ka'a nagapinti enena vahe'mo'a otino tamage kea eri ruvahe hu'za rempi hunezmi'za, Jisasima amage' nentaza disaipol nagara zamagrarega zamavrenteku hugahaze. ³¹E'ina hu'negu tamavura omase kava hute maniho, tamagesama antahi ankeresazana tagufa zagegfumofono agu'afina hanine zgenena ontaganena kazigzi hu'na zavira nete'na, mago'mago'moka kavumarora ante'noe. ³²Hagi menina nagra Anumzante'ene, Agri asunku'zamofono kere maniho hu'na huneramantoe. Ama kemo'a tamazeri hanave netina, ruotage'ma hu'za mani'naza nagapi tamagra erisanti haregahaze. ³³Mago'moka silvaguro, Goliguro, kukenagu nagra kenasane nehu'na keaga nosue. ³⁴Tamagratmi ko antahita keta hu'naze, ina zanku'ma nagri'ene, magoka vano nehuna naga'enema atupa'ma nehunazana, ama anazamo erifore huno neramie. ³⁵Ana mika zampina nagra ko hugaveri'noe, anahu'ma hunka hanavetinka eri'zama erisanana, hanave'a omane vahera aza nehunka, Ramofono Jisasinkere kagesa antahio, Agra'a anage hu'ne, ami'zamofono asomumo'a, eri'zamofono agaterene hu'ne.

³⁶Poli'ma ana nanekema huvama nereno'a, agra renareno zamagrane nunamu hu'ne. ³⁷Anampina zamagra tusi zavi'ateza Polina anankempi azeri anuki'za antako hu'naze. ³⁸Kema huno mago'ene onagegahaze hu'nea kegura, tusi zamasunku hu'naze. Nehu'za ventema me'nerega avare'za vu'naze.

Poli'a Jerusale kumate vu'nea naneke

21 ¹Tagra anama huteta, zamatrete ventea atufegantu hagerimpi atreta fatgo huta vuta, Kozie nehaza hageri amunompi me'nea osi mopare (ailen) vuta, nanterana Rodsie nehaza kumate (ailen) uhanatiteta, anantetira Patara mopare uhanati'none. ²Patara atreta, Fonesia kumate vunaku nehia vente keta eri fore huteta, miza huta marerunkeno atreno timpi vu'ne. ³Saiprasima ventemo unemnia kuma hoga kaziga agatereta, Siria Provinsifi vuta, Taia kumate umani'none. Na'ankure ventemo'a mago'a fenona anante eri netregete. ⁴Jisasima amage'ma nentaza disaipol nagara ome nezmageta, ana kumate 7ni'a kna mani'none. Zamagra mago'ene Avamu'mo zamazeri otige'za Poliga Jerusale ovuo hu'za hu'naze. ⁵Ananknama vagaregeta, atreta kantega nevunkeno, ana mika'mo'zane, a'ne zamine, mofavre naga'zamine tagrane magoka vazageta ana kumara atreta vu'none. Hagerinkena vuta tarena reta nunamuna ome huteta, ⁶mani'neho huta mago mago'mokizmi hunezmanteta ventifi marerita nevunke'za, zamagra rukrahe hu'za nozimirega vu'naze.

7Tagra Taia kumara atreta vuva vuva huta Tolemeas uhanatiteta, mono nagara ome nezmatagita anante magokna mani'none. 8Nanterana ana kumara atreta, Siseria ehanatita mono nehia ne' (evangelis) Filipia 7ni'a naga mono kva zamazeri otinafinti mago zamimofono nonte umani'none. (Apo 6:1-6) 9Ana ne'mofona 4'a ve e'ori kasnampa mofane'zga'a mani'naze. 10Anante mago'a kna mani'nonkeno, mago kasnampa nera Agabasi'e nehaza ne'mo, Judia kazigati eramino anante e'ne. 11Tagra mani'nontega Agabasi'a eno, Polina amunofi'a (belt) erino agra azante ene agiare renenteno anage hu'ne, Ruotge Avamu'mo'a anage hie, Amanahu kante Jerusale mani'naza Jiu vahe'mo'za ama amunofi'mofonefana azeri'za kina rente'za megia' vahe zamazampi antegahaze. 12Ana naneke antahiteta, tagrane anampi nemani'za vahe'ene kazigazi huta, Poliga Jerusalea mareorio huta asami'none. 13Anante Poli'a kenona zamirera anage hu'ne, Tamagra nahigetma zavira netetma, narimpamofona nazeri kna nehaze? Na'ankure nofinukera nazeri'za anaki nantehogukera trora osuanki, Ramofo Jisasi agire Jerusale fri'naku retro nehue. 14Na'ankure agra ketia ontahisiazana higea, tagra kea osuta Ramofo avesi'zamo fore hanie huta hu'none.

15Ana knama evutegeta trotra nehuta otita Jerusale vu'none. 16Mago'a Sisaria kumate nemniza disaipol nagamo'za tagrane ne-eza tavare'za Saiprasi ne' Masoni nompivi vazageta, korapa amage nentea disaipol ne'mofono nompivi umanigahune hu'nona ne'mofono nompivi umani'none.

17Jerusale uhanatunke'za Anumzamofono naga'mo'za muse nehu'za tavatagi'za knare hutma aze hu'naze. 18Uvasonkeno ko'ma atigeno, Poli'a, Jemisine maka mono kva vahe'z gama (eldas) mani'naza ome zamagenaku tagrane vu'ne. 19Poli'a ome zamageno zamatagiteno, agra agafa huno mago' mago'zama Anumzamoma' mono eri'za megia' vahepima e'nerigeno hu'neazana zamasmine. 20Ama ana nanekema antahite'za, Anumzamofono agi erisaga hu'naze. Zamagra anage hu'za Polina asaminaze, kagra nerafuga antahio, nama'a tauseni'a Jiu vahe'mo'za zamentinti nehu'za, Mosese Kasege'ne amage' nentaza vahe'mo'zanena hamp'natiza amage' nentaze. 21Mago'a vahe'mo'za anage hu'za kagrikura zamasmine, kagra maka Jiu vahe'mo'za megia' vahepivi maninazana, Mosese Kasegemo'a taza osugahie hunka nehunka, mofavreramina zamufa taga huozmanteho nehunka, tagri tavu'tvamofono avu'ava osugahaze hunka hu'nananke antahine. 22Tagra na'a hugahune? Kagrama kamama e'nana nanekema zamagra antahisu'za tamage hugahaze. 23Ana hu'negu tagrama kasmisunaza huo. 4'a vene'nemo'za Anumzamofono huvempa hu'za maninaze. 24Hanki zamavarenka kigrane magoka tamazeri agru nehutma, zamazoka'ma haresazazana miza sezmantegahane. E'ina hananke'za, maka vahe'mo'za antahi'za kema hazage'za kagrikuma antahinazana tamage hu'naze hugahaze. Hu'neanagi kagraka'a kasegea

amage antenka manigahane. ²⁵Hu'neanagi megia vahe'ma zamentinti nehaza vahetega, tagra avonkreta, havi anumzante kre sramna vuntesia zgagfane, korane anankema taga osu zgagfane onetma, monko'zana atreho huta tagesa antahiteta kre zami'none. (Apo 15:29) ²⁶Nanterana Poli'a zamareno agrane ana vahe'ma zamazeri agru huteno, ra mono nOMPI vuno, ana zupa mago mago'mofonte kre sramna vuno azeri agaruhu kna vgaregahie huno ome zamasmi'ne.

Polina ra mono nOMPI mani'nege'za azeri'naze

²⁷Ni'a kna vagare'za nehigeno, Esia provinsifinti Jiu vahe'mo'za ra mono nOMPI mani'nege'za nege'za, rama'a vahe zamarimpa zamazeri otige'za Polina azeneri'za, ²⁸anage hu'za ranke hu'naze, Israeli vahe'mote taza hiho! Ama ne'mo'a hakare kaziga mani'naza vahetamina rempi hunezmino, vahetine kasegetine, ra mono nontia ha' renente! Mago'enenaga Grika vahera zamareno ra mono nomofo agu'afi nevuno, ruotage hu'nea ra mono nona eri pehena nehie! ²⁹Zamagra negageno Efesasiti nera Trofimasia, Poli'ene Jerusalemi vano nehige'za negaza ne'ku, ra mono nomofo agu'afinka avreno marerinegahie hu'za zamagesa antahi'naze. ³⁰Maka vahe'mo'za eritru hu'za zamaga re'za e'za, Polina azeri'za avazu hu'za ra mono nomofo agu'afinti atimaneramizageno'a, ame hu'za ra mono nonkafana erigi'naze. ³¹Polima ahe friku'ma nehzageno, anampinti vahe'mo'za zamaga re'za vu'za, maka Jerusale vahe'mo'za ha' nehaze hu'za sondia vahete kva nehia nera ome asmi'naze. ³²Ana sondia kva ne'mo'a ame' huno sondia vahe'zga nezmareno, mago'a vahe'mokizmi kva vahe'zga (sensulien, hantretia sondia vahete kva nera) zamarege'za, zamaga re'za ana vahete e'naze. Polima ahenaku nehaza vahe'mo'za, sondia vahe'mokizmi kva ne'ene, sondia vahe'zgama nezamage'za, ohe'za atre'naze. ³³Anante sondia kva ne'mo'a Polina ome azeriteno, huzmantege'za tare seni nofinu anakintetageno, anante sondia kva ne'mo'a, zamantahige'ne, Agra aza'e, agra na'a hu'ne? ³⁴Hu'neanagi tusa vahe tamimpinti mago'amo'za ranke hu'za ra kefinti mago zanku kereso nehazageno, mago'amo'za ruge nehazageno, sondia kva ne'mo'a ke agafa'a keno eri fore osu'ne. Na'ankure rama'a vahe'mo'za kehakare nehazageno ontahino, Polina avareta sondia vahe kumapi viho hige'za avare'za vu'naze. ³⁵Agrama latare'ma ege'za, Polina sondia vahe'mo'za azerisga hu'za mareri'naze. Na'ankure rama'a vahe'mo'za ahenaku nehazageno'e. ³⁶Rama'a vahe tamimo'za zamavariri'za nevu'za kezatiza, Ahe friho! Ahe friho! hu'naze.

³⁷Polima avare'za sondia vahe kumapi ufre'za nehazageno sondia kva ne' asamino, knare mago'a kea kasmisufi? Higeno ana ne'mo, Grika kea antahi'nano? huno Polina antahige'ne. ³⁸Kagra Isipi ne'ma, mago'a knafima ugota hunka, 4 tauseni'a vahe'ma kamani vahe ha'ma

rezmanteku'ma hu'naza venene'ma zamarenka hagege kokampi vu'nana nepi, ru nere? ³⁹Poli'a kenona anage hu'ne, nagra Jiu nere Tasis kumateti Sirisia provinsfinti, agatere'nea ran kumatetire. Knare natrenankena ama vahetamina kea zamasmigahuo higeno, ⁴⁰Ana sondia kva ne'mo knareki kea huo higeno, Poli'a latare oti'nenno azanu avame hige'za keresoma nehazazana eri taganageno, antahi'naza Aramu (Hibru) kefinti, anage huno zamasmine.

Poli'a agu'vazi keaga hu'nea naneke

22 ¹Nafu'nafaheta, amama nagrama navufa nagu'vazi kema nehua kea anta'hiho. ²Zamagrama antahizama, Aramu (Hibru) kefinti kema nehige'za nentahi'za, mago'ane zamagasasankea eri anterami'naze. Anante Poli'a anage hu'ne, ³nagra Jiu nere, Tasis kumate Silisia ksenante'ne. Hianagi ama ran kumapi ra hutena Gamalieli hikanaga avonona hu'na, tagehemofu kasegemo hu'nea kante ante'na Anumzamofu avu'avara hanaveti'na avariri fatgo hu'noe. Tamagrama nehazaza hu'na Anumzamofona amage ante'na vu'noe. ⁴Nagra amanahu hu'na, zamentinti vahera nezamahe'na, zamahe fri'za nehu'na, vene'ne a'nenena kina rezamante'na zamare'na kina nomp'i ome zamante'noe. ⁵Ugagota prisi ne'mo'ene, maka kanisol (senhidren) vahe'mo'za, amama nehuazankura tamage hu'za tamasmigahaze. Zamagra mago'a avona kre'nami'za erinka Damaskasi nemniza kafuhe'intega vuo hazage'na, nagra kina ome rezmante'na zamare'na e'na, Jerusale zamata hoza zamihogu kantega vu'noe.

⁶Nagrama vuvava hu'na Damaskasi urava'o nehugeno'a, feru'naza monafinkati msa'nentake tvi'mo ame' huno remsa hunante kagine. ⁷Anante nagra traka hu'na mopafi evuramugeno, mago ageru nentahugeno anage huno nagriku hu'ne, Sol, Sol, na'a higenka Nagrira nazeri havizana nehane? ⁸Nagra ke nona'a, azage Ra'moka? hu'na nehugeno, Agra anage huno nasami'ne, Nazareteti Jisasi'na nazeri haviza nehane huno hu'ne. ⁹Nagrane vu'naza vahe'mo'za ana msa ke'nazanagi, nanekema hunamia kea antahi ama osu'naze. ¹⁰Ana hige'na nagra na'a hugahue Ramoka? hu'na antahigogeno, Ramo'a nagrikura anage hu'ne, Otinka Damaskasi vugeno, maka'zama hugahane hu'na huhampri kante'noa'zana kasamino. ¹¹Na'ankure tavi'mofu msamo navurga erihaviza hige'na navua onkoge'za, magokama vu'nona vahe'mo'za Damaskasia nazante navazu hu'za ufre'naze.

¹²Ana kumate mago nera mani'neana agi'a Ananaisi kasegemofu avariri fatgo nehige'za, anampima nemni'za maka Jiu vahe'mo'za, knare nere nehaza ne'mo, ¹³mani'nore eme otino nagriku anage hu'ne, Soliga nenafuge, kavurgamo'a so'e huganteno! Higeno ame' huno navumo'a hari hige'na kesga hu'na ana ne' ke'noe. ¹⁴Anante agra anage huno nasami'ne,

tagehe'mokizmi Anumzamo ko kagrira huhampriganteno, Agri avesi'za antahinka kenka nehunka, Fatgo Hu'nea Ne' Jisasi negenka, Agra'a agipinti'ma hania kea antahigahane. ¹⁵Na'ankure Agrama kagri'ma eri kaverigenka, negenka nentahinka hu'nana kea, huama hunka maka vahera zamasmigahane. ¹⁶Na'a higenka avega antenka mani'nane? Otinka mono ti nefrenka, agihanta nevazigeno kumi ka'a sese huganteno hu'ne.

¹⁷Ana hutege'na ete rukarahe hu'na Jerusale kumate e'na, ranmono nompî nunamu nehu'na avanagna'za kogeno, ¹⁸Ramo'a negogeno anage huno nasami'ne, Hantaka'a Jerusalea atrenka ame' hunka vuo, na'ankure Nagri nagenkema kagrama hanana kea ontahigahaze. ¹⁹Nagra kenona'a anage hu'noe, Ramoka Kagrite'ma osi mono nompî mono nehu'za, zamentintima nehaza vahe'ma kina nompî zamare nente'na, zamazeri havizama nehu'na zamahenoazana ko antahi'naze. ²⁰Kagri kema huama nehia ne'ma Stivenima ahe'za korama'a erimegi atraza'zana, nagrani'a tava'onte mani'nena, mago narimpa nehu'na, ahe'naza vahe'mokizmi anakare ku'zamirera kava hu'nogeza ahe'naze. ²¹Anante Ramo'a anage huno nasami'ne. Vuo! Na'ankure afete hugante'nugenka megî'a vahepî ke'ni'a erinka ome zamasmigahane hu'ne.

²²Ana vahetamimo'za antahime nevazareti'ma, megî'a vaheku'ma agrama kema hiana nentahi'za zamagerura eri mago hu'za ranke hu'za, ama mopafintira azeri atreho! Agra ama mopafi manigara osu'ne! ²³Rankege nehu'za, kukena'zami zafima netare'za, kugusopa kate'za zahopi mate vu'naze. ²⁴Ana'ma haza'zanku Romu sondia kva ne'mo'a, Polina ete avaretma sondia vahe kumapi ufrehu huno huzmante'ne. Agra zamasmîno kao akaruteti trohunte nofi knonu sefu kno Polina ome nehetma antahige'ho, Jiu vahe'mo'za nanke agafare amanahu ranke Polina hunentafi, huno huzmante'ne. ²⁵Knoma ahenaku azama azeri antesga nehazageno, Poli'a anante otino mani'nea sondia kva ne' (sensulien, hantretia sondia vahete kva nera), asami'ne, Knare hu'negu hazenke'a omane Romu vahere huno maninesia vahera ke agafa'a eri fatgo osu'nesiazantera ahegahazafi? ²⁶Sondia vahete kva ne'mo, ana kema nentahino, ugagota sondia nete vuno, kema hianke ome asamino, anage hu'ne, kagra na'a huntenuku nehane? Na'ankure ama'na nera Romu nere huno mani'nea nere. ²⁷Anante ugagota sondia kva ne'mo otino eno Polina anage huno antahige'ne, Kagra nasamio Romu ne' mani'nano? higeno agra hu'ne, ozo. ²⁸Ana ugagota sondia kva ne'mo, kenona'a anage hu'ne, Nagrama Romu vahe mani'nakura rama'a zgo mizase'na mani'noe. Hianagi Poli'a kenona'a huno nagri'enenana ama mopare nere huno nenfa'a mani'nenano, ome kasenantege'na, Romu nere hu'na mani'noe, ²⁹Polima sefu ami'za nehaza vahe'mo'za ame hu'za atre'za mani ogantu ogama nehazageno, ugagota sondia kva ne'mo antahiama Poli'ma Romu ne' mani'nege'za anakinte'naza zankura kore hu'ne.

Poli mono kanisol (Senhidren) vahepi mani'nenno ke hu'nea naneke

³⁰Maseno ko'atigeno Romu sondia vahete ugagota kva ne'mo'a, Na'a agafare Jiu vahe'mo'za kea Polina hunte'naze antahino keno hunaku kazufe netreno, prisi vaheku'ene kanisol vahe'zga ke hige'za atru hu'naze. Anante Polina avareno eramino zamuga eme ante'ne.

23 ¹Poli'a kanisol vahe'zaga zamufi keankere'nenno anage hu'ne, Nenfugate nagra magore hu'na havizana osu'noe. Fatgo huno ama' nagu'nagesare Anumzamofa avurera manina ena ama knarera ehanatue. ²Anagema higeno, ugagota prisi ne' Ananaisi'a anante oti'naza vaheku Polina agi ruhapatitma aheho huzmante'ne. ³Anante Poli'a anage agrikura hu'ne, Anumzamo'a kagrira kahegahie. Kagra amega fatgo hu'na knare hu'noe nehananagi, kagu'afinka haviza hu'nane! Kagra amare mani'nenka kasegemo'ma hu'nere antenka refako hunenantane. Kasegea rutagarenka aheho hunka hunezmantano? ⁴Ana tva'onte oti'naza vahe'mo'za anage hu'naze, kagra Anumzamofa hai prisi ne' huhaviza huntenuku nehampi? Hu'za hazageno, ⁵Poli'a kenona zamire anage hu'ne, nenafugata ugagota prisi ne' mani'ne hu'na nagra ontahi'noe, na'ankure anage huno avon tafepina krente'ne, ***kagri vahete'ma kva hu'nea vahera huhavizana huonto hu'ne.*** (Ekso-Uti 22:28)

⁶Anante Polima nezmagege'za anama eri tru hu'naza vahepina, Satusi vahe'ene mago'a Farisi vahe mani'nageno nezmageno, ranke huno anage hu'ne, nafu naganaheta nagra Farisi neki, nenfa'a Farisi ne'mo kasenantege'na mani'noe. Nagri'ma kema hunenantazana, nagrama namentinti hu'na fripinti otigahie hu'na huazanku kea hunenantaze! ⁷Anage'ma hige'za, Farisi vahe'ene Satusi vahe'mo'za atruma hu'nafinti amu'nompinti refako hu'za ana kegu fra vazi'naze. ⁸Na'ankure Satusi vahe'mo'za fripinti o'otigahie nehu'za, ankeru vahera omanine nehu'za, avamura omani'ne hu'nazanagi, Farisi vahe'mo'za ana maka'zana me'ne hu'za antahi'naze. ⁹Anampinti kezati'za ranke hu'za kea nehazage'za, mago'a Farisi nagapinti kasegere ugagota hu'naza vahe'mo'za oti'za hanave ke hu'za, mago hazenke'a ama nera keta eri forera osu'none. Avamu'mo'o, ankeromo'ma kema huminesigeno'a na'a hugahie? ¹⁰Tusi ke hafra nehazageno, Romu sondia kva ne'mo aru Poli avazu hu'za azeri taganape'zanku sondia vahera huzamanteno, uramitma Polina hanavetitma zamagripintira avaretma sondia vahe kumapi efareho hu'ne.

¹¹Ana kenage Ramo Polina tava'oma'are oti'nenno anage huno asami'ne, Oti hanavetio, Jerusalema Nagri nagi nagenke huama hu'nanaza hunka Romu kumatera anazanke hunka ome huama hugahane.

Poli ahenaku hu'naza naneke

¹²Ko'atige'za nanterampi mago'a Jiu vahe'mo'za eri atru hu'za, hanave ke huvempa hu'za Polima ahesnaza naneke retro nehu'za, ne'zane tine a'o

huta mani'neta Polina ahesunkeno frisnie, hu'za huhankaveti'za kea retro hu'naze. ¹³Anampima nanekema hu'za retro'ma hu'nazana 40ti'a vahera agatere'za mani'neza retro hu'naze. ¹⁴Zamagra ra prisi vahete'ene mono kva (elda) vahe'zgare vu'za anage ome hu'naze. Tagra kea huvempa huta mago'zana one'mani'neta, Polina ahe farigahune hu'za hu'naze. ¹⁵Hanki menina kagrane, kanisol vahe'motma sondia kva vaheku ke eri fatgo hugahunanki avreta eramiho hinke'za, avare'za eramisnageta, amare erava'o osu'nenageta kantega kavagrita mani'neta, ahe frisune.

¹⁶Hianagi Poli nesaro ne' mofavremo ahegahune hazanke nentahino, eno sondia vahe kumapi efareno Polina kahe ke nehaze huno asami'ne. ¹⁷Poli'a mago kina vahete kva ne' (sensulien), ke huno asami'ne, Avarenka ama arisera ugagota sondia kva nete vuo, na'ankure mago'a kea agra ome asamigahie huno huntene. ¹⁸Ana higeno hantreti'a sondia vahete kva ne'mo (sensulien,) ana arisera avareno ugagota sondia kva nete vuno, Poli'a hunanteno avarenka ama arisera ugagota sondia kva ne'te vuo, na'ankure agra mago'a kea ome asamigahie, hige'na avare'na e'noe. ¹⁹Ana ugagota sondia kva ne'mo azante avazuhuganti ataregene, zanagraku umani'neke, anage huno antahige'ne, Na'ane naneke nasaminaku hu'nane? ²⁰Ana arise'mo'a anage huno asami'ne, Jiu vahe'mo'za mago zamarimpa nehu'za, havige hu'za kantahigesagenka Polina avarenka okina kanisol vahetega uramisanke'za, keaga refako hu'za mago'ene hake'za ke'naku hu'naze. ²¹Ana hu'negu zamatrege'za anara osiho, na'ankure 40ti'a nazana agatere'naza vahe'mo'za ahe'nakura hu'naze. Zamagra kea huvempa hu'za, ne'zane tine oneneta ahe frigahune nehu'za menina zamagri kere'ma mago karimpa hananku, kavega ante'za mani'naze. ²²Anante ugagota sondia kva ne'mo'a ana risera hunenteno, hamponage asamino, vanunka ama nanekea kva nera ome asami'noe hunka, mago'mofona osamitfa huo.

²³Anante ugagota sondia kva ne'mo, sondia vahete kva ne'tre (sensulien), ke higeke akeno, anage huno zanasmi'ne, 200ti'a sondia vahera huge'za Siseria kumate vugahazanki tro hiho, anampina 70ti'a hosifi vano nehu'za ha' nehaza sondia vaheki 200ti'a karugaru kevereti ha' nehaza sondia vaheki hu'za meni kenagera 9 kiloki vugahazanki tro hiho. Polina hosi afu'zgafintira mago'a amigeno agumpi manina avaretma kva huntetma, Gavana ne' Feliksinte viho huno zamasmie'ne. ²⁴Polina hosi afu'zgafintira mago'a amigeno agumpi manina avaretma kva huntetma Gavana ne' Feliksinte viho huno zamasmie'ne. ²⁵Agra avoma kre'neana amanahu kante kre tre'ne, ²⁶Nagra Klotiasi Lisiasi'na, knare Gavana kva nemokarega Feliksiga musenke kre'negamue, ²⁷Ama nera Jiu vahe'mo'za azeri'za ahe'za nehazage'na, sondia vahe'niane e'na aza hu'na avare'noe. Na'ankure nagrama antahuana Romu ne' mani'noe higeta avareta e'none. ²⁸Na'anteku nanekea hunentazo nagra antahinaku,

zamagri kanisol vahete avare'na urami'noe. ²⁹Nagrama kena erifore'ma huana, zamagra'zimi kasegereku hu'za ke hakare hunte'naze, hianagi ahe fri kankamune kina hunte kea kena eri fore osu'noe. ³⁰Ahenaku kema retro'ma haza naneke eme nenasmige'na, ama nera ame hu'na kagritega huntogeno ne-egena, ke ha'ma rentaza vahera magoka kagri kavure kea hundesazegu huzmantoge'za neaze huno krente'ne.

³¹Ana hige'za sondia vahe'mo'za kema huzmantea kante ante'za, Polina avare'za kenageke Antipatris rankumate vunaku vu'naze. ³²Mase'za nantera hosifima vano hu'za ha' nehaza sondia vahera zamatrege'za avare'za vazage'za, mago'amo'za ete sondia vahe kumatega e'naze. ³³Hosifima vano nehu'za ha'ma nehaza vahe'mo'za, Sisariama e'za ana avona Gavana ne'ma eme nemi'za, Polina eme ami'naze. ³⁴Ana Gavana ne'mo avoma hamprino nentahino, anage huno antahige'ne, Kagra ina provinsifinti nere? Higeno Poli'a huno nagra Sirisia nere higeno antahiteno, ³⁵anage hu'ne, kema hugante'naza vahe'ma esage'na, keka'a antahigahue. Higeno anante Heroti kina nOMPI Polina avaretma ome anteho hu'ne.

Polina keaga hunte'naza naneke

24 ¹fu'agna evigeno ugagota prisi ne' Ananaisi'a, mono kva (elda) vahe'ene, mago aza huno kemahu nera (loya) Tetulusi nevareno, Polina Gavana ne' avufima kema hunte kea anakite'za e'naze. ²Polima kema higeno egeno'a, Tetilusi'a agafa huno Gavana ne'te ke ha' Polina renteno anage hu'ne,

Tagra knare'za huta kagrama kavama krirantanketa tarimpa fru huta nemanita, hanki ama kumapima kahefa'zama efare'neana kagrama antahinka kenka retro'ma hanazante efare'ne. ³Feliksiga knare hu'nane. Mika kazigane, mika zama hanazankura tagra kageta antahita nehuta tusi'a muse hunegantone. ⁴Hu'neanagi kagrira mago'ene knaka'a kaze'origahuankina anage hu'na negasmue, muse hugantonanki osia kema hanuana kagrama nehana kante antenka ketia antahiramio. ⁵Tagrama keta eri fore hunana ama'na nera hazanke nere, rama'a vahe zamazeri agrarega anteno, maka kokantega Jiu vahera keha renezmanteno, Nazarenie nehaza mono naga'mokizmi kva mani'ne. ⁶⁻⁷Anama hu'nenno'a, agra ra mono nontia eri haviza nehigeta azeri none. ⁸Kagrama antahingenka kesunka maka'zanku'ma huma nentonazana kagraka'a antahigahane. ⁹Jiu vahe'mo'zanena Tetilusi kere hagerafi'za, ama'na kema nehiana tamage hu'za hunte'naze.

Naneke hunentageno kenona'a Poli'a Feliksi asami'ne

¹⁰Gavana ne'mo Poli ke hinogu revumi humigeno, Poli'a anage hu'ne, Na'ankure nagra antahi'noe, kagra ama mopafina kema refakohu zantera rama'a kafufi mani'nanku, nagra korera osu'na nazama hania

kea hugahue. ¹¹Kagra ka'a ana kea eriamu hunka antahi ankeregahane, 12fu'a kna'nazana agatereno eovu'nege'na Jerusale mono hu'naku mareri'noe. ¹²Zamagrama nagazana, nagra mago vahe'enena fra ovazi'na, ra mono nonpintira keaga hu'na, rama'a vahe kevua zamazeri savari hu'na nagrarega zamare'ozmante'na, osi mono nonpintiro rankumapinti'enena zamavre nagrarega ontoge'za onke'naze. ¹³Hankinka zamagrama kema hunante'nakuma nehaza ke agafa'a kagriteri eri forera osugahaze. ¹⁴Hu'neanagi nagra huama hu'na tamagama kasamisua, tagigomomo Anumzante monora hunte'noe, Jisasi'ma hu'nea Kama, (sektie hu'zama nehazare) maka Mosesi Kasegemo'ma hu'neazante namentinti nehu'na, kasnampa vahe'mo'zama kre'naza kante avaririnoe. ¹⁵Nagra Anumzamofonte namentinti hu'noe, zamagrama zamentinti hu'naza kna hu'noankino, fatgo vahe'ene, havi vahe'mo'za frite'za otigahaze hu'na namentinti nehue. ¹⁶Ama'na ke agafare, nagra maragu'zatina Anumzamomo avure'ene, vahe'mokizmi zamurera mani fatgo nehue. ¹⁷Mago'a zagegafu evutege'na, zamunte omane vahe'nia, museza (gift) nezami'na, Anumzamofonte ofa antenaku Jerusalea vu'noe. ¹⁸Anama nehuge'za ra mono nompni nage'za eri fore nehu'za, nazeri agruma Anumzamofonte hu'noa zankura, vahe kevumo'zo mago'a rankea huonante'naze. ¹⁹Hu'neanagi mago'a Esia provinsifinti Jiu vahera, amare menina kagri kavure mani'ne'za, nagrima hunante keaga me'neresina hunantasine. ²⁰Anama osanu'za ama vahe'mo'za, nankna hazenke hu'nofi agafa'a hugahaze. Kanisol vahe zamure'ma oti'nenana hu'noa kea hufore hugahaze. ²¹Hagi mago'zana kea ranke hu'na kanisol vahe zamure'ma oti'nenana hu'noe. Menina keagama hunenantazana fripinti otigahaze hu'na huazante hunenantaze.

²²Anante Feliksi'a Jisasima amage'ma antekana ko antahi'neankino, kema antahi kna eriza'za nehuno anage hu'ne, Lisiasi'ma ugagota sondia kva ne'ma eramisige'na keka'a antahigahue huteno, ²³100ti'a sondia vahete kva (sensulien) ne'ku Polina kava karinto hu'ne. Hianagi atregeno fru huno nemanina naga'amo'zama nazano upama haniazama eme aminaku hanigeta, i'o huozmanteho hu'ne.

Polia kazigazi huno mago'ene Feliksi ene kea hu'ne

²⁴Mago'agna evigeno, Feliksi ene nenaro Drusilake e'na'e, ana ara Jiu a're. Feliksi'a huzmantege'za Polina ome kehazageno eno, Jisas Kraisinte'ma amentinti hu'nea kea eme zanasmi'ne. ²⁵Polima fatgo zanku'ene, avufama kava krino manizanku'ene keagare'ma vahe'ma refako'ma hania zanku'ma kema nehigeno'a, Feliksi'a tusi koro nehuno anage hu'ne, Menina vu'nege'na henka kankamuma mesige'na ke hanugenka ete eno huno asami'ne. ²⁶Anama nehuno'a agesama antahi'ana Poli'a zago namigahie nehuno, ama ana agafare mago'agna Polina ke

higeno etere huno agranena keaga hu'ne. ²⁷Tare zgegafu agateregeno'a, Pesius Festusi'a, Gavana eri'zana Feliksi no erino eri'ne, na'ankure Feliksi'a Jiu vahe zamazeri muse hu'naku Polina atregeno kina nOMPI mani'ne.

Poli'a keaga'a erino Sisante vu'nea naneke

25 ¹Festusi'a Gavana erizante Saesaria tagufa kna enemanino, Saesariatira atreno Jerusale vu'ne. ²Higeno ugagota mono kva vahe'ene Jiu vahepinti zamagi me'nea vahe'mo'za, Polina havige hu'za keaga eme agrite hunte'naze. ³Polima kema hunte'suna keaga antahi ramigahano hu'za antahige'naze. Festusiga huizo hunka atregeno Poli'a Jerusalemia vino hu'za hampo'na ke hunte'naze. Na'ankure avare'za nevnage'za kantega ome ahe fri'naku keaga tro hunte'neza hu'naze. ⁴Hianagi Festusi'a kenona huno, Polina ko azeri'za kina hunte'za azerintageno Saesaria mani'neankina, nagra upa knafi atreno Saesaria vugahie, hu'ne. ⁵Nehuno anage hu'ne, Zamatrenke'za kva vahe' kamo'za nagrane urami'za, ama ana nepima mago'a havizama hu'nesniazama me'nesige'za kesu'za, zamagra keaga agrira hunteho.

⁶Festusi'a zamagranema 8ti'o 10ni'a kna agateoreno, osi'a knama maniteno'a Saeseria uramino, hagi mago knarera keaga refakohu trate unemanino, Polina avareta eho huno huzmante'ne. ⁷Poli'ma ehanatige'za, Jerusaleti e'naza Jiu vahe'mo'za, azeri amunOMPI ante'za otigagine'za, rama'a hampo'nantake kea huntaza kemofona agafa omane tfa hu'ne. ⁸Agri'ama azama hania nanekea Poli'a anage hu'ne, Nagra Jiu vahe Tra Kea eri haviza osu'noe, ra mono nona eri haviza osuge, Sisana havizana huontetfa hu'noe. ⁹Hianagi Festusi'a Jiu vahe'mo'za musema hunesaza kazigati Poli antahigeno, kagra knare Jerusalemia mareri'nanke'na naneke ka'a ome antahigahufi? ¹⁰Higeno Poli'a kenona'arera anage hu'ne, Nagri'ma keagama hunantekure hazare, Sisa'ma keagama refako nehia tra'are menina oti'noe. Nagra Jiu vahera havizana huozmantetfa hu'noe. Ama tamageginka kagra ko antahi ankere'nane. ¹¹Hagi nagrama haviza hunesuge'za frigahane hu'za zamagra hanazana, fri'zankura korera ofregahue. Hu'neanagi zamagrama mago kema hunantesaza kemo'ma tamage agafa'ama omanenesiana, mago nemo'a amuha osu'neankino zamagri zamazampina navare onteguhie. Nagra ama keaga Sisante retufentoankino agra refako hugahie, ¹²higeno Festusi'a kanisol vahe'enema atru huno keagama huteno'a, ke'nona hunteno, hago nasaminka Sisante retufentoe hanankinka Sisante vugahane huno asami'ne.

Festusi'a antahintahi aminogu Agripa antahige'ne

¹³Mago'agna evutegeni kuni nera Agripake nesaro Benaisikea, Festasi antahimi'ne nantu antenteke Saeseria urami'na'e. ¹⁴Anantega

mago'a za'za kna umani'nakeno, Poli agenkea Festusi'a antahintahi'a erinaku Agripiana anage huno asmi'ne, Feliksi'a mago nera kina nomp ante'ne. ¹⁵Jeruselemi mani'noge'za, mono'nonte ugagota kva (hae pris) vahe'ene, Jiu ranra (eldas) vahe'mo'za, agri agenkea nenasmi'za hugeta hae frimaneno hu'za nantahige'naze. ¹⁶Nagra kenona zamire anage hu'noe, Romu vahe'mofo avu'ava'mo'a, keagama mago vahe'ma hunteku'ma hanimo'a, agri'ma keagama hunteku'ma hanamokizmi zamure otino, agri'ma hunesaza kemofona azahu nanekea hutesige'za henka avaremigahaze. ¹⁷Hu'neanki'na amare'ma atruma hazage'na, ama ana kea huretufe onte'noe. Hagi anante knazupa keagama refakohu trate unemani'na, avaretma egahaze hu'noe. ¹⁸Keaga hunteku'ma haza vahe'mo'za oti'za zamagrama keaga hunte'nazana, havizama hu'nesia zante keaga hunte'gahaze hu'na nagesama antahinoa kantera huonte'naze. ¹⁹Hagi zamagrazmi mono'mofo zanku'ene mago nera Jisasi'e hu'za nehaza ne'ma fri'nea zanku'ma, Poli'ma huno mani'ne hu'nea zanku agenoka humare'za agripi atre'naze. ²⁰Agri'ma hunentaza kemofo agafa'a, nagra ke'na erifore osua kazigati Jeruselemi eteno vanige'za amanahu keagama hunte'naza kea ome erifatgo husanifi hu'na knarerema hanigu antahige'noe. ²¹Hianagi Poli'ma huno ete nazeri antenkena kina nomp mani'nesugeno, Sisa'a na'ane keaga hunantegahifi antahineno hige'na, nagra hanavege huzmantoanki'za, agrira kava krinte'nesagena, inanknarero eri fatgoma hutesu'na, Sisantera (Empira) hunesugeno vugahie. ²²Nehigeno anante Agripa'a anage huno Festasina asami'ne, naganena ana ne'mofo kea nagra'ni'a nagesafinti antahinaku nehue, higeno Festusi'a okine huno Agripiana asami'ne.

Kini Agripiane Benasikizani zanavuga keagare Poli'a oti'nea naneke

²³Hianagi anante knarera, Agripake Benasikea mizama'amo marerisa kukena huteke, ana vahe'zgama atruma hu'naza tusi'a nomp ha' kaziga keagare'ma ugagote'naza kva vahe'ene (commanding officers), rankumapi ranra kva vahe'ene ufrageno Festusi'a ke huzmantege'za Polina avare'za e'naze. ²⁴Efrageno Festusi'a anage hu'ne, Kini ne' Agripagane miko tagrane mani'naza vahe'motma ama nera keho, maka Jiu vahe krerafamo'za keaga hunte'niku nagrite eri'za Jeruselemine amafinema eri'za e'nazana kezati'za, Polina hae frisnageno mago'enena amafina omanigahie hu'naze. ²⁵Hu'neanagi nagrama hakena erifore'ma huana, agri'ma ahe friga agafa omanetfa hu'ne. Hagi agrama ana kumate'ma ugagote'nea ne' Sisante'ma keaga'ama mago'ene retufentoe hu'negu, nagra Polina avaretrenaku nagesa antahi'noane. ²⁶Hu'neanagi agri nanekema, nagrama kre'na rani'a (lord) amiga keaga nagripina omanetfaza hu'negu tmagrite'ene amu Kini ne' Agripaga tamagra ma haketma keso'e hutesage'na, nagra avona kresue hu'na Polina avare'na tamagriteri neoe. ²⁷Na'ankure nagrama nagesama

nentahuana mago kina ne'ma keaga huntaza kemo'ma, knare agafa omnesire'ma huntezamo'a knarera osugahie.

Poli agra'a agu'vazisia ke kini ne' Agripa asami'nea naneke

26 ¹Agripa'a, Polinku huno knarere hugantoanki naneke ka'a huama hugahane higeno, Poli'a azana ometre emetre nehuno ahoke'ma ahekeaga agafa huno hu'ne.

²Jiu vahe'mo'za nagri'ma ha'ma renante'za navare'za tratema neazana ana mika zamofa agafa'a amananki Kini ne' Agripaga antahi'ankero, nagra tusi'a muse hu'na kagri kavurera oti'na, Jiu vahe'mo'zama hunante'naza kemofa nona'a huzmantegahue. ³Hanki Jiu vahe'mokizmi zamuzma'ene, Jiu vahe'mo'zama keframa nehaza zana, kagra ko kenka antahinka hu'nananki, kema hanua keaga akohenka mani'nenka rezaganenka antahio.

⁴Nagra inankna navu'navate osi'niaretira mani'na nehaza nera asete'na, esetetira vahe'niafine Jerusalemima mani'na e'noana, mika Jiu vahe krerafamo'za ko antahi'za ke'za hu'naze. ⁵Zamagra antahi'naze, na'ankure korapa nagrira nage'za antahi'naze. Zamagra huama hu'naku zamagesa nentahisu'za, tagri mono'mofa kasegemo'ma, o'ema huno hu'nea kante ante'na avariri fatgo hu'na nagra Farisi nere hu'na mani'noane. ⁶Hige'na menina ama keagarera eme oti'noe, na'ankure Anumzamo'ma tagehe'ima huvempama huzmante'nea kere namentinti hu'na, mani'noe. ⁷Tagri 12fu'a naga'nofiku huvempa huno erigahaze hu'nea kere zamua kete'za mani'ne'za, zagene haninena hanaveti'za monora hunentaze. E'i anazante'ma navuma ketena namentintima hu'noa zanteku, Juda vahe'mo'za nagrira hafra hunenantaze. Mareri'namoke! (king) ⁸Na'a higetma ama vahe'motma Anumzamo'ma fri vahera zamazeri oti'zankura tamentinti nosaze?

⁹Nagrama nagesama antahi'noana tamageza nehue nehu'na hanaveti'na, Nazareti Jisasi agi'a eri haviza hu'noe. ¹⁰Jerusalemi kumapina amanahu'zana hu'noe. Rama'a Anumzante mani'naza vahetamina, Jiu mono nompima ugagote'naza prisi vahe'mo'zanena hugnare hazage'na zamare'na kina huzamante'na, zamahe frinaku'ma haza vahetera naganena nazante'na izo huge'za zamahe'naze. ¹¹Hanki hakare zupa maka osi mono nOMPI mareri'na Anumzama huhaviza huntaho hu'na zamahe'noe. Na'ankure nagra tusi'za hu'na narimpa hezmante'noe. Ru moparegane me'nea ra kumapina ufre'na zamahe'noe.

Poli'a agu'a rukrehe hu'nea naneke

(Apo 9:3-19, 22:6-16)

¹²Anama nehuge'za, mono'nonte ugagota kva vahe'mo'za hugnare hu'za hanave nenami'za hunantage'na Damaskasi nevu'na, ¹³zagemo'a

anuntu age12 kiloki higeno, mareri'namokagi (king) monafinkatira msa a'mo'a zagea agatere'nea tv'i'mo nevugeno, nagrane magokama vu'nona nagate enena remsa mika hugagi'ne. ¹⁴Ana higeta ana mika'mota traka huta mopafima nemsonkeno, mago kezamo'a Aramu (Hibru) kefinti antahugeno anage hu'ne, Sol, Sol, na'a higenka Nagrira nenahane? Nagri'ma nenahanana, kagra ka'a agonazante tarunehane. ¹⁵Hige'na azage Ramoka? hugeno Ramo'a huno, nenahamo'na Nagra Jisasi'ne. ¹⁶Hianagi otio, na'ankure ama'na agafare, Nagra kavurera efore hue, korapa ama kagrira eri'za ne' kazeri otisugenka, amama kana zane, Nagri'ma naganane, Nagrama kaveri hanuazana huama hugahane hu'na huganteno hu'ne. ¹⁷Nagra Jiu vahe ka'afinti'ene megia' vahepintira kza hu'na kava hunegante'na, Nagra hugantesugenka zamagrite vunka, ¹⁸zamurga erihari hananke'za hani'zampintira atre'za msare egahaze. Hagi Sata hanavefintira Anumzamofa hanavere esageno, kumi'zamia atrezamantesnige'za, Nagrite zamentinti hazage'na, kumi'zmi eri fanane hu'noa naga'enena erigahaze huno hu'ne.

Poli'a eri'zama'amofonku hu'nea naneke

¹⁹Ana hu'negu, Kini Agripaga, monafinkati'ma ege'na ava'nagnazama ke'noazama amage'ma onte'zamo'a amuho hunantegahie. ²⁰Hu'neanagi pusantera Damaskasi vahe zamasmite'na, Jerusalemine maka Judia vahe'enena zamasmite'na megia' vahe'enena anazanke hu'na zamasmia'na, tmagu'a rukarehe hutma Anumzante nevinkeno, tamu'tmama hanaza zamo'a, hago tamagua rukarehe hu'naze hino. ²¹E'ina kegafare mago'a Jiu vahe'mo'za ra mono nompintira navuzuhu fegi'atre'za, nahe fri'nakura nehaze. ²²Anumzamo'a nagrira naza hiazana keme e'na ama knarera oe. Hagi ama oti'na mika vahera osi'mofonteti vuno ramofonte'ma vu'neana, nagra huama hu'na nezmasmue. Mago'a kea nosuanagi, Mosese'ene, kasnampa vahe'mo'zama hu'za, e'inahu'zana fore hugahie hu'naza'zamo fore nehie. ²³Kema hu'za Kraisi'a ataza erino friteno pusante fri'pintira otino, Jiu vahete'ene megia' vahetera tavi'a eri ama hugahie hu'naze.

²⁴Polima agra'ama agu'mavazisia zamofa keagama nehiana, Festusi'a ranke huno Poliga hago ifo nehano! Ra'ma'a zama rempi hu'nana zamo kagrira kazeri savari'nehie! ²⁵Higeno Poli'a huno, Nagrira antahintahinimo'a havizana osu'ne, Festasiga so'e ne' mani'nane. Hianagi nagrama nehua nanekea tamage hu'na fatgo antahintahizanteti nehue. ²⁶Amana kema nehuana Kini ne'mo'a antahino keno hu'negu nagra agritera hu'ama hu'na nehue. Ama anazanku'ma nehuana kinimofa avurera fra'okine. ²⁷Kini ne' Agripaga kasnampa vahe kegu kamentinti'a nehampi? Nagra antahi'noe, kagra kamentinti nehane. ²⁸Higeno Kini Agripa'a Polinku anage hu'ne, Kagrama kagesa antahinana ama atupa knafina nazeri rukarehe hanankena, nagra mono ne' manigahufi?

²⁹Anage higeno Poli'a kenona'a huno, atupa knafino, za'za knafino nagra Anumzantega nunamu nehue, kagrikukera nosuanki ama menima mani'ne'za nagrama huanke'ma nentahiza vahe'mo'za, nagrikna hihogu nehuankino, ama'na seni nofinura kina reozmante'saze. ³⁰Anage hige'za, Kini neki, Gavana neki Benesiki, zamagranema mani'naza vahe'amoza oti'naze. ³¹Oti'za ana noma atre'za fegi'a nevu'za, ke huganti hugama hu'za anage hu'naze. Ama'na nera mago knare ke agafa omaneneankita ahe frige' kina huntege osu'tfa hugahune, hu'za hu'naze. ³²Agripa'a, Festusi asmi'no, Sisante'ma vugahue osiasina, ama nera katufe atosine.

Poli'a ventefi marerino Romu kumatega vu'nea naneke

27 ¹Italima tina takaheta vugahaze hutageta, mago ruotage hu'za empra 100ti'a sondia vahete kva nehia ne' (sensulien) Juliasi kegva hinogu, Poline, ruga'a kina vahera, avaremi'naze. ²Atramutiti Esia kaziga rama'a vente manitere nehia kumate manitere huno, vunaku nehia ventefi marerita hagerimpi vu'none. Aristakusi'a Tesalonika ra kumapinti nera, Masedoniatikino tagrane vu'ne. ³Maseno ko'ati zupa Saidon uhanati'none. Juliasi'a knarere huno Polina huntegeno, amane vunka knampa ka'a ome nezmagenka, kzama hu'zana zamagripinti erigahane huno huntegeno vu'ne. ⁴Hagi Saidonia atreta Siprusi ti amu'nompi me'nea kuma asogita vu'none. Na'ankure zaho'mo'a tusiza huno himamutino hagerina erivnapene. ⁵Silisiane Pamfilia hagerina arugitagita vunazamota, Maira rankumate Lisia provinsifi umani'none. ⁶Anante sondia kva ne'mo'a Aleksandriati ventemo, Itali vunaku nehia vente keteno, anampi tavare antegeta vu'none. ⁷Akoheta rama'a kna ana'ana huta vu'none. Tusi knazampi Sindasia ehanati'none, na'ankure zaho'mo'a tusi himamu reno kana renkaniregeta mago'anena ovuta, Kriti ti amunompi me'nea mopa asogita Salmoni vu'none. ⁸Agatereta tusi amuho huta Lasia kuma tavaonte, Fea Haveni e'none.

Hagerimpi zaho ko'atu'nea naneke

⁹Rama'a knamo'a tagateretegeni, hagerimpi vuna kamo'a menina hazenke atie, na'ankure Jiu vahe'mo'za kave'ma a'o hukna agateregeni, hampo'na zaho ko'atu knafi efrone, Poli'a antahintahi zamino, ¹⁰anage hu'ne, ama ve'nene zage, nagrama nentahuana, amama vuku'ma nehuna kamofona rama'a hazenkefi ufreta rama'a zanti atregahune, feno'zane ventegeropage, tagranena tasimura atregahune huno zamasmine. ¹¹Hianagi sondia vahete kva ne'mo'a, ventere'ma aze'neria ne' ene, ventemofo nefake ha'a nanekea nentahino, hagi Poli'ma hiankea ontahi'ne. ¹²Na'ankure zahoko'atu knafima ventemo'ma umani kumamo'a knarera osu'ne. Rama'amo'za mago'zmarimpa hu'za, knarekita vugahune hu'naze. Zamagesama antahizana Foniksi uhanatigahune

hu'za antahi'naze. Kritima ventemo'ma unemania kumamo'a rugaruga asoparega zge ufre kaziga (notwest sautwest) avugosa hunte'negeni zaho ko atu knafina anante umanigahune hu'naze.

¹³Kanti sauti kazigati agazone zaho emarerige'za, hago knare hiankita amane vugahu'ne nehu'za, timpiki umaniku erinetraza zana anka avazuhu ventefi nenteza, Kriti kaziga vu'za mopa tva'onte vu'naze. ¹⁴Hianagi tusi'a not isti'e hu'za nehaza zahokomo avunenteno Kriti kazigati tusi himamutino e'ne. ¹⁵Zaho komo'a vente'a eme amasagino azeri rava higeno, ventemo'a azeri agatere'zana osigeta tagrati atronkeno zaho komo taretufeno vu'ne. ¹⁶Kautie nehaza ti amu'nompiki mopa asogita tagareta nevuta, tusi amuho hunerantegeta tazama husia onensa ventea avazu huno ne-ea ventea erinteanaga atre'none. ¹⁷Osi ventema erianaga atrete'za, nofi eri'za ra ventere azerisigu kitragote'naze. Vene'ne zgamoz'a ventemo Sitisiki tinkenare ome hae'zankura tusi kore nehu'za zamazeri knama hanige'za ti avozare'ma akohe'za vanagu, kna'age'zama rente'naza nofira eritrete'za atrageno zaho'mo zamatufeno vu'ne. ¹⁸Maseno ko'atige'za mago'a fenona ventefintira eri atre'naze, na'ankure zaho komo'a tusi hampo'natino ahegantugama huno azeri nakari'za hige'za ana hu'naze. ¹⁹Nampa 3knazupa ventemofu eri'za zantamina mago'a asga hu'za mate'vu atre'naze. ²⁰Tagra zagene hanafi'enema mika knafima hanatigetaki onkonkeno zahoko'mo'ma knare osigeno'a, knare hugahune huta tagesama antahi'nona zamo'a amane zankna hu'ne.

²¹Za'za kna ne'zana one'za manizageno, Poli'a amu'nozamifi otino anage hu'ne, ama vene'nemotma nagrama huanke amage antetma Krititima atretma omazasina amanahu hazenkene tuzampaza zantamima atraza zana otrasine. ²²Hanki menima tamasmisuana korera osiho, na'ankure amama mani'naza amu'nompintira mago'moka fanane osugahananki ventemoke fanane hugahie. ²³Na'ankure meni keragera nagrama Agri vahe mani'nena erizama'a erinento'a Anumzamofu ankeromo'a navuga eme otino, ²⁴anage hu'ne, Poliga antahio korera osunka amane Sisa avurera ome otio, kagranema ana mika ventefima neza nagara Anumzamofu asunku huramanteno tamaza hugahie hu'ne. ²⁵E'inage hu'negu ama vene'nezga korera osiho, na'ankure nagra Anumzamofonku namentinti nehuankino nasami'nea kante fatgo huno taza hugahie. ²⁶Hu'neanagi mago ti amunompiki mopare atresunkeno zaho'mo ventea atufeno have ome amiteni rukaha hanie.

²⁷14ni'a kenage'mofu agu'afima zaho'moma tatufeno Adriatikiki hageri amu'nompiki nevigeno'a, kerage amu'nompiki ventefi eri'za vahe'moz'a hago mopare neone hu'za zamagesa antahi'naze. ²⁸Nehu'za nofi tu'mitare knaza eri renente'za, eri hagerimpi re'za kazana, 40ti'a mita fenkagame urami'ne. Osi'a ogantu'a vuza mago'ane ana nofira erire'za kazana, 30ti'a mita timofu zaza a'mo'a urami'nege'za ke'naze. ²⁹Have haegahune hu'za

tusi zamagogogu nehu'za, ventema umaniku'ma nehige'za erinetrazaza anka 4'a asgahu netre'za, ko'ma atusigu nunamu hu'naze. ³⁰Anante ventefi eri'za vahe'mo'za ventefinti atre'za fre'naku nehu'za, havige hu'za nofite kna'nentak'e'za eri netraze nehazage'za osi voti hagerimpi eri atre'naze. ³¹Poli'a sondia vahete kva ne'ene ruga'a sondia vahera zamasamino, Ama'na vene'ne zgama ventefima omani'snazana tamagra frigahaze hu'ne. ³²Hige'za sondia vahe'mo'za ana dinkire'ma kinte'naza nofira traga hutragenno hagerimpi mareno vu'ne.

³³Ko'atumasa huku higeno, Poli'a mika vaheku ne'za neho huno nezmasmino anage hu'ne, 14ni'a kna'mofo agu'afina naza fore hugahieha hutma ne'zama onetma mago'zama osutma e'naze. ³⁴E'inama hu'nagu mago'a ne'zana neho hu'na neramasmue na'ankure, tamagri'ma tamazeri hampo'na hanigetma manisnagu nehue. Na'ankure magore hunka osi hazenkea mago'moka e'oritfa hugahane. ³⁵Anagemata huteno'a, ana mika vahe'zamufi breti erino Anumzantega nunamu hunteno, korino agafa huno ne'ne. ³⁶Ana huno hakare vahera zamazeri hampo'na huke hige'za zamesite ne'zana eri'naze. ³⁷Ana miko vahe'ma vente agu'afima mani'nonana, 276'a vahe mani'none. ³⁸Anahu'za zamesiam'a nezamu nehu'za, ventemo'ma oza hanigu witi'a eri'za hagerimpi matevu atrenaze.

Ventea zaho komo eri tagana vazineane naneke

³⁹Ko'ma atige'za, mago mopa ke'nazanagi ana mopa antahi'za ke'za osu'naze, hianagi timo eri mago huno ufreno knare kahepa ruherafi'nege'za kete'za, knare hanuno'a zahomo vente'a atufeno anante vugahie hu'za antahi'naze. ⁴⁰Hige'za vente'ma azerino nemanina nofira tgahu'za eri timpi netre'za, ventema azeri ante fatgo higeno nevia apa knonte'ma ki'naza nofira vakane'naze. Anante avugama me'nea selia eri zaho kantega netre'za, hageri ankena kefatago hu'za vu'naze. ⁴¹Ventemo'a have ome amasgino anampi vuno'eno osu'are agi'mo'a runtanigeno, ruga ragati hagerimo'a avunema anteno riga'a rutamana hutre'ne. ⁴²E'i sondia vahe'mo'za kina vahe zamahe frinaku ke retro hu'naze. Hanki mago'mo'a zanagora aruno tatareno ofregahie hu'za hu'naze. ⁴³Hu'nazanagi, sondia vahete kva ne'mo'a' Poli'na avare so'e huno aza huno vuku aghesa nentahino, sondia vahe'mo'za kina vahera ozmahesaze nehuno, azagama zanago ruga hu'nesamoka ventefintira takaurenka pusante tinkenare vugahaze huno hige'za, ⁴⁴mago'amota, zafa atupare azeritma nevusageno, ventemofa atupare aze'nerita vugahaze, hige'za ana'ma hazana knare hu'za mopare vu'naze.

Malta ti amunompi me'nea mopafi Poli mani'nea naneke

28 ¹Knare huta mopare'ma unehanatita konana Maltae nehaza ti amunompi mopa ke'none. ²Anampima nemaniza vahe'mo'za

knare so'e zamuzma hu'za tavarente'naze. Tusi'a teve hegare'za tazeri so'e hu'naze na'ankure, tusi ko'aruno zasi hige'za ana hu'naze.

³Poli'ma teve zogino erino eme tevefima negregeno, tevemo'a amuho higeno ana tevefinti mago ha' osifa'vemo hanatino Poli azante haninkofigeno, arisonamo'a kizu'vazu hu'ne. ⁴Kuma agafa vahe'mo'za kazageno osifa'vemo Poli azante haninkofi nege'za, zamagra'a anage hugantugma hu'za, ama'na nera vahe zamahe nefria nepigure, hankino hagerimpi frigara knare huno freno e'neanagi, tagri a' anumzamo refako husiana atre'sigeno Poli'a omanigahie. ⁵Hianagi Poli'a ana ha' osifavea tevefi rutafri atregeno ata hoza omi'ne. ⁶Zamagra'ma antahi'zana, avufamo'a zorege mopafi traka huno frigahie hu'za nentahi'za, za'za kna kete'za mani'zana, mago'zana agritera fore osige'za, antahizazmia rukarehe hu'za ama'na nera anumzampigure hu'za hu'naze.

⁷Ana kumate'ma me'nea mopagerfa, ana ti amunompi mopare ugagota hu'nea ne' Pabliasi'e nehaza ne'mofona, agupo mopa'a me'nea ne'mo, muse nehuno tavareno noma'are vuno, 3'a kna'mofo agu'afina tazeri so'e hurante'ne. ⁸Anama hifina Pabliasi nefana amuho ave'nesino korarifa renagigeno vase'nege'za ome ke'naze. Poli'a omegeno nunamu hunteteno, avufare azana agofetu antegeno, kri'a amane hunte'ne. ⁹Anazama fore hige'za, maka ana ti amunompi mopare'ma nemaniza kri vahera anahu'za ageno kri'zamia eri amane huzmante'ne. ¹⁰Zamagranena, tagrira husga huneranteza, vunaku'ma trotra nehunke'za, ina zanku'ma upa'ma hu'nazana ventefi eri'za ome tami'naze.

Poli'a Rom kumate uhanati'nea naneke

¹¹3'a ika maniteta, ana ti amunompi kumate'ma zaho ko'ma ati'geno ko'ma emani'nea Aleksandria ventefi vu'none. Ana vente'mofo avuga kugaveza anumzane huno tare kogna tremo'kizni zname me'ne. ¹²Vuta 3'a kna (3 dei) Sirakusi kumate ome azerita mani'none. ¹³Anantetira rugagita Rigiamu hanati'none. Masonkeno ko'atigeno zage fretegati zaho egeta anagame'a mago knarera Puteoli uhanatuna zamota, ¹⁴anampi mago'a tafuhe'ina ome zamageta erifore hunke'za, ke hazageta zamagranena mago sonda umani'none. Ananteti Romu e'none. ¹⁵Hago tagriku'ma emani'naze kema Romu mani'naza tafuhe'za nentahi'za vahe'ma e'nazana, Apiasi kante maketi kumapinti ne'ageno, 3'a no mizase'za nemasaza nonteti tagri'ma tavataginakura e'naze. Poli'ma nezmageno'a hanave e'nerino, Anumzamofu muse hunte'ne.

¹⁶Romuma ufronke'za, kagra kvesi'zante kvama hugante'nia sondia ne'ene manio hu'za Polinkura hunte'naze.

¹⁷3'a kna'mofo amefi'a, Poli'a kehige'za Juda kva vahera emeritru hazageno, Juda kva vaheku anage hu'ne, Nafuheta nagra mago havizana vahetia huozmante'na tafahe'i zamuzmara eri haviza osu'noanagi, nagrira

kina vahekna hu'za Jerusalemitira navare'za Romu vahe zamazampi eme natre'naze. ¹⁸Romu vahe'mo'za nagrira refko hu'za nagete'za, katufe natrenaku hu'naze. Na'ankure nahe friku'ma hunanta'zana, kegafa'a nagripina omane'tfa hu'ne. ¹⁹Hianagi Juda vahe'mo'za ana kerera ke ha' renantage'na, rankva Sisa kenakure hu'noe. Hu'neanagi nagrama antahuana mago keaga nagra'ni'a vahera huozmantegahue hu'noe. ²⁰E'ina hu'negu nagra neramage'na tamagra ne keaga huku nehue. Na'ankure Israeli vahe'mo'za zamentinti hu'za, zamage'sama nentahiza zante ana agafare nagrira ama'na kina nofira renante'naze. ²¹Hige'za anage hu'za asami'naze, Judia kazigatira kagri nanekea avona kre'za atrageta e'ori'none. Hanki tafuhe'za anantegatira e'za naneke'a eme antege, kagri havi kavukva zamofu nanekea ontasmitfa hu'naze. ²²Hianagi menina kagripinti kema antahinaku nehune, na'ankure mika kotegati vahe'mo'za antahu'nana ama ana kevugura (sekt) huhaviza huneramantaze. ²³Agranema atru hu'za keaga husnaza knama erinte fatgoma hutage'za, rama'a vahe'mo'za nemasefinka e'za eme negageno, ana zupa Mosese kasegefinti ene kasnampa vahe'mo'zama krente'naza kefinti erino Anumzamofu mona kuma avu'avazana hu'ama huno nezmasmino, ama ana Jisasi avu'ava zante'ma zamentinti hanagu nanterana agafa huno nezmasmigeno kinaga ome ase'ne. ²⁴Poli'ma kema hia kemo'a mago'amokizmia antahintahi zmia zamare agrarega zamante'ne, mago'amo'za antahi'za zamentinti huzankura zamesra hu'naze. ²⁵Zamagra zamagra hugantigma hu'za mago zamarimpa nosu'za, atre'za nevazageno, Poli'a vagare keaga huno, Ruotge Avamu'mo tamagehe'ima keaga huzami'neana, kasnampa ne' Aisaiampi huvazino hufatgo hu'ne. ²⁶Ana vahete vutma anage hiho, ***tamage hutma kea antahi'gahazanagi, amara osu'tfaza hugahaze, tamagerafa hutma kegahazanagi, keanke oregahaze.*** ²⁷***Na'ankure ama ana vahe'mokizmi zamagu'amo'a amara huno hagro osu'nege'za kema antahi'zana, zamagesamo'a antahiso'e nosie, hagi zamavurga asuki'nege'za zamavua nonke'za zamagesaretira nontahi'za, zamagu'amo'a amara osanige'za, rukrahe hu'za omesage'na zamazeri onkanamregahue hu'ne.*** (Aisa 6:9-10)

²⁸⁻²⁹E'ina hu'negu tamagra antahi ankeresazana, Anumzamamo tahokehe'zana megia vahete atregeno e'ne hu'zama zamagra antahigahaze.^e ³⁰Poli'a, agra'ama ikante mizaseno ne'mania nompina, tare zgegafufi anampina mani'nege'za, agri'ma kekure hu'za amokizmia so'e huzmante'ne. ³¹Korera osuno Anumzamofu mona kumamofu avu'ava zana hu'ama nehuno, Ramofu Jisasi avu'ava zamofu nanekea rempi hunezamigeno mago'mo'a aze'orino i'o huonte'ne.

^e **28:29** Tuenti naenifima me'nea kea omane'ne hu'za korapa antahi'zane vahe'mo'za hu'naze. Anagama Polima huvarege'za, Juda vahe'mo'za atre'za nevazageno, zamagra zamagra oni'vrare oni'vrare nehu'za vu'zaeza hu'naze.